

## उत्पत्ती

**ब्रेक्ब मुर:** यहूदी आन ब्रेक्ब मुर नु थमा सुडक्ब आन ग्रुम्तीकेमी मेको किताब ब्रेक्ब मोसा बाक्ब, देंनीम। येसु ख्रीस्तमी यो मोसा आ ब्रेक्शो आ पर्बम लोत्र पशो बाक्त। यूहन्ना ५:४६; लूका २४:२७

**गेना दुम्शो:** एको किताब परमप्रभु यावेम नेल्ल सेला रे योसेफ आ बेक्ची ना सम्म डा लोत्र बाक्ब।

**मार ब्रेक्शो:** उत्पत्ती किताब आ शेंशो

१. परमप्रभु यावे रागी सेल्ब बाक्ब उत्पत्ती १:१-२:३  
परमप्रभु यावे मुर कली सेल्ब बाक्ब उत्पत्ती २:४-१५
२. डोंइती सेल्शो मुर आस पशो ब्रेक्शो बाक्ब उत्पत्ती ३:-११:-  
मुरुम परमप्रभु यावे आ देंशो मटितीके उत्पत्ती ३:-  
काइन नु हाबील उत्पत्ती ४:१-२४  
हाबील रे नोआह सम्म उत्पत्ती ४:२५-५:३२  
रागी नेल्ल कली ब्वाक्कुम सुम्शो उत्पत्ती १०:-  
बेबीलोन सहरम लाइशो खिं सेल्शो उत्पत्ती ११:१-९  
किकी पिपी आन नें उत्पत्ती ११:१०-३२
३. यहूदा आ किकी पिपी उत्पत्ती १२:-५०:-  
अब्राहाम उत्पत्ती १२:-२३:-  
इसहाक उत्पत्ती २४:-२६:-  
याकूब उत्पत्ती २७:-३६:-  
योसेफ उत्पत्ती ३७:-५०:-

डोंइती डा लोत्र

उत्पत्ती २:४-२५; भजन संग्रह १०४

1 नेल्ल क्येडा डोंइती परमप्रभुमी सरीड नु रागी दुम्पदा बाक्त।

2 मिनु खप, फश, ब्वाक्कु नेल्ल खाल्सीशा, मारेइ मवाशो बाक्माक्त। मिनु मेको तारी छिडछिड बाक्माक्त। परमप्रभु आ सोक्त ब्वाक्कु तारी फिल फिल पा हिम्सीशा बाक्बाक्माक्त।

परमप्रभुमी मारेइ मारेइ सेल्शो

उत्पत्ती ४-२५; भजन संग्रह १०४

3 मिनु परमप्रभुमी “छेडछेड दुमो” देंमेनु, छेडछेड दुम्माक्त। भजन संग्रह ३३:९; हिब्रू ११:३; यसेया ४५:७

4 मेको तशा “रिम्शो दुम्त” देंमाक्त। मिनु छेडछेड नु छिडछिड फ्रादीम्सी बाक्त।

5 मिनु परमप्रभुमी छेडछेड कली नाक्ती नु छिडछिड कली नाक्दो, दे नें वोदा बाक्त। मिनु नां रिक्शा, नां सोत्रशा, मेको डोंडती डा नाक्ती दुम्माक्त।

6 मिनु परमप्रभुमी “ब्वाक्कु आ दातेमी फ्रातीक दुमो। ब्वाक्कु ब्राशा बाक्मल” देंमाक्त।

7 मोपा परमप्रभुमी सरीड आगा डा ब्वाक्कु नु सरीड तारी डा ब्वाक्कु फ्रादीम्सी बाक्त। मिनु ब्वाक्कु बुक्शा बाक्मा बाक्त। भजन संग्रह १९:२; भजन संग्रह १३६:६; भजन संग्रह १४८:४

8 परमप्रभुमी मेको फ्रातीके कली सरीड, दे नें वोदा बाक्त। मिनु नां रिक्शा, नां सोत्रशा, मेको निक्शी नाक्त दुम्माक्त।

9 मिनु परमप्रभुमी “सरीड आगा डा ब्वाक्कु काथा दुमीन। सोत्रशो रू गूडो” देंमाक्त। मेको यो दुम्माक्त। अय्युब ३८:८-११; भजन संग्रह २४:२; २पत्रुस ३:५

10 मिनु परमप्रभुमी सोत्रशो रू कली रागी नु ब्वाक्कु देम्शा लीशो कली समुन्द्र, दे नें वोदा बाक्त। मिनु मेको आ सेल्शो तशा “रिम्शो दुम्त” देंमाक्त।

11 मिनु परमप्रभुमी रागी डा खप कली “घांस, फू नु रवापुकी दुम्मल। घांस नु फूपुकीम वांचेर बाक्मल। फल फुल सिप्ब

रवापुकी वाशा, आंम आंम फल सिम्मल। मेको आन वांचेर चहिं आन फलपुकीम बाक्मल” देंमाक्त। मिनु मोदेशो दुम्माक्त।

12 रागीम घांस नु फूपुकी वाशा, आन वांचेर यो वामा बाक्त। फल फुल रवापुकी वाशा, आन वांचेर यो वामा बाक्त। मिनु परमप्रभुमी आ सेल्शो तशा “रिम्शो दुम्त” देंमाक्त।

13 मिनु नां रिक्शा, नां सोव्रशा, मेको सां नाक्ती दुम्माक्त।

14 मिनु परमप्रभुमी “नाक्ती नु नाक्दो फ्राचा कली सरीडमी छेडछेड पा ब्राइबपुकी दुमीन। मेको ब्राइबपुकीम हिंडद नु बर्खा, नाक्ती नु बर्स कली फ्रातीक गेय पामेक्ल। ब्यवस्था ४:१९; भजन संग्रह ७४:१६; यसैया ४७:१३

15 मिनु मेको सरीड डा ब्राइबपुकीम रागी कली छेडछेड गेचा माल्नीम” देंमाक्त। मिनु मेको दुम्माक्त।

16 मोपा परमप्रभुमी ठेयब बत्ती निक्शी सेला बाक्त। शुश छेडछेड पा ब्राइब नाक्त कली नु इच्का छेडछेड पा ब्राइब बत्ती नाक्दो कली वोदा बाक्त। सोरुल यो सेल्मी बाक्त। भजन संग्रह १३६:७-९

17 परमप्रभुमी रागी छेडछेड बाक्ल, दे मेको नेल्ल आन कली सरीडमी वोइक्मी बाक्त।

18 नाक्त नु नाक्दो कली फ्राचा नु छेडछेड छिडछिड रे फ्राचा कली सरीडम वोदा बाक्त। परमप्रभुमी मेको तशा “रिम्शो दुम्त” देंमाक्त।

19 मिनु नां रिक्शा, नां सोव्रशा, मेको ४ नाक्ती दुम्माक्त।

20 मिनु परमप्रभुमी “ब्वाक्कुमी मारेइ मारेइ ब्रोंइशा बाक्बपुकीम ब्रीमल। रागी तारी मारेइ मारेइ चिक्ब सरीडम बेरमल” देंमाक्त।

21 मोपा परमप्रभुमी ब्वाक्कुम बाक्ब ठेयब हिंचा डा जन्तु नु मारेइ मारेइ ब्रोंइशा बाक्ब सेल्मी बाक्त। मेको शुश दुम्शा, समुन्द्र ब्रीशा बाक्मा बाक्त। चिक्ब यो शुश दुम्मा बाक्त। मिनु परमप्रभुमी मेको तशा “रिम्शो दुम्त” देंमाक्त। भजन संग्रह ७४:१३-१४; १४८:७

22 परमप्रभुमी मेको नेल्ल आन कली आसीक गेशा “सोशा बोशा,

शुश दुमीन, समुन्द्र डा ब्वाक्कु ब्रीडीने” देंमाक्त। चिक्ब आन कली यो “सोशा बोशा, रागीमी शुश दुमीन” देंमाक्त।

23 मिनु नां रिक्शा, नां सोव्रशा, मेको ५ नाक्ती दुम्माक्त।

24 मिनु परमप्रभुमी “रागीम मारेइ मारेइ ब्रोंइशा बाक्ब गूचा माल्नीम। मार गूचा माल्नीम देशा हना बी ब्यफ, खपीम ग्रेशा गाक्ब आइक्च जन्तु नु मार मार ब्वाकी डा जन्तु दुमीन” देंमाक्त। मिनु मेको दुम्माक्त।

25 मोपा परमप्रभुमी मारेइ मारेइ ब्वाकी डा जन्तु, मारेइ मारेइ बी ब्यफ, खपीम ग्रेशा गाक्ब नु मारेइ मारेइ आइक्च जन्तु सेल्मी बाक्त। मिनु परमप्रभुमी आ सेल्शो तशा “रिम्शो दुम्त” देंमाक्त।

26 मिनु नोले परमप्रभुमी “इं खोदेशो पा मुर का सेल्य। मिनु समुन्द्र डा डांइ, सरीडम बेरब चिक्ब, बी ब्यफ, ब्वाकी डा जन्तु नु खपीम ग्रेशा गाक्ब आइक्च जन्तु नेल्ल आन कली हुकुम पाइब दुम्ल” देंमाक्त। भजन संग्रह ८:६-९; एफिसी ४:२४; कलस्सी १:१५; याकूब ३:९

27 मिनु परमप्रभुमी आ खोदेशो तांइसीशो का सेला बाक्त। मेकोमी वोंइश मुर का नु मीश मुर का सेला बाक्त। उत्पत्ती ९:६; मत्ती १९:४

28 मिनु परमप्रभुमी मुर आस कली आसीक गेशा “सोशा बोशा, तमी तौ थिशा, रागी प्रिशा, रिम्शो पा हुकुम पस। समुन्द्र डा डांइ, सरीडम बेरब चिक्ब, रागीम बाक्ब जन्तु नेल्ल नु खपीम ग्रेशा गाक्ब आइक्च जन्तु नेल्ल आन कली रिम्शो पा हुकुम पसे” देंमाक्त।

29 मिनु परमप्रभुमी “नेनीस, गो इस कली वांचेर सिप्ब, गिग खाइ, फल सिप्ब नु वांचेर सेल्ब रवा गेतन्सी। मेको इस कली जचा ब्वचा दुम्ब। मत्ती ६:२५-३४

30 मिनु गो रागीम बाक्ब जन्तु, बी ब्यफ, रागी डा चिक्ब, खपीम ग्रेशा गाक्ब आइक्च जन्तु नु मारेइ मारेइ ब्रोंइशा बाक्ब आन कली

घांस, सुवा ब्वचा गेतामी” देंमाक्त। मिनु मोदेशो दुम्माक्त। भजन संग्रह १४५:१६

31 मिनु परमप्रभुमी आ सेल्शो नेल्ल तशा “शुश रिम्शो दुम्त” देंमाक्त। मिनु नां रिक्शा, नां सोत्रशा, मेको ६ नाक्त दुम्माक्त। मत्ती १९:१७; १तिमोथी ४:४

## 2

### डोंइती डा नाइक्तीक नाक्त

1 मिनु मोपा परमप्रभुमी सरीड, रागी नु मार मार बाक्मा, मेको नेल्ल सेल्ने थुमा बाक्त।

2 मिनु ६ नाक्तीम आ गेय नेल्ल थुम्शा डा मिन ७ नाक्तीम नांइसे बाक्त। हिब्रू ४:४

3 मिनु परमप्रभुमी नाइक्तीक नाक्त कली आसीक गेवा बाक्त। मिनु मेको नाक्त आंम कली नाइक्चा, दे वोदा बाक्त। मारदे हना मेको नेल्ल सेल्तीक गेय थुम्शा नांइसे बाक्त। प्रस्थान २०:११; भजन संग्रह ९५:११; इजीकीएल २०:१२; हिब्रू ४:९-१९

### परमप्रभुमी मुर सेल्शो

4 एको परमप्रभुमी सरीड नु रागी सेल्ची ना डा लोत्र बाक्ब। परमप्रभु यावेमी रागी नु सरीड सेलानु,

5 मारेइ मारेइ घांस खपीम मवाशो बाक्मा बाक्त। कोव्रकेली यो मदाप्शो बाक्मा बाक्त। मारदे हना परमप्रभु यावेमी रागीम रेउ मयिपाइशो बाक्माक्त। मिनु रूम गेय पाइब मुर यो मबाक्मा बाक्त।

6 मेना रागी रे खोला गूशा, रागी नेल्ल डा खप जिप्पाइक्बाक्माक्त।

7 मिनु नोले परमप्रभु यावेमी रू डा खप के मुर का सेला बाक्त। मिनु मुर आ नैमी ब्रोंइतीक सोक्त मुइक्ता बाक्त। मिनु मुर सोक्त पाइशो दुम्माक्त। उत्पत्ती ३:१९; अय्युब १०:९; अय्युब ३३:४; भजन संग्रह १०४:२९-३०; १कोरिन्थी १५:४५,४७

### परमप्रभुमी आ रू सेल्शो

8 मिनु नोले परमप्रभु यावेमी पूर्वम एदेन माइश्शो रू का सेला बाक्त। मेकेर आ सेल्शो मुर कली वोदा बाक्त।

9 मिनु परमप्रभु यावेमी मेकेर मार मार दारशो तांडसीब रवा नु जचा ब्वचा फल सिप्ब रवा वापदा बाक्त। ब्रॉइपाइक्ब का नु रिम्शो नु मरिम्शो तुइक्पाइक्ब रवा का यो रू आ दातेमी वापदा बाक्त। उत्पत्ती ३:२२; प्रकाश २:७; प्रकाश २२:२

10 मिनु रू कली जिप्पाइक्चा, दे एदेन रे खोला का गूमाक्त। मेको खोला नोले ब्राशा, ४ ओटा खोला दुम्शो बाक्मा बाक्त। इजीकीएल ४७:१-१२

11 डोंइती डा खोला आ नें पीशोन बाक्ब। मेको खोला हवीलाह रागी आ एर ओंथ रे लशो बाक्ब। मेको रागीमी सुन बाक्बाक्माक्त।

12 मेको रागी डा सुन रिम्शो बाक्बाक्माक्त। मेकेर गोकुल धूप नु ओनीक्स माइश्शो हीरा यो बाक्बाक्माक्त।

13 मेको आ नोले डा खोला आ नें गिहोन बाक्ब। मेको कूश माइश्शो रागी आ एर ओंथ हिरशो बाक्ब।

14 मिनु मेको आ नोले डा खोला आ नें टाइग्रीस बाक्ब। मेको खोला अस्सुर रागी आ पूर्व गे लशो बाक्ब। मिनु नेल्ल क्येडा नोले डा खोला आ नें युफ्रेटीस बाक्ब।

15 मिनु परमप्रभु यावेमी मुर कली लाइश्शा, एदेन रू दोचा नु कोव्रचा कली वोदा बाक्त।

16 मिनु परमप्रभु यावेमी मेको मुर कली “नेल्ल रवा डा फल जने ब्वने चाप्नेवे।

17 तन्न रिम्शो नु मरिम्शो तुइक्पाइक्ब रवा रे ब्वचा मदुम्ब। तेको नाक्त ब्वाइनेवे, मेको नाक्तीन बेक्नेवे” दे अरेवा बाक्त। रोमी ६:२३

### मुर आ गेय

18 मिनु परमप्रभु यावेमी “मुर का ला बाक्चा मरिम्शो दुम्ब। गो मेको नु बाक्चा कली वारच पाइब का सेल्लुड” देमाक्त। उपदेसक ४:३०

19 मिनु परमप्रभु यावेमी आ खप के सेल्शो मार मार जन्तु नु सरीडम बेरब चिक्ब आन कली मुरुम मार मार नें वोइक्बाक्मे, दे मुर आ बाक्तीके चाक्मी बाक्त। मिनु मुरुमी ब्रोंइशा बाक्ब नेल्ल आन कली नें वोदा बाक्त। मार नें वोदा, मेको नें लीमा बाक्त।

20 मुरुमी बी ब्यफ, सरीडम बेरब चिक्ब नु ब्वाकी डा जन्तु नेल्ल आन कली नें वोदा बाक्त। तन्न मुर कली मेको नु बाक्चा कली वारच पाइब मबाक्शो बाक्माक्त।

### परमप्रभुमी मुर आ वारच सेल्शो

21 मिनु परमप्रभु यावेमी आदम कली मारेइ मतुइक्चा डा पा निन्द्रा पपदा बाक्त। मिनु मेको के जेरी का शोला बाक्त। मिनु मेको पोत्रला कली श्येमी सुवा बाक्त।

22 मिनु परमप्रभु यावेमी मेको शोल्शो जेरी के मीश मुर का सेल्शा, मुर आ बाक्तीकेमी चाक्गा बाक्त।

23 मिनु आदममी “ओहो, एको रुश, आं रां डा रुश बाक्त। एको श्ये आं रां डा श्ये बाक्त” दे तुइक्ता बाक्त। मिनु मेकोमी “मेको आ नें मीश मुर वोइक्चा माल्ब। मारदे हना वोंइश मुर आ रां रे शोल्शो बाक्ब” देमाक्त।

24 मोपतीके वोंइश मुरुमी आ आंम आफ आस कली प्रोंइशा, आ मीश नु काथा बाक्ब। मेको निक्शी रां का दुम्नीस। मत्ती १९:५-६; १कोरिन्थी ६:१६; एफिसी ५:३१

25 मेना आदम नु आ मीश निम्फा शिश्रा बाक्सा बाक्त। मुने चहिं मतुइक्बाक्सा बाक्त।

## 3

### मुरुम परमप्रभु आ देंशो मटिशो

1 मिनु परमप्रभु यावे आ सेल्शो जन्तु आन दातेमी नेल्ल क्येडा निप्स पाइशो बुस्स दुम्माक्त। मिनु बुस्सुमी मीश मुर कली “परमप्रभुमी इस कली ‘एको रू डा रवा आन फल मारेइ मब्बसे’ देंमे?” दे हिल्लो पवा बाक्त। प्रकाश १२:९; प्रकाश २०:२

2 मिनु मीश मुरुमी बुस्स कली “गो एको रू डा रवा आन फल ब्वचा दुम्नस्कु। उत्पत्ती २:१६

3 तन्न रू आ दातेमी बाक्शो रवा आ फल आ पबर्म परमप्रभुमी ‘मब्बचा, मथिचा यो। ब्वाइतीसी हना, गे बेक्नीसी’ देंत” देंमाक्त। उत्पत्ती २:१७

4 तन्न बुस्सुमी “गे बेक्सीन मबेक्नीसी। यूहन्ना ८:४४

5 ब्वाइतीसी हना, इस कली रिम्शो नु मरिम्शो मार बाक्बा तुइक्पाइक्ब। मिनु गे परमप्रभु खोदेशो दुम्नीसी। मेकोन परमप्रभुमी तुइक्ताक्ब” देंमाक्त।

6 मिनु मीश मुरुम मेको रवा तशा ब्वशोनु, ब्रोव्रचा डा कोव्रशोनु, दारशो, रुप्तीक थुं गेचा डा तवा बाक्त। मोपतीके फल सेक्शा, ब्ववा बाक्त। मेको आ नेक्था बाक्ब आ वोंइश कली यो गेवा बाक्त। मेकोमी यो ब्ववा बाक्त। याकूब १:१४-१५; १तिमोथी २:१४

7 मिनु नोले निम्फा शिश्रा बाक्शो तुइक्तसे बाक्त। मिनु फोव्रशी रवा आ सफा सेक्शा फेक्तीक सेल्से बाक्त। उत्पत्ती २:२५

8 मिनु नाक्नाक्दो मेको निक्शीमी परमप्रभु यावे रूमी हिरशो नेन्से बाक्त। मिनु “परमप्रभु यावेम मतचा डा पा खुइक्चा” दे रवा आन दातेमी लशा, खुइक्ससा बाक्त। भजन संग्रह १३९:७-१०; येरमीया २३:२४

9 मिनु परमप्रभु यावेमी आदम कली “ते बाक्डे?” दे ब्रेत्ता बाक्त।

10 मेकोमी “गो इन गाक्शो नेंता। मिनु गो शिश्रा बाक्तीके, हिंशा खुइक्साक्यी” देंमाक्त।

11 मिनु “गे शिश्रा बाक्नेवे, दे दोपा तुइक्नेवे? मब्बचा देशो रवा आ फल ब्ववी?” दे हिल्लो पवा बाक्त।



12 मिनु मुरुमी “इन गेशो मीश मुरुमी आं कली मेको रवा आ फल गेती। मिनु गो ब्वाता” देमाक्त। २कोरिन्थी ११:३

13 मिनु परमप्रभु यावेमी मेको मीश मुर कली “मार पवी?” दे हिल्लो पवा बाक्त। मीश मुरुमी “बुस्सुमी आं कली जोल पा ब्वपाइक्ती। मिनु गो ब्वाता” देमाक्त। २कोरिन्थी ११:३

14 मिनु परमप्रभु यावेमी बुस्स कली “बी ब्यफ नु ब्वाकी डा जन्तु नेल्ल आन दातेम गे सराप राइनेवे। मारदे हना मोदेशो मरिम्शो पाप्तीवी। इ रांमी ग्रेशा गाक्चा माल्नेवे। इ ब्रोंइतीक नाक्त सम्म खप जशा, बाक्चा माल्नेवे।

15 गे नु मेको मीश मुर जिशा, बाक्चा मलीसे। मेको आ युइ नु इ युइ जिशा बाक्नीमी। मीश मुर आ युइ कामी इ पिया दिम्शा प्रोल्ब। गे चहिं मेको आ गेग्रेम कोक्नेवे” दे सराप पदा बाक्त। प्रकाश १२:४-५, १५-१७

16 मिनु मेकोमी मेको मीश मुर कली “कोव्रज कुरशा, आल थिवेनु, इ कली ठेयब श्येत गेनुड। आल थिचा रोइ पाइनेवे। मो हना यो इ वोंइश कली माल्नेवे। मिनु मेकोमी इ कली हुकुम पाइब” देमाक्त। एफिसी ५:२२-२३; १तिमोथी २:१२

17 मिनु आदम कली “मारदे हना गे इ मीश आ लोव्र नेंशा, मब्वचा देशो रवा आ फल ब्वाप्तीवी, इ पतीके आ पर्बम इ रू नेल्लेमी सराप ताइनीम। इ जचा थोव्रक श्येत पा खुम्चा माल्नेवे। उत्पत्ती ८:२१-२२; अय्युब ३१:३८-३९

18 इ रूमी चू नु चोंक वानीम। मिनु गे गिगी खाइ ब्वचा माल्नेवे।

19 इ कुप्फी रे गाल यिपाइश्शा शोब्ले जचा माल्नेवे। गे खप मदुमे सम्म मोदेशो पचा माल्नेवे। मारदे हना गो इ कली खप रे सेल्शो नड” दे परमप्रभु यावेमी आदम कली देमाक्त। उत्पत्ती २:७; भजन संग्रह ९०:१०; भजन संग्रह १०४:२९; उपदेसक १२:७; २थिस्सलोनिकी ३:१०

20 मिनु आदममी आ मीश कली हव्वा नें वोदा बाक्त। मारदे हना मेको ब्रोंइब मुर नेल्ल आन ममा दुम्माक्त।

21 मिनु परमप्रभु यावेमी आदम नु आ मीश आस कली कुशुल के फेक्तीक सेल्शा, फेक्तीम्सी बाक्त।

22 मिनु परमप्रभु यावेमी “मुर इं खोदेशो दुम्त। रिम्शो नु मरिम्शो तुइक्ब दुम्त। मेको ब्रोंइपाइक्ब रवा आ फल यो सेक्शा, ब्वाप्तु हना, गेना हना यो ब्रोंइब, गेनायो मबेक्ब दुम्ब” देंमाक्त।

23 मोपतीके परमप्रभु यावेमी खप रे सेल्शो मुर कली एदेन माइश्शो रू रे गुंडशा, अरु रूम गेय पथ सोइक्ता बाक्त। उत्पत्ती २:१५

24 परमप्रभुमी मेको आस कली खेरसी बाक्त। मेको आस कली खेरशा, एदेन रू डा पूर्वमी आ स्वर्ग डा करूब माइश्शो गेय पाइब वोदा बाक्त। मेकेर मी ब्रशो एर ओंथ हिरब तरवार का यो वोदा बाक्त। मेको ब्रोंइपाइक्ब रवा आ फल ब्वचा मताम्सेक्ल, दे कोव्रब वोदा बाक्त।

## 4

### परमप्रभु रे डोन बाक्शो

1 मिनु नोले आदम आ मीश हव्वा नु इम्माक्त। मिनु हव्वाम कोव्रज कुरशा, तौ का थिमाक्त। हव्वामी “परमप्रभु यावेमी आं कली वारच पा आल का गेती” देंमाक्त। मिनु आ नें काइन वोदा बाक्त।

2 मिनु मेको आ नोले लेंशा अर्को तौ का यो थिमाक्त। मेको कली हाबील नें वोदा बाक्त। हाबील काइन आ लोक्ब बाक्माक्त। मेको आल निक्शी कोल्शा, हाबील भेडा गोठला दुम्माक्त। काइन चहिं रू डा गेय पाइब दुम्माक्त।

3 काबु काइनमी आ रू डा सिश्शो मारेइ मारेइ थोव्रक परमप्रभु यावे कली चढ़ेवा बाक्त। प्रस्थान २३:१९

4 हाबीलमी आ डोंइती गिक्शो पाठा आ श्ये नु बोसो परमप्रभु यावे कली चढ़ेवा बाक्त। मिनु परमप्रभु यावेमी हाबील आ चढ़ेशो ब्रवा बाक्त। प्रस्थान ३४:१९; लेवी ३:१६

5 तन्न काइन आ चदेशो मब्रवा बाक्त। मिनु काइन आ कुल राव किकपा चुरमाक्त। प्रस्थान ३३:१९; हिब्रू ११:४

6 मिनु परमप्रभु यावेमी काइन कली “मारदे चुरे? मारदे राव किकडे?”

7 गे रिम्शो पाप्तीवी हना, गो इ कली मब्राइनुडा डा? ब्राइनुड। गे मरिम्शो पाप्तीवी हना, मुर साइक्ब जन्तु खोदेशो पा, पाप इ लाप्योमी बाक्ब। मिनु इ कली माल्ब। गे इ मरिम्शो थुं कली ग्राडो” देंमाक्त। गलाती ५:१७; रोमी ६:१२

8 मिनु काइनमी आ लोकब हाबील कली “रूमी लस” देंमाक्त। मिनु रूमी बाक्सानु, काइनमी हाबील कली सदा बाक्त। १यूहन्ना ३:१२, १५

9 मिनु परमप्रभु यावेमी काइन कली “इ लोकब ते बाक्म?” दे हिल्लो पवा बाक्त। मिनु काइनमी “डाद, गो आं लोकब आ गोठला नडा डा?” देंमाक्त। उत्पत्ती ३:९

10 मिनु मेकोमी “नेनो, मार पवी? इ लोकब आ हुशेमी आं कली खप रे ब्रेशो नेता। भजन संग्रह ९:१३; मत्ती २३:३५; हिब्रू १२:२४

11 मुल गे सराप रशा, इ रू रे खेरचा पुंडसीनेवे। मारदे हना इ लोकब आ हुश मेकेर जारशो बाक्ब। गन्ती ३५:३३

12 मुल रे गे रू डा गेय पवीनु, मारेइ मग्रेल्ब। रागी प्रोंइशा, गाक्ब मुर दुम्चा माल्नेवे” दे परमप्रभु यावेमी देंमाक्त।

13 मिनु काइनम परमप्रभु यावे कली “इन गेशो सजाइ ठेयब बाक्ब। मोमो श्येत गेतीनी हना, फाल्ने मचाप्नुड।

14 मुलाक्ती आं कली आं रू रे गुंडताक्यीनी। मिनु इन नेक्था बाक्चा मताइनुड। गो मुल रागी प्रोंइशा, गाक्ब मुर दुम्नुड। आं कली सुम थित्तेक्म हना यो, साइक्नीम” देंमाक्त। अय्युब १५:२०-२४

15 मिनु परमप्रभु यावेमी “ममाइ, सुइमी इ कली साइक्तेमी हना, इ तशो सराप मेको कली ७ खेयप रचा माल्ब” देंमाक्त। मिनु परमप्रभु यावेमी “काइन कली सुइमी मसदमेक्ल” दे आ रांम चिनु वोदा

बाकत। इजीकीएल ९:६; प्रकाश ७:३-४

16 मिनु नोले काइन परमप्रभु यावे आ डोंइती रे लमाकत। मिनु एदेन आ पूर्व गे, नोद माइश्शो रागीम जाकदीश्शा बाकमाकत।

मुर आन ठेयब लेशशो

17 मिनु काइन आ मीश नु इम्माकत। मिनु मेकोमी कोव्रज कुरशा, हनोक थिमाकत। मिनु काइनम सहर का सेला बाकत। मेको सहर कली आ तौ हनोक आ नें खोदेंशो पा हनोक नें वोदा बाकत।

18 हनोकमी इराद थिमाकत। इरादमी मेहुयाएल थिमाकत। मेहुयाएल मेथुशाएल आ आफ दुम्माकत। मेथुशाएल लमेक आ आफ दुम्माकत।

लमेकमी यो मुर साइश्शो

19 मिनु लमेकमी मीश निक्शी चाकगा बाकत। का आ नें आदाह नु अर्को आ नें चिल्लाह बाकमाकत।

20 मिनु आदाहमी याबाल थिमाकत। मेको ताम्बुम बाकब नु गोठम बाकब बस्तु योव्रब आन किकी पिपी बाकमाकत।

21 मेको आ लोक्ब आ नें यूबाल बाकमाकत। मेको बीना नु मुइक्तीके ताप्ब आन किकी पिपी बाकमाकत।

22 मिनु चिल्लाहमी तूबल-काइन थिमाकत। मेकोमी कांसा नु फलाम के मार मार सेल्टीक गेय पवा बाकत। तूबल-काइन आ समी नामा बाकमाकत।

23 मिनु लमेकमी आ मीश निक्शी आस कली “आदाह नु चिल्लाह, आं लोव्र नेनीस, गे लमेक आ मीश निक्शी, आं सेंदा नेंशा, होस पसे। गो मुर का साइक्ता। मारदे हना मेको ठिटामी आं कली तुप्ती।

24 काइन साइक्ब ७ खेयप क्येक्क लेत्चा पुंडसीब हना, लमेक साइक्ब ७७ खेयप क्येक्क लेत्चा पुंडसीब” देंमाकत। उत्पत्ती ४:१५; लेवी १९:१८; ब्यवस्था ३२:३५; मत्ती १८:२२

आदम नु हव्वा आस अर्को तौ

25 मिनु आदम लेंशा आ मीश नु इप्शा, तौ का थिमाक्त। मेको कली सेथ नें वोदा बाक्त। हव्वामी “परमप्रभुमी हाबील आ पा डा अर्को तौ का गेती। मारदे हना काइनमी हाबील कली साइक्तु” देंमाक्त।

26 मिनु सेथमी यो तौ का थिमाक्त। मिनु मेको कली एनोश नें वोदा बाक्त। मिनु मेना रे मुरपुकीमी परमप्रभु यावे कली पुंड्या नु ठेयब सेल्चा गोव्रमे बाक्त। उत्पत्ती १२:८

## 5

आदम आ चच युइ

१इतिहास १:१-४

1 एको आदम आ चच, युइ बाक्नीम। परमप्रभुमी मुर सेलानु, आ खोदेशो पा सेला बाक्त। लूका ३:३७-३८; उत्पत्ती १:२७

2 वोंइश मुर का नु मीश मुर का सेला बाक्त। मिनु मेको आस कली आसीक गेशा, आस नें मुर वोंइसी बाक्त।

3 मिनु आदम सहे का ३० बर्स दुम्मेनु, आ खोदेशो तौ का थिमाक्त। मिनु मेको कली सेथ नें वोदा बाक्त। भजन संग्रह ५१:७; १कोरिन्थी १५:४५

4 सेथ थिशा नोले आदम ८ सहे बर्स ब्रोंइमाक्त। अरु तमी तौ यो थिमाक्त।

5 मिनु आदम नेल्ल पा ९ सहे ३० बर्स ब्रोंइशा बेक्माक्त।

6 मिनु सेथ सहे का ५ बर्स दुम्मेनु, तौ का थिमाक्त। मेको कली एनोश नें वोदा बाक्त।

7 एनोश थिशा नोले ८ सहे ७ बर्स ब्रोंइमाक्त। अरु तमी तौ यो थिमाक्त।

8 मिनु सेथ नेल्ल पा ९ सहे १२ बर्स ब्रोंइशा बेक्माक्त।

9 मिनु एनोश ९० बर्स दुम्मेनु, तौ का थिमाक्त। मेको कली केनान नें वोदा बाक्त।

10 केनान थिशा नोले ८ सहे १५ बर्स ब्रोंइमाक्त। अरु तमी तौ यो थिमाक्त।

11 मिनु एनोश नेल्ल पा ९ सहे ५ बर्स ब्रोंइशा बेक्माक्त।

12 मिनु केनान ७० बर्स दुम्मेनु, तौ का थिमाक्त। मेको कली मा-हालालेल नें वोदा बाक्त।

13 केनान मा-हालालेल थिशा नोले ८ सहे ४० बर्स ब्रोंइमाक्त। अरु तमी तौ यो थिमाक्त।

14 मिनु केनान नेल्ल पा ९ सहे १० बर्स ब्रोंइशा बेक्माक्त।

15 मिनु मा-हालालेल ६५ बर्स दुम्मेनु, तौ का थिमाक्त। मेको कली यरेद नें वोदा बाक्त।

16 यरेद थिशा नोले ८ सहे ३० बर्स ब्रोंइमाक्त। अरु तमी तौ यो थिमाक्त।

17 मिनु मा-हालालेल नेल्ल पा ८ सहे ९५ बर्स ब्रोंइशा बेक्माक्त।

18 मिनु यरेद सहे का ६२ बर्स दुम्मेनु, तौ का थिमाक्त। मेको कली हनोक नें वोदा बाक्त।

19 यरेद हनोक थिशा नोले ८ सहे बर्स ब्रोंइमाक्त। अरु तमी तौ यो थिमाक्त।

20 मिनु यरेद नेल्ल पा ९ सहे ६२ बर्स ब्रोंइशा बेक्माक्त।

21 मिनु हनोक ६५ बर्स दुम्मेनु, तौ का थिमाक्त। मेको कली मेथुसेलाह नें वोदा बाक्त। हनोक कली हिब्रू लोव्रमी एनोक देनीम।

22 हनोक आ थुंमी परमप्रभु आ नेक्था बाक्शो बाक्माक्त। हनोक मेथुसेलाह थिशा नोले सहे सां बर्स ब्रोंइमाक्त। अरु तमी तौ यो थिमाक्त। उत्पत्ती ६:९

23 मिनु हनोक नेल्ल पा सहे सां ६५ बर्स दुम्माक्त।

24 हनोक परमप्रभु नु गाक्बाक्माक्त। मिनु परमप्रभुमी हनोक कली आ बाक्तीक लदा बाक्त। मुरपुकीम हनोक कली माल्शा, मथिदमे बाक्त। २राजा २:११; हिब्रू ११:५

25 मिनु मेथुसेलाह सहे का ८७ बर्स दुम्मेनु, तौ का थिमाक्त। मेको कली लमेक नें वोदा बाक्त।

26 मेथुसेलाह लमेक थिशा नोले ७ सहे ८२ बर्स ब्रोंडमाक्त। अरु तमी तौ यो थिमाक्त।

27 मिनु मेथुसेलाह नेल्ल पा ९ सहे ६९ बर्स ब्रोंडशा बेक्माक्त।

28 मिनु लमेक सहे का ८२ बर्स दुम्मेनु, तौ का थिमाक्त।

29 मेको कली नोआह नें वोदा बाक्त। मेको नें आ अर्थ थुं बारपाइक्तीक बाक्ब। मिनु लमेकमी “परमप्रभु यावेमी खप कली सराप पाप्तु। आं तौ रूम गेय पपाइक्तीके श्येत रे प्रोंडब बाक्ब” देंमाक्त। उत्पत्ती ३:१७-१९

30 लमेक नोआह थिशा नोले ५ सहे ९५ बर्स ब्रोंडमाक्त। अरु तमी तौ यो थिमाक्त।

31 मिनु लमेक नेल्ल पा ७ सहे ७७ बर्स ब्रोंडशा बेक्माक्त।

32 मिनु नोआह ५ सहे बर्स दुम्मेनु, शेम हाम नु यफेथ थीमी बाक्त।

## 6

### रागी ब्वाक्कुम सुम्शो

1 मिनु नोले रागीमी मुर शुश दुम्मा बाक्त। मेकोपुकीमी शुश तमी थीमा बाक्त।

2 मिनु परमप्रभु आ तौपुकीमी मुर आन तमी आन कली तशा “दारशो बाक्नीम” दे मिम्तमे बाक्त। मिनु मेको आन दाते रे योत्रशा चाक्मे बाक्त। अय्युब १:६; २पत्रुस २:४; यहूदा ६

3 मिनु परमप्रभु यावेमी “आं सोक्त मुर आन कली शुश बर्स बाक्चा मगेनुड। मुर बेक्चा माल्नीम। आन ब्रोंडतीक सहे का २० बर्स ला दुम्ब” देंमाक्त।

### परमप्रभु आ थुं मनुशो

4 मेना रागीमी नेफीलीम माइश्शो थम लाइश्शो मुरपुकी बाक्शो बाक्मा बाक्त। मिनु नोले परमप्रभु आ तौपुकीमी रागी डा तमी आन कली चाक्शा, आल थीमे बाक्त। मेको बोल्यो नु ठेयब लडाइ पाइब मुर दुम्मा बाक्त। इजीकीएल ३२:२७

5 मिनु परमप्रभु यावेमी “रागीम बाक्शो मुर आं अरेशो मटीब नु मरिम्शो पाइब ला बाक्नीम। मार मिम्ताक्म हना यो, मरिम्शो बाक्त” दे मिम्ता बाक्त। उत्पत्ती ८:२१

6 मिनु परमप्रभु यावेमी आंम सेल्शो मुर आन कली तशा, शुश आ थुं मनुथु बाक्शो बाक्माक्त। १सामुएल १५:११-३५; येरमीया १८:७-१०

7 मिनु परमप्रभु यावेमी “आं सेल्शो मुर आन कली रागी रे क्याम्नुड। मुर नु जन्तु नेल्ल क्याम्नुड। खपीम ग्रेशा गाक्ब आइक्च जन्तु नु सरीडम बेरब चिक्ब यो क्याम्नुड। मारदे हना गो मेको आन कली सेल्शा यो, आं थुं मनुड” दे मिम्ता बाक्त। गन्ती २३:१९; रोमी ३:३-४; २तिमोथी २:१३

8 मिनु परमप्रभु यावेमी नोआह तवानु, मेको कली दाक्ता बाक्त। हिब्रू ११:७

### नोआह नु आ तौ

9 नोआह आ तौ सां बाक्मा बाक्त। नोआह शुश रिम्शो मुर बाक्माक्त। मुर नेल्लेमी “ठीक पाइब दोस मताइब मुर बाक्ब” दे तुइक्तमे बाक्त। नोआह परमप्रभु नु गाक्बाक्माक्त। उत्पत्ती ५:२२

10 मिनु नोआह आ तौ सां आन नें शेम, हाम नु यफेथ बाक्मा बाक्त।

11 परमप्रभुमी मुर आन कली कोव्रडानु, नेल्ल मरिम्शो बाक्मा बाक्त। रागी नेल्ल हुश ख्राक्श पोक्तीकेमी ब्रीमाक्त। अर्को मरिम्शो पाइब यो बाक्मा बाक्त।

12 मिनु परमप्रभुमी रागीम बाक्ब मुर आन कली कोव्रडानु, शुश मरिम्शो बाक्मा बाक्त। मुर नेल्लेमी आन दला दाक्स पामे बाक्त। भजन संग्रह १४:२-३

13 मिनु परमप्रभुमी नोआह कली “गो मुर नेल्ल आन कली क्याम्नुडमी। मारदे हना मेको आन पर्बम रागी हुश ख्राक्श



पोक्तीकेमी ब्रीत। मुर नु रागी नेल्ल आन कली क्याम्नुड। आमोस ८:२

14 गे चहिं खिं खोदेशो पा शी के ठेयब डोंगा का सेलो। मिनु आगामी कोठापुकी सेलो। ब्वाक्कु मओव्रचा डा पा आगा नु लाडगा अल्कत्राम सिल्दो” दे नोआह कली देंमाक्त।

### नोआहमी परमप्रभु कली टिशो

15 मिनु परमप्रभुमी “डोंगा दोपा सेल्चा माल्नेवे देंशा हना, मेको आ लाइशो सहे सां कुबीत दुम्चा माल्ब। आ ब्रेम्शो ५० कुबीत दुम्चा माल्ब। आ ग्येत्थ लाइशो ३० कुबीत दुम्चा माल्ब। कुबीत का ०.५ मिटर खोदेशो बाक्ब।

16 मिनु छाना रे हात का प्रोंइशा, फश गूतीक बोखा का सेल्चा माल्नेवे। मिनु का पटटीम लाप्चो का वोइक्चा माल्नेवे। आगामी खप तला का, दाते तला का नु तला तारी बाक्तीक का सेल्चा माल्नेवे।

17 आं देंशो रिम्शो पावो। मारदे हना गो मारेइ मारेइ साइक्चा कली रागी ब्वाक्कुम प्रिंनुड। रागीम मार मार सेस बाक्मा, मेको नेल्ल बेक्चा माल्नीम।

18 तन्न गो इन कली कोव्रनुड, गे नु आं कबल पाइनुड। मिनु गे, इ तौपुकी, इ मीश, नु इ चाइमीपुकी मेको डोंगामी ओव्रचा माल्नीनी। मेको नेल्ल गे नु ब्रोंइचा माल्नीम। मेको पोथी भाले, बी ब्यफ नेल्ल निक्निक्शी बाक्चा माल्नीम। उत्पत्ती ९:९

19 गेपुकी नु मारेइ मारेइ सेस जन्तु निक्निक्शी ओव्रचा माल्नीम।

20 मारेइ मारेइ चिक्ब, मारेइ मारेइ जन्तु नु मारेइ मारेइ खपीम प्रेशा गाक्ब आइक्च जन्तु निक्निक्शी ब्रोंइचा, दे गे नु डोंगामी ओव्रशा, बाक्चा माल्नीम।

21 मिनु इन कली, मार मार जचा ब्वचा ओइशा, उप्शा वोतो। मेको इन कली नु मेको आन कली जचा थोव्रक दुम्ब” दे परमप्रभुमी नोआह कली अरेवा बाक्त।

22 मिनु परमप्रभुमी मार मार मदा, नोआहमी नेल्ल टिशा, पवा बाक्त। हिबू ११:७

## 7

नोआह ठेयब डोंगाम ओव्रशो

1 मिनु परमप्रभु यावेमी नोआह कली “गे नु इ खिं डा मुर नेल्ल शी के ठेयब डोंगामी ओव्रडीन। मारदे हना एको पाला डा मुर आन दातेमी गे का ला ठीक पाइब बाक्नेवे। उत्पत्ती ६:८

2 गे चढ़ेचा दुम्ब बी ब्यफ, क्यारश बोका, भेडा सांड रे ७ जोड लतो। उत्पत्ती ८:२०; लेवी ११:-

3 मिनु चढ़ेचा दुम्ब सरीडम बेरब चिक्ब यो ७ जोड लतो। भाले नु पोथी लतो। मारदे हना मेकोपुकी रागीमी ब्रोंइचा माल्नीम।

4 गो ७ नाक्त नोले ४० नाक्त नु ४० नाकदो सम्म रेउ यिपाइक्नुड। मिनु आं सेल्शो रागीम मार मार ब्रोंइशा बाक्मा, मेको नेल्ल आन कली साइक्नुडमी” देंमाक्त।

5 मिनु परमप्रभु यावेमी मार मार अरेवा, नोआहमी नेल्ल टिशा पवा बाक्त।

6 रागीमी रेउ यिचा गोवानु, नोआह ६ सहे बर्स दुम्शो बाक्माक्त।

7 मिनु नोआहम मार पवा बाक्त देशा हना, डोंइती आ तौपुकी, आ मीश, आ चाइमीपुकी ब्वाक्कु रे प्रोंइचा कली ठेयब डोंगामी ओव्रपाइक्मी बाक्त। १ पत्रुस ३:२०

8 मिनु चढ़ेचा दुम्ब बस्तु, चढ़ेचा मदुम्ब बस्तु नु चिक्ब नु मारेइ मारेइ खपीम गेशा गाक्ब आइक्च जन्तु,

9 निकनिकशी बी ब्यफ, जोड जोड भाले पोथी नोआह नु ठेयब डोंगामी ओव्रमा बाक्त। परमप्रभुमी दोपा नोआह कली अरेवा, मोपा पवा बाक्त। उत्पत्ती ६:१९-२०

10 मिनु ७ नाक्त नोले रागीम ब्वाक्कु ब्रीचा गोवा बाक्त।

11 मिनु रेउ यिमेनु, उइ रे यो ब्वाक्कु बारशा कुचा गोवा बाक्त।  
मेना नोआह ६ सहे बर्स, महिना निक्शी १७ नाक्त दुम नाक्त मोदेशो  
दुम्माक्त। प्रकाश ९:१

12 मिनु ४० नाक्त नु ४० नाक्तो शुश रेउ यिमाक्त।

13 मेको रेउ यिचा आ डोंइती नाक्ती नोआह नु आ तौ शेम, हाम,  
नु यफेथ सांफा, नोआह आ मीश नु आ चाइमी सांफा मेको डोंगामी  
ओव्रमा बाक्त।

14 मिनु मारेइ मारेइ जन्तु, मारेइ मारेइ बी ब्यफ, क्यारश भेडा,  
मारेइ मारेइ खपीम ग्रेशा गाक्ब आइक्च जन्तु नु मारेइ मारेइ फ्रां  
पाइशो, ब्रोंइशा बाक्ब जन्तु

15 जोड जोड पा नोआह नु ठेयब डोंगामी ओव्रमा बाक्त।

16 मिनु ब्रोंइशा बाक्ब नेल्ल जोड जोड पा, भाले पोथी नेल्ल  
ओव्रमा बाक्त। परमप्रभुमी नोआह कली दोपा अरेवा, मोपा नेल्ल  
टिशा पवा बाक्त। मेको नेल्ल ओव्रमा नोले परमप्रभु यावेमी लाप्यो  
चोक्गा बाक्त। उत्पत्ती ६:१९

17 मिनु ब्वाक्कु ४० नाक्त सम्म रागीम ब्रीना ब्रीन बाक्माक्त।  
ब्वाक्कु शुश बारशा, ब्वाक्कुमी ठेयब डोंगा कली कुरा बाक्त।  
ब्वाक्कु रागीम शुश बारमाक्त।

18 मिनु रेउ यिना यिन, ब्वाक्कु बारना बारन लमेनु, मेको डोंगा  
ब्वाक्कु तारी गाक्चा गोवा बाक्त।

19 रागी नेल्लेम ब्वाक्कु शुश दुम्शा, ठेयब डांडा यो सुमा बाक्त।

20 डांडा क्येडा यो १५ कुबीत सम्म ग्येत्थ सुमा बाक्त। कुबीत  
का ०.५ मिटर खोदेशो बाक्ब।

21 मिनु रागीम मार मार ब्रोंइशो बाक्मा, बी ब्यफ, क्यारश भेडा,  
ब्वाकी डा जन्तु, रागीम फोंइब, खपीम ग्रेशा गाक्ब आइक्च जन्तु  
नु मुर नेल्ल बेक्मा बाक्त। २पत्रुस ३:५-६

22 रागीम ब्रोंइशा बाक्ब नेल्ल बेक्मा बाक्त।

23 मोपा मेकोमी रागीम ब्रोंइशा बाक्ब मार मार बाक्मा, मुर, जन्तु खपीम गेशा गाक्ब आइक्च जन्तु नु सरीडम बेरब चिक्ब नेल्ल क्याम्दा बाक्त। नोआह नु आ खिं डा मुर ला प्रोंइमी बाक्त।

24 मिनु मेको ब्वाक्कु सहे का ५० नाक्त सम्म रागीम बारना बारन बाक्माक्त।

## 8

### परमप्रभुम ब्वाक्कु सोव्रपाइशो

1 मिनु परमप्रभुमी नोआह नु ठेयब डोंगामी बाक्ब नेल्ल ब्वाकी डा जन्तु नु बी ब्यफ क्यारश भेडा आन कली मप्रेंदीमी बाक्त। मिनु परमप्रभुमी रागीम फश पपदा बाक्त। मिनु ब्वाक्कु सोव्रमाक्त।

2 मिनु ब्वाक्कु बुक्तीके नेल्ल सोव्रना सोव्रन लमा बाक्त। रेउ यो देक्माक्त।

3 मिनु मेको ब्वाक्कु सोव्रना सोव्रन लशा, सहे का ५० नाक्त नोले शुश सोव्रमाक्त।

4 मिनु मेको बर्स डा ७ महिना डा १७ नाक्त मेको ठेयब डोंगा आरारात माइशो डांडामी जाक्दीशशा दिक्माक्त। उत्पत्ती ७:११

5 मिनु मेको बर्स डा १० महिना सम्म ब्वाक्कु सोव्रना सोव्रन लमाक्त। १० महिना डा डोंइती नाक्ती अर्को पहाड डा डांडा तांइसमा बाक्त।

6 मिनु ४० नाक्त नोले नोआहम आ सेल्शो डोंगा डा झेल रोकगा बाक्त। उत्पत्ती ७:१२, १७

7 मिनु मेकेर रे खद का सोइक्ता बाक्त। मेको रागी डा ब्वाक्कु मसोव्रम सम्म एर ओंथ बेरशा बाक्माक्त।

8 मिनु नोआहमी “ब्वाक्कु नेल्ल सोव्रमा को” दे तुइक्चा कली दुकुर का यो सोइक्ता बाक्त।

9 मेको दुकुर चहिं जुक्तीक मथित्थु लेशशा, नोआह आ बाक्तीके जाक्माक्त। मारदे हना आ लतीकेमी ब्वाक्कुम सुम्शो बाक्माक्त। मिनु नोआहम गुइ दिंशा ताक्शा, मेको कली ओंइदा बाक्त।

10 मिनु अर्को ७ नाक्ती रिम्शा, मेको ढुकुर कली लेंशा डोंगा रे सोइक्ता बाक्त।

11 मिनु नाक्नाक्दो ढुकुरमी आ टुंडमी नक वाशो तेल रवा आ सफा का कुरशा जाक्माक्त। मिनु नोआहमी “ब्वाक्कु नेल्ल सोत्रमाक्त” दे तुइक्ता बाक्त।

12 मिनु नोले यो ७ नाक्त रिम्शा, ढुकुर कली सोइक्ता बाक्त। मिनु मेको ढुकुर मलेम्माक्त।

### ब्वाक्कु सोत्रशो

13 मेको नोआह ६ सहे बर्स का दुम्मे आ डोंइती डा महिना डा डोंइती डा नाक्तीम रागीमी ब्वाक्कु सोत्रमाक्त। नोआहमी ठेयब डोंगा आ छाना थूशा, कोत्रशा “लो, ब्वाक्कु नेल्ल सोत्रमाक्त” देंमाक्त। उत्पत्ती ७:११

14 मिनु महिना का नु २७ नाक्त नोले खप नेल्ल सोत्रमाक्त।

15 मिनु परमप्रभुमी नोआह कली

16 “गे, इ मीश, इ तौपुकी नु इ चाइमीपुकी डोंगा रे गूडीन” देंमाक्त।

17 मिनु “मारेइ मारेइ ब्रोंइशा बाक्ब, चिक्ब, जन्तु नु खपीम ग्रेशा गाक्ब आइक्च जन्तु नेल्ल आन कली यो गुंडदो। मेकोपुकी सोशा बोशा रागीम शुश दुम्चा माल्नीम” देंमाक्त।

18 मिनु नोआह, आ तौपुकी, आ मीश नु आ चाइमीपुकी गूमा बाक्त। २ पत्रुस २:५

19 मिनु जन्तु नेल्ल, खपीम ग्रेशा गाक्ब आइक्च जन्तु नेल्ल, चिक्ब नेल्ल नु रागीम ब्रोंइशा बाक्ब मार मार नेल्ल डोंगा रे गूमा बाक्त।

### परमप्रभु यावेमी गेशो लोत्र

20 मिनु नोले नोआहम परमप्रभु यावे कली चढ़ेतीक का सेला बाक्त। मिनु चढ़ेचा दुम्ब बस्तु नु चढ़ेचा दुम्ब चिक्ब नेल्ल लाइशशा चोशा चढ़ेतीक चढ़ेवा बाक्त। उत्पत्ती ७:२

21 मिनु परमप्रभु यावेमी मेको ब्रोव्रशो रिना नाम्शा, ग्येरसे बाक्त। आ थुंमी “मुरुम मरिम्शो पतीकेम खप कली मुल सराप गेनायो मपाइनुड। मुर आ थुं मरिम्शो बाक्त हना यो, गेनायो सराप मपाइनुड। गो ब्रोंइशा बाक्ब नेल्ल आन कली साइशशा क्याम्ताकड। मोदेशो गेनायो लेंशा मपाइनुड। उत्पत्ती ६:५; अय्युब १४:४; भजन संग्रह १४:३; मत्ती १५:१९; रोमी ३:२३

22 रागी बाक्म सम्म शोक्चा, खुम्चा नु रिक्चा तांइसीब। ग्यू पाइब, हुप्ब, हिंउद नु बर्खा दुम्ब। नाक्दो नाक्त दुम्ब” दे लोव्र पवा बाक्त। येरमीया ३३:२०, २५

## 9

### परमप्रभुमी आसीक गेशो

1 मिनु परमप्रभुमी नोआह नु आ तौ आन कली आसीक गेमी बाक्त। मेकोमी “तमी तौ थिशा, सोशा बोशा शुश दुमीन। रागी प्रिंदीने। उत्पत्ती १:२८

2 रागी डा जन्तु नेल्ल, सरीडम बेरब चिक्ब, खपीम गेशा गाक्ब आइक्च जन्तु नु समुन्द्र डा डांइ नेल्ल, इन कली तशा, हिंचा माल्नीम। मेको आन कली इन गुइमी गेता।

3 डोंइती इन कली गिगी खाइ ब्वचा गेता। मुल गो ब्रोंइशा बाक्ब जन्तु नेल्ल इन कली ब्वचा गेतन्नी। उत्पत्ती १:२९; कलस्सी २:१६

4 क्योरशा हुश मचुइक्थु चहिं मब्बने। मारदे हना हुशेमी ब्रोंइतीक सोक्त बाक्ब।

5 मुरुमी मुर कली साइक्तु हना, जन्तुमी मुर कली साइक्तु हना, मेको यो साइक्चा पुंइसीब। मुरुमी आ लोक्ब साइक्तु हना, मेको यो साइक्चा पुंइसीब। लेवी ३:१७; लेवी १७:१०-१४; ब्यवस्था १२:२३

6 सु सुमी मुर साइशशा हुश जारबा, मेको यो मोपान साइशशा, हुश जारचा पुंइसीब। मारदे हना गो मुर कली आं खोदेशो पा सेल्ला।

प्रस्थान २१:१२; लेवी २४:१७; गन्ती ३५:३३; मत्ती २६:५२; रोमी १३:४; प्रकाश १३:१०

7 गे रागीम सोशा बोशा शुश दुमीने” दे परमप्रभुमी नोआह कली देंमाक्त।

### परमप्रभुमी कबल पशो

8 मिनु नोले परमप्रभुमी नोआह नु आ तौ आन कली

9 “नेनीन, गे नु इन नोले डा चच युइ नु आं कबल पाइनुड। उत्पत्ती ६:१८

10 डोंगामी ब्रोंइशा बाक्ब चिक्ब, बी ब्यफ, रागी डा जन्तु गे नु डोंगा रे गूशो नेल्ल नु आं कबल पाइनुड। होसे २:२०

11 गो मार कबल पाइनुड देशा हना, ब्रोंइशा बाक्ब नेल्ल आन कली ब्वाक्कुम मसाइक्नुड। रागी बिग्रेचा कली गेनायो ब्वाक्कु मबारपाइक्नुड” देंमाक्त।

12 मिनु परमप्रभुमी “गे नु गे नु ब्रोंइशा बाक्ब नेल्ल इन कली आं कबल पतीके चिनु का गेनुड। मेको इन नोले डा पाला नेल्ल आन कली यो बाक्ब।

13 गो गोस्सुमी आं वाक्श वोइक्नुड। मेको गो रागी नु कबल पशो आ चिनु बाक्ब।

14 मिनु गो रागी तारी गोस्स सोइक्तुनु, मेको गोस्सुमी आं वाक्श तांइसीब।

15 मिनु गो गे नु मारेइ मारेइ ब्रोंइशा बाक्ब नु कबल पाता, दे मिम्नुड। गो गेनायो ब्रोंइशा बाक्ब नेल्ल आन कली ब्वाक्कुमी मसाइक्नुडमी। यसैया ५४:७-१०

16 मेको वाक्श गोस्सुम बाक्मेनु, गो मेको कली ताइनुड। मिनु गो रागीम बाक्ब मुर नु ब्रोंइशा बाक्ब नेल्ल नु गेना हना यो लीब कबल पाता, दे मिम्नुड” देंमाक्त।

17 मिनु परमप्रभुमी नोआह कली “मेको वाक्श कबल आ चिनु बाक्ब। गो गे नु रागीम ब्रोंइशा बाक्ब नेल्ल नु कबल पाता” देंमाक्त।

18 डोंगा रे गूशो नोआह आ तौपुकी शेम, हाम नु यफेथ बाक्मा बाक्त। हाम चहिं कनान आ आफ बाक्माक्त। उत्पत्ती ५:३२

19 मेको सांफा नोआह आ तौ बाक्मा बाक्त। मेको रे रागी नेल्ल ब्रीमा बाक्त।

### नोआहम अडगुर रू सेल्शो

20 मिनु नोआह रूमी गेय पाइब दुम्शा, अडगुर रू सेला बाक्त। मेको नेल्ल क्येडा डोंइती अडगुर खुम्ब मुर दुम्माक्त।

21 मिनु अडगुर शांबु तूशा दुक्शा, आ ताम्बुमी शिश्रा इम्माक्त।

22 मिनु कनान आ आफ हाममी आ आफ शिश्रा तशा, लाडगामी बाक्शो आ लोकब आस कली देंमाक्त। प्रस्थान २०:१२; हितोपदेस ३०:१७

23 मेको नेंशा, शेम नु यफेथम वा का सुर सुरम ग्याइशशा लाप्शा, नोले रे ग्रेना ग्रेन लशा, आस आफ आ ताम्बु ओव्रसा बाक्त। मिनु आस आफ आ भेत्रे रां सुम्से बाक्त। नोले रे ग्रेशा, आस आफ आ शिश्रा रां मताम्से बाक्त।

24 मिनु नोले नोआह आ दुक्शो रे सेंसे बाक्त। आ चचमी आ कली मार पवा, नेल्ल तुइक्ता बाक्त।

25 मिनु नोआहमी “कनान सराप रल। आ लोकब आस नेल्ल क्येडा आइक्च वाइल दुम्ल” दे सराप पवा बाक्त।

26 मिनु मेकोमी लेंशा “परमप्रभु, शेम आ परमप्रभु यावे ठेयब बाक्ब। कनान मेको आ नेल्ल क्येडा आइक्च वाइल दुम्ल” दे शेम कली आसीक गेवा बाक्त।

27 मिनु लेंशा “परमप्रभुमी यफेथ कली ‘सोशा बोशा शुश दुम्पदल। मेको शेम आ ताम्बुम बाक्चा तवल। कनान चहिं मेको आ वाइल दुम्ल’ ” दे लोव्र पवा बाक्त।

28 मिनु ठेयब ब्वाक्कु बारशा नोले, नोआह सहे सां ५० बर्स ब्रोंइमाक्त।

29 मिनु नोआह नेल्ल पा ९ सहे ५० बर्स ब्रोंइशा बेक्माक्त।



# 10

रागी नेल्ल डा मुर

१इतिहास १:५-२३

1 ब्वाक्कु बारम नोले नोआह आ तौपुकी शेम, हाम नु यफेथमी तौपुकी थीमा बाक्त। नोआह आ तौ आन चच युइ सु सु बाक्मा बाक्त देंशा हना,

यफेथ आ चच युइ

2 यफेथ आ तौ गोमेर, मागोग, मादै, यावान, तूबल, मेशेक नु तिरास बाक्मा बाक्त। इजीकीएल २७:१३-२२; इजीकीएल ३८:२; इजीकीएल ३९:१,६

3 गोमेर आ तौपुकी अश्केनज, रीफत नु तोगारमाह बाक्मा बाक्त।

4 यावान आ तौपुकी एलीशाह, कित्तीम, टारशीश नु दोदानीम बाक्मा बाक्त।

5 मेको मुरपुकी रे समुन्द्र आ नेक्था बाक्ब जरमेशो बाक्मा बाक्त। मेकोपुकी यफेथ आ चच युइ बाक्मा बाक्त। मेकोपुकी आंम रागीम बाक्शो बाक्मा बाक्त। मिनु आंम रागी रागीमी, आंम खिं खिं डा मुरुमी आंम लोत्र ब्वाक्मा बाक्त।

हाम आ चच युइ

6 हाम आ तौपुकी कूश, इजीप्त, पूत नु कनान बाक्मा बाक्त।

7 कूश आ तौपुकी शेबा, हवीलाह, साब्ताह, रामाह नु साब्तेका बाक्मा बाक्त। रामाह आ तौ निक्शी शेबा नु देदान बाक्सा बाक्त।

निम्रोद सक्ति पाइश्शो दुम्शो

8 मिनु कूशमी निम्रोद यो थिमाक्त। मेको बोल्यो नु सक्ति पाइश्शो मुर दुम्माक्त।

9 मेको परमप्रभु यावे आ डोंइती सक्ति पाइश्शो सिखारी बाक्माक्त। मोपतीके मुरुमी बोल्यो मुर का तशा “परमप्रभु यावे

आ डोंइती निम्रोद खोदेशो सक्ति पाइशशो सिखारी बाक्बाक्त” दे देंतीके देंमा बाक्त। मत्ती ५:५

10 मिनु आ डोंइती डा राज्य बेबीलोन बाक्माक्त। अरु एरेक नु अक्कद सहर बाक्मा बाक्त। मेको नेल्ल शिनार रागीम बाक्बाक्मा बाक्त।

11 निम्रोद मेको रागी रे अस्सुर जाक्शा, निनवे, रेहोबोथ-इर नु कालाह सहर सेला बाक्त।

12 निनवे नु कालाह सहर आस दातेमी रेसेन सहर सेला बाक्त। मेको ठेयब सहर बाक्माक्त।

13 इजीप्त, लूदीम, अनामीम, लेहाबीम, नफतुहीम,

14 पथ्रुसीम, कस्लुहीम नु काफतोरीम आन आफ दुम्माक्त। मेकोपुकी रे पलिस्ती गूमा बाक्त।

15 मिनु कनानमी आ डोंइती डा तौ सीदोन नु नोले हेथ थिमाक्त।

16 मिनु नोले यबुसी, एमोरी, गिरगाशी,

17 हिव्वी, अरकी, सिनी,

18 अरवादी, सेमारी नु हमार्थी थिमाक्त। नोले कनान रागी डा मुर शुश दुम्मा बाक्त।

19 कनान डा मुर आन रागी सीदोन रे गेरार गे नु गाजा सम्म दुम्माक्त। सोदोम नु गोमोररा गे अदमाह, सेबोयीम नु लाशा सहर सम्म दुम्माक्त।

20 मिनु हाम आ चच युइ आन खिं खिं डा मुर आन लोत्र, आन रू नु आन रागी बाक्मा बाक्त।

### शेम आ चच युइ

21 शेम यफेथ आ लोकबमी यो तौपुकी थिमाक्त। शेम एबेर आ आल आन किकी पिपी बाक्माक्त। उत्पत्ती ११:१०

22 शेम आ तौ चच युइ सु सु बाक्मा बाक्त देंशा हना, एलाम, अश्शुर, अरपक्शाद, लूद नु अराम बाक्मा बाक्त।

23 अराम आ तौपुकी ऊज, हुल, गेथेर नु माश बाक्मा बाक्त। उत्पत्ती २२:२१

24 मिनु अरपक्शाद शेलाह आ आफ दुम्माक्त। शेलाह एबेर आ आफ दुम्माक्त।

25 एबेरमी तौ निक्शी थिमाक्त। का आ नें पेलेग बाक्माक्त। मारदे हना मेना रागी योक्शो बाक्माक्त। पेलेग नें आ अर्थ भाग का बाक्माक्त। अर्को आ नें योकतन बाक्माक्त। उत्पत्ती ११:८-९; ब्यवस्था ३२:८

26 मिनु योकतनमी अल्मोदाद, शेलेफ, हासार-मावेथ येराह

27 हदोराम, उजाल, दिकलाह,

28 ओबाल, अबीमा-एल, शेबा,

29 ओफीर, हवीलाह नु योबाब आन आफ दुम्माक्त। मेको नेल्ल योकतन आ तौ बाक्मा बाक्त।

30 मिनु आन बाक्तीक मेशा रे पूर्व डा सेफार माइशो पहाड सम्म दुम्माक्त।

31 मिनु शेम आ चच युइ आन खिं खिं डा मुर आन लोत्र, आन रू नु आन रागी बाक्मा बाक्त।

32 मिनु मेको नोआह आ तौ नेल्ल आन खिं खिं डा मुर, आन चच युइ, आन आन रागी बाक्मा बाक्त। ब्वाक्कु बारशा नोले मेकोपुकी रे रागी नेल्ल ब्रीमा बाक्त।

## 11

बाबेल सहर डा लाइशो खिं

1 डोइती रागी नेल्ल डा मुर लोत्र का ब्वाक्बाक्मा बाक्त।

2 मुरपुकी पूर्व गे लना लन बाक्मानु, शिनार नें पाइशो रागीम ठेयब दिंम का थित्मे बाक्त। मिनु मेकेर खिं सेल्शा बाक्मा बाक्त।

3 मिनु मुरपुकीमी “लो, इंटा सेल्य। मिनु मीमी रिम्शो पा चोय” देंमा बाक्त। मिनु फुल्लु आ पा डा इंटा नु हिलो आ पा डा अल्कत्रा गुंइदमे बाक्त।

4 मिनु नोले मेकोपुकीमी “गोपुकी इं कली सहर का सेल्सीय, ठेयब लाइशो सरीड थिचा डा खिं का सेल्य। इं नें ठेयब सेल्सीशा, इं मुरपुकी रागी नेल्लेमी मब्राथु बाक्य” देंमुमा बाक्त।

5 मिनु परमप्रभु यावे मेको मुरपुकीमी सेल्शो सहर नु सरीड थिचशो ठेयब लाइश्शो खिं कोव्रथ यिमाक्त। उत्पत्ती १८:२१; भजन संग्रह १४:२

6 मिनु परमप्रभु यावेमी “लो, मेको नेल्ल थुं का डा मुर नमी। मेको नेल्ल लोव्र का ब्वाक्नीम। मेको आन नक गोशो गेय ला बाक्ब। मार मार मिम्त्मे, मेको नेल्ल पने चाप्नीम। प्रेरित २:१-११

7 मुल उइ लय। मेको आन पशो लोव्र खाल्शा पपाइय्य। मिनु कामी अर्को आ लोव्र मरुबल” देंमाक्त।

8 मोपा परमप्रभु यावेमी मुर आन कली नेल्ल रागीम फ्रादीमी बाक्त। मिनु मेकोपुकीमी सहर सेल्चा प्रोन्मे बाक्त। ब्यवस्था ३२:८; लूका १:५१

9 मोपतीके मेको सहर आ नें बाबेल वोदमे बाक्त। मारदे हना मेकेर रे परमप्रभु यावेमी रागी नेल्ल डा मुर आन लोव्र खाल्दा बाक्त। मिनु परमप्रभु यावेमी मोपा मुर नेल्ल आन कली फ्रादीमी बाक्त।

### शेम आ चच युइ

10 शेम आ आ चच युइ सु सु बाक्मा बाक्त देंशा हना, शेम सहे का बर्स दुम्मेनु, अरपक्शाद आ आफ दुम्माक्त। मेना ब्वाक्कु बारशा सोव्रशो बर्स निक्शी दुम्शो बाक्माक्त। १इतिहास १:२४-२७; लूका ३:३४-३६; उत्पत्ती १०:२१-२२

11 मिनु शेम अरपक्शाद थिशा नोले ५ सहे बर्स ब्रोंइमाक्त। अरु तमी तौ यो थिमाक्त।

12 मिनु अरपक्शाद ३५ बर्स दुम्मेनु, शेलाह आ आफ दुम्माक्त।।

13 मिनु शेलाह थिशा नोले ४ सहे बर्स सां ब्रोंइमाक्त। अरु तमी तौ यो थिमाक्त।

14 मिनु शेलाह ३० बर्स दुम्मेनु, एबेर थिमाक्त।

15 मिनु शेलाह एबेर थिशा नोले ४ सहे बर्स सां ब्रोंइमाक्त। अरु तमी तौ यो थिमाक्त।

16 मिनु एबेर ३४ बर्स दुम्मेनु, पेलेग आ आफ दुम्माक्त।

17 मिनु एबेर पेलेग थिशा नोले ४ सहे ३० बर्स ब्रोंइमाक्त। अरु तमी तौ यो थिमाक्त।

18 मिनु पेलेग ३० बर्स दुम्मेनु, रेऊ आ आफ दुम्माक्त।

19 मिनु पेलेग रेऊ थिशा नोले सहे निक्शी ९ बर्स ब्रोंइमाक्त। अरु तमी तौ यो थिमाक्त।

20 मिनु रेऊ ३२ बर्स दुम्मेनु, सेरूग आ आफ दुम्माक्त।

21 मिनु रेऊ सेरूग थिशा नोले, सहे निक्शी ७ बर्स ब्रोंइमाक्त। अरु तमी तौ यो थिमाक्त।

22 मिनु सेरूग ३० बर्स दुम्मेनु, नाहोर आ आफ दुम्माक्त।

23 मिनु सेरूग नाहोर थिशा नोले सहे निक्शी बर्स ब्रोंइमाक्त। अरु तमी तौ यो थिमाक्त।

24 मिनु नाहोर २९ बर्स दुम्मेनु, तेराह आ आफ दुम्माक्त।

25 मिनु नाहोर तेराह थिशा नोले सहे का १९ बर्स ब्रोंइमाक्त। अरु तमी तौ यो थिमाक्त।

26 मिनु तेराह ७० बर्स दुम्मेनु, अब्राम, नाहोर नु हारान आन आफ दुम्माक्त।

### तेराह आ चच युइ

27 तेराह आ चच युइ सु सु बाक्मा बाक्त देंशा हना, तेराह अब्राम, नाहोर नु हारान आन आफ दुम्माक्त। हारानमी लोत थिमाक्त।

28 हारान चहिं आ आफ तेराह क्येडा डोंइती आ जरमेशो कल्दी डा ऊर सहरमी बेक्माक्त।

29 मिनु अब्राम नु नाहोर निम्फामी ग्युंभे पाम्से बाक्त। अब्राम आ मीश आ नें साराइ बाक्माक्त। नाहोर आ मीश आ नें मिल्का बाक्माक्त। मिल्का हारान आ तमी बाक्माक्त। हारान मिल्का नु यिस्का आस आफ बाक्माक्त। उत्पत्ती २२:२०

30 साराइ आल मथीब बाक्माक्त।

31 मिनु तेराहमी आ तौ अब्राम, आ चच लोत, हारान आ तौ, नु आ चाइमी, अब्राम आ मीश साराइ आन कली लाइशशा, कल्दी

रागी डा ऊर रे कनान रागी लचा गोव्रमे बाक्त। मिनु हारान माइशशो सहर जाक्दीशशा बाक्मा बाक्त। यहोसु २४:२; नेहेम्याह ९:७

32 तेराह सहे निक्शी ५ बर्स दुम्शा, हारान सहरम बेक्माक्त।

## 12

परमप्रभुमी अब्राम नु लोत्र पशो

1 मिनु परमप्रभु यावेमी अब्राम कली “इ रागी, इ खिं खिं डा मुर नु इ आफ आ खिं रे लावो। तेको रागी लचा माल्लेवे, गो इ कली कोंइनन। गन्ती २३:९; प्रेरित ७:३; हिब्रू ११:८

2 गो इ रे पा ठेयब जात डा मुर सेल्लुडमी। गो इ कली आसीक गेनन। इ ने ठेयब सेल्लुड। गो अर्को आन कली आसीक दुम्मेवे। उत्पत्ती २४:१, ३५; भजन संग्रह ७२:१७

3 सुमी इ कली आसीक गोवा, गो मेको कली आसीक गेनुड। सुम इ कली सराप पाइबा, गो मेको कली सराप पाइनुड। इ पबर्म रागी डा मुर नेल्ल आसीक ताइनीम” देंमाक्त। उत्पत्ती १८:१८; उत्पत्ती २२:१८; उत्पत्ती २६:४; उत्पत्ती २८:१४; प्रस्थान २३:२२; प्रेरित ३:२५; गलाती ३:८

अब्राममी परमप्रभु कली टिशो

4 मिनु अब्राम परमप्रभु यावे आ लोत्र नेंशा, हारान सहर रे गाक्माक्त। लोत यो अब्राम नु गाक्माक्त। हारान सहर रे गाक्मेनु, अब्राम ७५ बर्स, दुम्शो बाक्माक्त।

5 अब्राममी आ मीश साराइ, आ लोक्ब आ तौ, लोत, आन मारेइ मारेइ, हारान सहरमी ग्याप्शो वाइलीम वाइल आन कली यो लदा बाक्त। मिनु मेको नेल्ल कनान रागी लचा गोव्रमे बाक्त। मिनु लशा कनान रागी जाक्दीम्मा बाक्त।

परमप्रभुमी अब्राम कली रागी कोंइशो

6 मिनु अब्राम कनान रागी जाक्दीशशा, शेकेम सहर आ नेक्था मोरेह माइशशो मुर आ रवा आ नेक्था जाक्दीम्माक्त। मेना कनान

डा मुरपुकी रागीम बाक्शो बाक्मा बाक्त। उत्पत्ती ३५:४; यहोसु २४:२५-२६

7 मेकेर जाक्दीम्मेनु, परमप्रभु यावे अब्राम आ डोंइती गूशा, मेको कली “एको रागी इ चच युइ आन कली गेनुड” दे लोत्र गेवा बाक्त। मिनु अब्राममी “गो परमप्रभु यावे कली ताता” दे चढ़ेतीक का सेला बाक्त। उत्पत्ती १३:१५; उत्पत्ती १५:१८; उत्पत्ती १७:८; उत्पत्ती ३५:१२; प्रस्थान ६:४,८; प्रस्थान ३२:१३; यहोसु २१:४३; प्रेरित ७:५

8 मेकेर रे लशा, बेथेल सहर आ पूर्व गे डा डांडामी आ ताम्बु याक्शा कीडा बाक्त। बेथेल सहर पच्छिम गे नु ऐ सहर पूर्व गे बाक्शा, मेकेर यो परमप्रभु यावे कली चढ़ेतीक का सेल्शा, परमप्रभु यावे कली लोत्र पा ठेयब सेला बाक्त। उत्पत्ती ४:२६

अब्राम इजीप्त रागीम लशो

उत्पत्ती २०:१-१८; उत्पत्ती २६:७-११

9 मेकेर रे लशा, नेगेब माइश्शो रागी आ दक्खिन गे लमाक्त।

10 मिनु मेको रागीम अन्काल बाक्माक्त। मोपतीके मेकेर रे लशा, इजीप्त रागीम बाक्थ, लमाक्त। मारदे हना ठेयब अन्काल बाक्माक्त।

11 मिनु इजीप्त ओत्रचा क्येडा डोंइती अब्राममी आ मीश साराइ कली “नेनो, गे दारशो मीश मुर बाक्नेवे।

12 मिनु इजीप्त डा मुरुम इ कली तशा ‘मेको आ मीश बाक्ब’ दे आं कली साइक्नीम। इ कली चहिं ब्रोंइचा गेनीम।

13 मोपतीके ‘आ समी नड’ देनो। मिनु इ मो देंशो आ पर्बम गो साइक्चा मपुंडसीनुड, ब्रोंइचा ताइनुड” दे आ मीश कली मदा बाक्त।

साराइ कली लाइश्शो

14 मिनु अब्राम इजीप्त रागीम जाक्दीम्मेनु, इजीप्त डा मुरपुकीमी साराइ आ पर्बम “मेरे मीश मुर थम दारशो बाक्ब” देंमुमा बाक्त।

15 मिनु फाराओ माइशो पिप आ मुरपुकीमी साराइ कली तशा “थम दारशो मीश मुर का ताइतक” दे मदमे बाक्त। मिनु साराइ कली फाराओ आ खिं लदमे बाक्त।

16 मिनु साराइ आ पर्बम अब्राम भेडा, ब्यफ, गधा, वाइलीम वाइल नु दलओंठ मारेइ मारेइ गेचा पुंइसे बाक्त।

17 तन्न परमप्रभु यावेमी फाराओ नु आ खिं डा मुर आन कली अब्राम आ मीश साराइ आ पर्बम ठेयब श्येत गेवा बाक्त।

18 मिनु फाराओमी अब्राम कली ब्रेशा “गे आं कली मार पवी? मारदे ‘इ मीश बाक्ब’ मदेने?

19 मारदे ‘आं समी बाक्ब’ देने? गो हेरा आं मीश सेल्ला। मुल इ मीश लतो। एकेर रे लावो” दे मदा बाक्त।

20 फाराओमी मेको लोत्र आ मुर आन कली माइशशा, अब्राम, आ मीश नु आ नु बाक्ब नेल्ल आन कली मेकेर रे सोइक्तमे बाक्त।

## 13

अब्राम नु लोत ब्राशो

1 मिनु अब्राम, आ मीश, आ मारेइ मारेइ नेल्ल नु लोत यो लाइशशा इजीप्त रे नेगेब रागी लमाक्त।

2 अब्राम शुश बी ब्यफ क्यारश भेडा नु सुन चांदी पाइशो मुर बाक्माक्त।

3 मिनु दक्खिन डा नेगेब रे लशा, बेथेल सहर जाक्दीम्माक्त। मेकेर बेथेल सहर नु ऐ सहर आस दातेमी डोंइती आ ताम्बु कीतीकेम जाक्दीम्माक्त।

4 मिनु इजीप्त लचा क्येडा डोंइती मेकेर सेल्लो चढ़ेतीकेमी लेशशा जाक्दीशशा, परमप्रभु यावे कली लोत्र पा, ठेयब सेला बाक्त। उत्पत्ती १२:८

5 मिनु लोत के यो क्यारश भेडा, बी ब्यफ नु ताम्बु शुश बाक्माक्त।

6 मिनु अब्राम नु लोत आस मारेइ मारेइ शुश दुम्तीके मेको निक्शी काथा बाक्ने मचाप्से बाक्त।



7 मिनु अब्राम आ गोठलापुकी लोत आ गोठलापुकी नु जीमे बाक्त। मेना मेको रागीम कनानी नु परिज्जीपुकी बाक्मा बाक्त।

8 मिनु अब्राममी लोत कली “गो पोबु नस। जिचा मदुम्ब। इ गोठलापुकी नु आं गोठलापुकी यो जिचा मदुम।

9 गे नु गो ब्राचा रिम्शो दुम्ब। एको रागी नेल्ल इ डोंइती बाक्ब। गे पेरा गे लते हना, गो ग्युरा गे लाइनुड। गे ग्युरा गे लते हना, गो पेरा गे लाइनुड” देंमाक्त।

10 मिनु लोतमी यर्दन खोला आ नेक्था ब्वाक्कु बाक्शो रिम्शो दिंम तवा बाक्त। मेको परमप्रभु यावे आ रू नु इजीप्त रागी खोदेशो दारशो तांइसे बाक्त। सोआर सहर सम्म मोदेशो दारशो तांइसे बाक्त। परमप्रभु यावेम सोदोम नु गोमोररा सहर मीम जेप्पाइक्चा क्येडा डोंइती मेकेर थाम्पा दारशो बाक्माक्त। उत्पत्ती २:८-१०

11 मिनु लोत यर्दन खोला डा दिंम योव्रशा, पूर्ब गे लमाक्त। मोपा लोत नु अब्राम ब्रासा बाक्त।

12 मिनु अब्राम कनान रागीम बाक्शो बाक्माक्त। लोत चहिं यर्दन खोला डा दिंमम बाक्शो सहर आन नेक्था बाक्शा, आ ताम्बु याक्ना याक्न सोदोम सहर सम्म जाक्दीम्माक्त।

13 सोदोम सहर डा मुरपुकी थम मरिम्शो बाक्मा बाक्त। मेकोपुकीमी परमप्रभु यावे आ डोंइती शुश मरिम्शो पामे बाक्त। उत्पत्ती १८:२०; उत्पत्ती १९:४-९

### परमप्रभुम अब्राम कली लोव्र गेशो

14 लोत नु अब्राम ब्रासा नोले परमप्रभु यावेमी अब्राम कली “इ बाक्तीके रे पूर्ब, पच्छिम, उत्तर, दक्खिन गे कोव्रडो।

15 गे तेको तेको रागी ताइनेवे, मेकोन इ कली नु इ चच युइ आन कली गेना हना यो कली गेनुड। उत्पत्ती १२:७

16 गो इ चच युइ खप डा फुरक खोदेशो पा शुश सेल्लुड। मुरुम फुरक हिक्ने चाप्तेक्म हना ला, इ चच युइ आन कली यो हिक्ने

चाप्नीम। तन्न मचाप्नीम। उत्पत्ती २८:१४; गन्ती २३:१०; १राजा ४:२०

17 बोक्को, रागी नेल्ल हिरशा लावो। मेको नेल्ल इ कली गेनन” दे परमप्रभु यावेमी लोत्र गोवा बाक्त।

18 मिनु अब्राममी आ ताम्बु याक्शा, हेब्रोन रागी डा माम्रे माइशो ब्वाकीम कीडा बाक्त। मिनु मेकेर परमप्रभु यावे कली चढ़ेतीक का सेला बाक्त। उत्पत्ती १४:१३-२४

## 14

### अब्राममी लोत कली प्रोइशो

1 मिनु शिनार डा पिप अम्राफेल, एल्लासार डा पिप अरयोक्, एलाम डा पिप केदोर-लाओमेर नु गोयीम रागी डा पिप तिदालम सासन पामे ना, यहोसु १२:२३

2 सोदोम डा पिप बेरा, गोमोररा डा पिप बिरशा, अदमाह डा पिप शिनाब नु सेबोयीम डा पिप शेमेबेर, बेला सहर डा पिप नु लडाइ पामे बाक्त। बेला सहर कली सोआर यो देंनीम। उत्पत्ती १९:२४

3 मेको नेल्ल सिददीम दिंममी लडाइ पथ खुम्सीशो बाक्मा बाक्त।

4 मारदे हना मेकोपुकीमी लडाइ का ब्रुशा नोले, १२ बर्स सम्म श्येत जशा, पिप केदोर-लाओमेर कली मार मार गेचा माल्मा बाक्त। मोपतीके मेकोपुकीम १३ बर्समी “मगेय, लडाइ पय” दे सल्ला पामे बाक्त।

5 मिनु १४ बर्समी पिप केदोर-लाओमेर नु मेको आ वारच पिपपुकी अशतारोथ-कारनाइमम बाक्ब रेफाइमपुकी, हामम बाक्ब जूजीमपुकी, शावेह-किरयथ-थाइम बाक्ब एमीमपुकी, उत्पत्ती ३६:२०-३०

6 सेइर पहाडम बाक्ब होरी आ मुर नेल्ल आन कली एल-पारान मुर बाक्तीक आ नेक्था सम्म फ्रूमे बाक्त।

7 मेको ग्राब पिप आन लां लेशशा, एन-मिशपात जाक्शा, हासासोन-तामारम बाक्ब अमालेकी नु एमोरी आन कली फ्रूमे बाक्त। एन-मिशपात कली कादेश यो देंनीम।

8 मेना सोदोम डा पिप, गोमोररा डा पिप, अदमाह डा पिप, सेबोयीम डा पिप नु बेला डा पिप सल्ला पशा, बेला सहर कली सोआर यो देंनीम

9 सिददीम दिंममी एलाम डा पिप केदोर-लाओमेर गोयीम रागी डा पिप तिदाल, शिनार डा पिप अम्राफेल नु एल्लासार डा पिप अरयोक् नु लडाइ पथ जाक्मा बाक्त। ४ जना पिपपुकीम ५ जना पिप नु लडाइ पशो बाक्मा बाक्त।

10 मिनु सिददीम डा दिंममी अल्कत्रा खाल्टा शुश बाक्मा बाक्त। मिनु सोदोम नु गोमोररा डा पिप प्रोक्शा, खाल्टा आगा दोक्सा बाक्त। लीशो मुरपुकी चहिं पहाड गे प्रोक्मा बाक्त।

11 मिनु केदोर-लाओमेर नु आ हुलमी सोदोम नु गोमोररा सहर डा मुर नु आन मार मार नेल्ल रोइशशा लदमे बाक्त।

12 मिनु मेकोपुकीमी सोदोम सहरम बाक्शो अब्राम आ लोकब आ तौ लोत नु आ मारेइ मारेइ नेल्ल यो लाइशशा लमा बाक्त। उत्पत्ती १३:१०-१२

13 मिनु पहाडम प्रोक्शो मुर कामी हिब्रू अब्राम कली मेको लोत्र शेंदा बाक्त। अब्राम चहिं एमोरी माम्रे आ व्वाकीम बाक्शो बाक्माक्त। माम्रे एशकोल नु आनेर वोबु बाक्सा बाक्त। मेको अब्राम कली वारच पाइब बाक्मा बाक्त।

14 मिनु अब्राममी आ लोकब आ तौ ग्याइशशो नेंशा, आ खिंमी जरमेशो सहे सां १८ जना लडाइ पचा कली शेंसीशो मुर कली या गेशा, ठीक पवा बाक्त। मिनु मेकोपुकीमी रोइक्ब आन कली दान सहर सम्म खेदा पामे बाक्त। यहोसु १९:४७; न्यायाधीस १८:२९

15 नाक्दोमी अब्राममी आ मुर आन कली हुल निक्शी पशा, रोइक्बपुकी नु लडाइ पशा ग्राशा, होबाह सम्म खेदा पामे बाक्त। होबाह दमस्कस सहर आ उत्तर गे बाक्ब।

16 मोदेशो पा अब्राममी सोदोम नु गोमोररा रे रोइशशा मारेइ मारेइ नु आ लोक्ब आ तौ लोत आ मारेइ मारेइ नेल्ल, मीश मुर नेल्ल नु मेको निक्शी सहर डा मुर नेल्ल लेप्पदा बाक्त।

### मेल्लीसेदेक नु अब्राम

17 मोपा अब्राम केदोर-लाओमेर नु आ वारच पिपपुकी नु लडाइ पशा ग्राशा, लेशशा नोले सोदोम डा पिप शावेह माइशशो दिंमम जाक्शा, अब्राम कली गुम्थ जाक्माक्त। शावेह माइशशो दिंम कली पिप आन दिंम यो देंनीम। हिब्रू ७:१-४

18 मिनु सालेम डा पिप मेल्लीसेदेकम अब्राम नु आ मुर आन कली शोब्ले नु अडगुर शांबु चाक्गा बाक्त। मेको नेल्ल क्येडा ठेयब परमप्रभु कली चढेब बाक्माक्त। भजन संग्रह ११०:४; भजन संग्रह ७६:३

19 मिनु मेकोमी अब्राम कली आसीक गेशा “सरीड नु रागी सेल्ब नेल्ल क्येडा ठेयब परमप्रभु आ आसीक इ कली रल।

20 मिनु नेल्ल क्येडा ठेयब परमप्रभु मान ताइब बाक्ब। मारदे हना इ जोरी सत्रु इ गुइमी गेशा, इ कली ग्रापाइक्तु” दे ठेयब सेला बाक्त। मिनु अब्राममी नेल्ल थोत्रक १० भाग डा भाग का मेल्लीसेदेक कली गेवा बाक्त। उत्पत्ती २८:२२; लेवी २७:३०-३२

21 मिनु सोदोम डा पिपमी अब्राम कली “मुर ला गेयी। अरु मार मार इन कली दुम्ल” देंमाक्त।

22 मिनु अब्राममी सोदोम डा पिप कली “गो आं गुइ परमप्रभु यावे, नेल्ल क्येडा ठेयब सरीड नु रागी सेल्ब परमप्रभु गे पोक्शा कसम जाता।

23 गो इन के मारेइ मलाइक्नुड। श्येले का, जुत्ता आ डोरी का यो मलाइक्नुड। मिनु गेमी ‘गो अब्राम कली शुश शॉप पाइशशो सेल्ता’ दे गेनायो देंने मचाप्नीनी।

24 आं गेय पाइब आन जशो चहिं लाइक्नुड। गो नु गाक्ब आनेर, एशकोल नु माप्ने आन भाग चहिं लाइक्चा गेन” देंमाक्त।

# 15

अब्राम आ आल  
उत्पत्ती १७:-

1 मिनु नोले परमप्रभु यावेमी अब्राम कली डोमु खोदेशो पा कोंइतीक कोंइदा बाक्त। मिनु मेकोमी अब्राम आ नें थिशा “अब्राम महिनो। गो इ कली कोव्रनन। शुश आसीक गेनन” देंमाक्त। गन्ती २४:४,१६; भजन संग्रह ३:४

2 तन्न अब्राममी “आं कली मार गेनीनी डा? आं के आल मबाक्नीम। आ अडस ताइब दमस्कस डा एलीएजर दुम्ब।

3 गे आं कली तमी तौ मगेयीनी। मुल आं खिंम जरमेशो वाइलम आं अडस ताइब दुम्त” देंमाक्त।

4 मिनु परमप्रभु यावेमी लेंशा “मेको मुरुम इ अडस मताइब। इ आंम रां डा इ तौमी इ अडस ताइब” देंमाक्त।

5 मिनु मेकोमी अब्राम कली ताम्बु रे गुंडशा “सरीड गे कोव्रडो, सोरुल आन कली हिकको। मेको हिकने चाप्नेवे? गिश बाक्मा, इ चच युइ यो मिश दुम्नीम” देंमाक्त। उत्पत्ती २२:१७; प्रस्थान ३२:१३; ब्यवस्था १:१०; हिब्रू ११:१२

6 मिनु अब्राममी परमप्रभु यावे आ लोव्र थमा सुदा बाक्त। मिनु परमप्रभु यावेमी अब्राममी थमा सुइशो तशा “ठीक पाइब मुर का बाक्त” दे तुइक्ता बाक्त। रोमी ४:३-५; याकूब २:२३

7 मिनु लेंशा अब्राम कली “गो परमप्रभु यावे नड। गो एको रागी इ कली गेचा कली कल्दी डा ऊर सहर रे गुंडताक्न” देंमाक्त। उत्पत्ती ११:३१; प्रस्थान ३:१४; यसैया ४५:५; यूहन्ना ८:२४-२९

8 मिनु अब्राममी “परमप्रभु, परमप्रभु यावे, आं के रागी दुम्ब, दे दोपा तुइक्नुडा डा?” दे हिल्लो पवा बाक्त।

9 मिनु मेकोमी “आं कली बर्स सां डा बी का, बर्स सां डा क्यारश का, बर्स सां डा सांड का, दुकुर का परवा आ चाइक्ब का चाक्ती” देंमाक्त।

10 मिनु अब्राममी मेको नेल्ल चाक्शा क्योरशा, फेके पा रिक्शा, फेके का एर गे, फेके का ओंथ गे पा वोदा बाक्त। ढुकुर नु परवा चहिं फेके मसेला बाक्त, येरमीया ३४:१८-१९

11 मिनु ठेयब चिक्बपुकी मेको श्ये तशा, जुक्तमे बाक्त। तन्न अब्राममी “हाइ हाइ” दे ग्रीशा खेरमी बाक्त।

### परमप्रभुमी कबल पशो

12 मिनु नां रिक्चावानु, अब्राम मारेइ मतुइक्चा डा पा निन्द्रा पवा बाक्त। मिनु शुश हिंचा माल्शो आ एर ओंथ नेल्ल छिडछिड दुम्माक्त। उत्पत्ती २:२१; १सामुएल २६:१२; यसैया २९:१०

13 मिनु मेकोमी अब्राम कली “इ तौ चच युइ अर्को रागीमी अर्को रागी डा मुर दुम्नीम। मेकेर बाक्मानु, वाइलीम वाइल यो दुम्नीम। मेकेर ४ सहे बर्स सम्म श्येत जाइनीम। प्रस्थान १:१३; प्रस्थान १२:४०; प्रेरित ७:६

14 गो चहिं मेको आन बाक्शो रागी डा मुर आन कली निसाफ पा सजाइ गेनुड। मारदे हना इ मुर आन कली वाइलीम वाइल सेल्नीम। मिनु नोले इ मुरपुकीम मेको आन मारेइ मारेइ लाइशशा, मेको रागी रे गूशा लाइनीम। प्रस्थान ३:२१-२२; प्रेरित ७:७

15 गे चहिं थुं नाइशशा इ किकी पिपी आन बाक्तीक लाइनेवे। शुश बर्स दुम्शा बेक्नेवे। उत्पत्ती २५:७-८

16 इ मुरपुकी ४ पाला नोले ला एकेर लेशशा जाक्नीम। मारदे हना एमोरी आन मरिम्शो पशो मनुप्शो बाक्त” दे परमप्रभु यावेमी देंमाक्त। प्रेरित ७:७

17 मिनु नां रिक्शा, छिडछिड दुम्शा नोले मी ब्रशो चुप्लु का गूमाक्त। मिनु ब्रशो तोव्रशी का मेको श्ये आ एर ओंथ गाक्माक्त। प्रस्थान १९:१८

18 मेको नाक्ती परमप्रभु यावेमी अब्राम नु कबल पशा “मेको रागी इ चच युइ आन कली गेनुड। मेको इजीप्त डा ठेयब खोला रे युफ्रेटीस सम्म बाक्ब। उत्पत्ती १२:७; १राजा ८:६५; १राजा ५:१

- 19 मेकेर बाक्बपुकी केनी, केनीज्जी, कादमोनी,  
 20 हित्ती, परिज्जी, फाइम,  
 21 एमोरी, कनानी, गिरगाशी नु यबुसी आन रागी नेल्ल इ कली  
 गेनुड” दे अब्राम कली लोव्र गेशा, कबल पवा बाक्त।

## 16

हागार नु इश्माएल

उत्पत्ती २१:९-२१

1 अब्राम आ मीश साराइ आल मथीब बाक्माक्त। मिनु साराइ नु इजीप्त डा वाइलीम का बाक्माक्त। मेको आ नें हागार बाक्माक्त।

2 मिनु साराइमी अब्राम कली “नेनीन, परमप्रभु यावेमी आं कली आल मगेयी। मोपतीके आं वाइलीम नु बाक्कीन। मोपा गो आल ताइनुडा, कों?” देंमाक्त। मिनु अब्राममी आ मीशेमी मार देंमे, मेको पवा बाक्त। उत्पत्ती ३०:३,९

3 मिनु अब्राम कनान रागीम १० बर्स बाक्म नोले, आ मीश साराइमी आ इजीप्त डा वाइलीम हागार लाइशशा, आ वोंइश कली गेवा बाक्त।

4 मिनु अब्राम हागार नु इम्माक्त। मिनु हागार कोव्रज कुरशो दुम्माक्त। मेको तुइशशा, ठेयब लेशशो दुम्शा, आ होव्रपोक्म कली मटिवा बाक्त।

5 मिनु साराइमी अब्राम कली “आं कली मरिम्शो दुम्तीके इन कली दुम्ल। गो आं वाइलीम इन कली गेता। मुल आंम कली कोव्रज कुरशो तशा, आं कली आइक्च सेलती। परमप्रभु यावेमी गे नु गो, इस दातेम निसाफ पवल” देंमाक्त।

6 मिनु अब्राममी “नेनो, इ वाइलीम इ गुइमी बाक्ब। मेको कली इ दाक्शो पावो” दे साराइ कली देंमाक्त। मिनु साराइमी हागार कली हुइक्तानु, मेको प्रोक्माक्त।

हागार प्रोक्शो

7 मिनु परमप्रभु यावे आ स्वर्ग डा गेय पाइबमी हागार कली गोरशो रागी शुर लतीक लां डा ब्वाक्कु बुक्तीके आ नेक्था थिदा बाक्त। प्रस्थान १४:१९; प्रस्थान २३:२०; गन्ती २२:२२; १राजा १९:७; १राजा १९:७; २राजा १९:३५

8 मिनु मेकोमी “हागार, साराइ आ वाइलीम, ते लशा पिनी?” दे हिल्लो पवा बाक्त। मिनु हागारमी “आं होत्रपोक्म साराइ आ डोंइती रे प्रोक्ती” दे लोत्र लेत्ता बाक्त।

9 मिनु परमप्रभु यावे आ स्वर्ग डा गेय पाइबमी मेको कली “इ होत्रपोक्म आ खिं लेतो। मिनु मेको आ अरेशो टिशा बाक्को” देंमाक्त।

10 मिनु परमप्रभु यावे आ स्वर्ग डा गेय पाइबमी लेंशा “इ चच युइ आन कली शुश दुम्पाइक्नुड। इ मुरपुकी सुइमी हिकने मचाप्चा डा पा शुश दुम्नीम” देंमाक्त। उत्पत्ती १७:२०

11 मिनु परमप्रभु यावे आ स्वर्ग डा गेय पाइबमी लेंशा “नेनो, गे कोत्रज कुरशो बाक्नेवे। तौ का थीनेवे। मेको कली इश्माएल नें वोइक्चा माल्नेवे। मारदे हना परमप्रभु यावेमी इ श्येत ताप्तु। प्रस्थान २:२३; अय्युब ३४:२८; भजन संग्रह ९:१३; यसैया ४१:१७; याकूब ५:४

12 इ तौ जीब दुम्ब। मुर नेल्ल नु जीब। मुरपुकी यो मेको नु जीनीम। मेको आ लोक्बपुकी नु यो जीब दुम्ब” देंमाक्त। उत्पत्ती २५:१८

13 मिनु हागारमी आ नु लोत्र पाइब परमप्रभु यावे कली “गे आं कली ताइब परमप्रभु ननी। गो थमा पा आं कली ताइब कली ताता” देंमाक्त। उत्पत्ती २२:१४; प्रस्थान ३:७; २राजा १३:४

14 मोपतीके मेको ब्वाक्कु बुक्तीक आ नें बेयर-लहाइ-रोइ वोदमे बाक्त। मेको कादेश नु बेरेद आस दातेम बाक्ब। उत्पत्ती २४:६२; उत्पत्ती २५:११

15 मिनु हागारम अब्राम के तौ का थिमाक्त। अब्रामम मेको कली इश्माएल नें वोदा बाक्त।

16 हागारम इश्माएल थिमेनु, अब्राम ८६ बर्स दुम्शो बाक्माक्त।



# 17

परमप्रभुमी अब्राम नु कबल पशो

1 मिनु अब्राम ९९ बर्स दुम्मेनु, परमप्रभु यावे अब्राम आ डोंडती गूशा, मेको कली “गो नेल्ल क्येडा सक्ति पाइशो परमप्रभु नड। गे, गो नु बाकशा, ठीक पाइब दुमो। उत्पत्ती ३५:११; प्रस्थान ६:३; ब्यवस्था १०:१२

2 मिनु गो गे नु आं कबल पाइनुड। गो इ मुर हिव्ने मचाप्चा डा पा शुश सेल्लुडमी” देंमाक्त।

3 मिनु अब्राम खुम्की पा बाम्माक्त। परमप्रभुमी मेको कली

4 “नेनो, मेको गो, गे नु आं कबल पतीके बाक्ब। गे शुश रागी डा मुर आन किकी पिपी दुम्नेवे।

5 मुल रे इ नें अब्राम देंचा मदुम्ब। इ नें अब्राहाम दुम्चा माल्ब। मारदे हना गो इ कली शुश रागी डा मुर आन किकी पिपी सेल्लतन। रोमी ४:११, १७

6 गो इ रे शुश मुर सेल्लुडमी, रागी रागी डा मुर सेल्लुड। इ रे पिपपुकी यो दुम्नीम।

7 मिनु गो गे नु लोत्र पा आं कबल पाइनुड। गो इ चच युइ नु यो आं कबल पाइनुड। मेको गेना हना यो लीब कबल बाक्ब। गो इ परमप्रभु नु इ चच युइ आन परमप्रभु नड।

8 मुल गे इ बाक्तीक रागीमी अर्को रागी डा मुर बाक्नेवे। नोले गो एको कनान रागी गेना हना यो इन कली नु इ चच युइ आन कली गेनन्नी। गो चहिं मेको आन परमप्रभु दुम्नुड” दे अब्राहाम कली देंमाक्त। उत्पत्ती ३५:२७; हिब्रू ११:९-१०; प्रेरित ७:५

9 मिनु परमप्रभुमी अब्राहाम कली “आं कबल पशो डा लोत्र नेल्ल टिवो। मिनु इ नोले इ चच युइपुकीमी नेल्ल पालामी यो आं कली मिम्शा, टिचा माल्नीम।

10 गे नु इ नोले डा तौ चच युइ आन पचा माल्शो कबल मार बाक्त देंशा हना, इ चारतीक डा कुशुल कुल पा खोइक्चा माल्नेवे।

गे नु इ चच युइ, वोंइश मुर नेल्ल कली कुशुल ख्रोइक्तीक चिनु ख्रोइक्चा माल्नीम। लेवी १२:३; यूहन्ना ७:२२

11 मेको गे नु गो इस कबल पशो आ चिनु बाक्ब। इजीकीएल २०:१२; ब्यवस्था ३०:६; रोमी ४:११

12 मुल रे इ पाला डा मुरुम आन तौ कली ८ नाक्ती दुम्मानु, ख्रोइक्तीक चिनु ख्रोइक्चा माल्नीम। इ ख्विम जरमेशो वोंइश आल, तेको तेको रागी रे ग्याप्शो इ वाइल नु आन तौ नेल्ल आन कली यो ख्रोइक्तीक चिनु ख्रोइक्चा माल्नीम।

13 इ ख्विम जरमेशो, इ चांदीम ग्याप्शो मुरपुकी कली यो ख्रोइक्तीक चिनु ख्रोइक्चा माल्नीम। मिनु आं कबल पशो डा चिनु इ रांम बाक्चा माल्ब। मेको गेना हना यो लीब कबल बाक्ब।

14 ख्रोइक्तीक चिनु मख्रोइश्शो वोंइश मुर नु वोंइश आल आन मुर आन दाते रे तिल्चा पुंडसीनीम। मारदे हना मेकोपुकीमी आं कबल पशो प्रोंइशो बाक्नीम” देंमाक्त।

15 मिनु परमप्रभुमी अब्राहाम कली “गे इ मीश कली ‘साराइ’ मदेंचा, मुल रे मेको कली ‘सारा’ नें वोइक्चा माल्नेवे।

16 गो मेको कली आसीक गेनुड। गो इ कली मेको रे तौ का गेनुड। मिनु सारा रागी रागी डा मुर नु जात जात डा मुर आन पिप आन ममा दुम्ब” दे परमप्रभुमी देंमाक्त। उत्पत्ती १२:२-३

17 मिनु अब्राहाममी खुम्की पा बाप्शा, रिश्शा “सहे का बर्स डा मुरुम आल थीबा? सारा ९० बर्स दुम्शा, आल थिने चाप्बा?” दे आंम कली देंमाक्त। उत्पत्ती १८:१२; उत्पत्ती २१:६; लूका १:१८; रोमी ४:१९-२१

18 मिनु अब्राहाममी परमप्रभु कली “इश्माएल इन डोंइती बाक्ल” देंमाक्त।

19 मिनु परमप्रभुमी “ममाइ, इ मीश सारामी थमा पा तौ का थीब। मेको आ नें इसहाक वोइक्चा माल्नेवे। मेको नु आं कबल पतीक गेना हना यो दुम्ब। मेको आ नोले डा आ तौ चच युइ नु यो लीब।

20 इश्माएल आ पर्वम मार देंने, गो मेको नेल्ल नेंता। नेनो, गो मेको कली आसीक गेनुड। मेको सोशा बोशा, शुश दुम्ब। गो मेको कली १२ जना पिप आन आफ सेल्लुड। गो मेको कली ठेयब जात दुम्पाइक्नुड। उत्पत्ती १६:१०; उत्पत्ती २१:१३, १८; उत्पत्ती २५:१६

21 तन्न आं कबल इसहाक नु पाइनुड। सारामी बर्स का नोले इसहाक थीब” देंमाक्त।

22 मिनु परमप्रभु अब्राहाम नु लोत्र पने थुम्शा लमाक्त।

### खोइक्तीक चिनु आ पर्वम शेंशो

23 मिनु परमप्रभुमी लोत्र पवा नाक्ती अब्राहाममी आ तौ इश्माएल, आ खिंमी जरमेशो नु ग्याप्शो वाइल नु आ खिं डा वोंइश मुर नेल्ल आन कली खोइक्तीक चिनु खोइक्पाइक्मी बाक्त।

24 अब्राहाममी खोइक्तीक चिनु खोदा नाक्ती ९९ बर्स दुम्शो बाक्माक्त।

25 आ तौ इश्माएल खोइक्तीक चिनु खोइक्तीक नाक्ती १३ बर्स दुम्शो बाक्माक्त।

26 मिनु अब्राहाम नु इश्माएल नाक्त कामी खोइक्तीक चिनु ताम्से बाक्त।

27 आ खिं डा वोंइश मुर नेल्ल, आ खिंम जरमेशो नु रागी रे ग्याप्शो वाइल नेल्लेम यो मेको नाक्ती खोइक्तीक चिनु तामे बाक्त।

## 18

### परमप्रभु माम्रे आ ब्वाकीम गूशो

1 मिनु काबु नाक्ती अब्राहाम माम्रे आ ब्वाकीमी बाक्माक्त। आ ताम्बु आ लाप्चोमी निस्से बाक्त। मारदे हना शुश हुप्ता बाक्त। मेना परमप्रभु यावे मेको कली ग्रुम्थ जाक्माक्त।

2 मिनु मुर सां गूशा, आ डोंइती राप्शो तवा बाक्त। मेको आन कली तशा, छुल बाक्शा बाप्शा, सेउ पवा बाक्त। हिब्रू १३:२

3 मिनु अब्राहाममी “आं परमप्रभु, आं कली दाक्ताकनी हना, इन गेय पाइब रे मो मलने।

4 इन खोइल चिकचा कली ब्वाक्कु गेनन्नी। मिनु चिकशा, रवा आगाम नांइसीन।

5 गो इन कली इच्का शोब्ले ब्रथ लाइनुड। लाम्ज जचा माल्नीनी। मारदे हना गेपुकी इन गेय पाइब कली गुमथ जाक्शो बाक्नीनी” देंमाक्त। मिनु मेकोपुकीमी “इ देशो खोदेशो पावो” देंमा बाक्त।

6 मिनु अब्राहाम दोरशा, ताम्बुम लशा, सारा कली “गे रीब पा सेआह सां रिम्शो फस के शोब्ले चोवो” देंमाक्त। सेआह का ७ लिटर पुक्तीके बाक्ब।

7 अब्राहाम चहिं गोठमी दोरशा लशा, दोम्शो रिम्शो बाछा का चाक्शा क्योरपाइश्शा, गेय पाइब कली क्येपदा बाक्त।

8 मिनु दहि, दूध नु श्ये चाक्शा, मेको आन कली खेत्तीमी बाक्त। मिनु मेकोपुकीमी जामेनु, अब्राहाम मेको आन नेक्था रवा आ पुंम राप्शा बाक्माक्त।

9 मिनु मेकोपुकीमी “इ मीश सारा ते बाक्मे?” दे हिल्लो पामे बाक्त। मिनु अब्राहाममी “ताम्बुम बाक्ब” देंमाक्त।

10 मिनु कामी “गो एकेर लेंशा माइक्थ जाक्नुड। मेना इ मीशेमी तौ का थिशो बाक्ब” देंमाक्त। मिनु सारा ताम्बु आ लाप्चोम मेको लोव्र पाइब आ नोले खुइश्शा बाक्शा, मेको लोव्र नेना बाक्त। उत्पत्ती १७:१९; रोमी ९:९

11 अब्राहाम नु सारा खाल्पा खाल्पी दुम्शो बाक्सा बाक्त। सारा आ रां ब्रोल्चा यो नुप्शो बाक्माक्त।

12 मोपतीके सारामी मेको लोव्र नेंशा “गो खाल्पी दुम्ती। आं वोंइश यो खाल्पा दुम्त। मिनु आल थीनुडा डा?” दे रिस्से बाक्त। उत्पत्ती १७:१७; १पत्रुस ३:६

13 मिनु परमप्रभु यावेमी अब्राहाम कली “सारा मारदे ‘गो खाल्पी दुम्शा, आल थीनुडा डा?’ दे रिस्से?

14 गो परमप्रभु यावे नड। गो नेल्ल पने चाप्नुड। गो माइक्थ लेशशा जाक्डानु, सारामी तौ थिशो बाक्ब” देंमाक्त। मत्ती १९:२६; लूका १:३७

15 सारामी चहिं “गो मरिस्सीड” दे जोल पवा बाक्त। मारदे हना हिंमाक्त। तन्न मेकोमी “गे थमा पा रिस्साक्वे” देंमाक्त।

16 मिनु मेको मुर सां बोक्शा, सोदोम सहर गे लमा बाक्त। अब्राहाममी मेको आन कली आइक्की सम्म चोव्रथ लमाक्त।

17 मिनु परमप्रभु यावेमी “गो मार पचा चिक्तु, मेको मखुइक्थु अब्राहाम कली शेंनुड। आमोस ३:७

18 अब्राहाम ठेयब नु बोल्यो रागी डा मुर आन आफ दुम्ब। मिनु रागी नेल्ल डा मुरपुकीमी मेको आ पबर्म आसीक ताइनीम। उत्पत्ती १२:३

19 गो अब्राहाम कली तुइक्नुड, आ आल नु आ चच युइ आन कली परमप्रभु यावे आ लां गाक्पाइक्का कली अरेब। मिनु मेकोपुकी परमप्रभु यावे आ लां खोइक्ब दुम्शा, ठीक नु रिम्शो पचा शेंसीशा पाइनीम। परमप्रभु यावेमी अब्राहाम कली मार लोव्र देंमे, मेको नेल्ल दुम्ल” देंमाक्त। ब्यवस्था ६:७; ब्यवस्था ३२:४६

अब्राहाममी परमप्रभु नु लोव्र पशो

20 मिनु परमप्रभु यावेमी “गो सोदोम नु गोमोररा सहर निक्शी आस पबर्म शुश मरिम्शो लोव्र नेता। मारदे हना मेकेर डा मुर आन मरिम्शो पशो शुश हिंचा डा बाक्त। उत्पत्ती १९:१३

21 मुल गो कोव्रथ यीनुड। एको नेंशो लोव्र थमा बाक्म कों, जोल बाक्म, गो तुइक्नुड” देंमाक्त।

22 मिनु परमप्रभु यावे आ स्वर्ग डा गेय पाइब निक्शी सोदोम गे लसा बाक्त। अब्राहाम परमप्रभु यावे आ डोंइती राप्शा बाक्माक्त।

23 मिनु अब्राहाम मेको आ नेक्था लशा “गे ठीक पाइब आन कली नु मरिम्शो पाइब आन कली खाल का डा पा क्याम्नीनी? गन्ती १६:२२

24 मेको सहरमी ५० जना ठीक पाइब मुर बाक्तेक्म हना, सहर कली क्याम्नीनी? मेको ५० जना ठीक पाइब मुर आन पर्बम मेको सहर मप्रोंइनीनी?

25 ममाइ, गे मोदेशो पा मक्याम्नीनी। गे ठीक पाइब नु मरिम्शो पाइब आन कली खाल का डा पा मसाइक्नीनी। थमान, ठीक पाइब नु मरिम्शो मुर आन कली खाल का डा मपाइनीनी। गे रागी रागी डा निसाफ पाइब बाक्शा, ठीक निसाफ पाइनीनी” देंमाक्त। भजन संग्रह ८२:१; भजन संग्रह ९४:२

26 मिनु परमप्रभु यावेमी “सोदोम सहरम ५० जना ठीक पाइब मुर बाक्तेक्म हना, गो मेको आन पर्बम सहर मक्याम्नुड” देंमाक्त। यसैया ६५:८; मत्ती २४:२२

27 मिनु अब्राहाममी “गो फुरक नु पुलु रे दुम्शो मुरुमी परमप्रभु नु लोत्र पाता।

28 मेको सहरम ४५ जना मुर ला ठीक पाइब बाक्तेक्म हना, गे मेको ४५ जना मुर, ५ जना मजाक्दीतीके सहर क्याम्नीनी?” दे हिल्लो पवा बाक्त। मिनु मेकोमी “गो मेकेर ४५ जना ठीक पाइब मुर थित्तामी हना, गो सहर मक्याम्नुड” देंमाक्त।

29 मिनु अब्राहाममी लेंशा “४० जना ठीक पाइब बाक्तेक्म हना?” देंमेनु, मेकोमी “गो मेको ४० जना आन पर्बम यो सहर मक्याम्नुड” देंमाक्त।

30 मिनु अब्राहाममी “परमप्रभु, मगाइक्तीने, गो चिनु लोत्र पाइनुड। ३० जना ठीक पाइब मुर बाक्तेक्म हना?” देंमाक्त। मिनु परमप्रभुमी “३० जना बाक्तेक्म हना, मेको आन पर्बम यो मक्याम्नुड” देंमाक्त।

31 मिनु अब्राहाममी लेंशा “गो परमप्रभु इन कली लेंशा लोत्र पाइनुड, सहरमी २० जना ला ठीक पाइब मुर बाक्तेक्म हना?” देंमाक्त। मिनु मेकोमी “२० जना ठीक पाइब मुर बाक्तेक्म हना यो, मेको आन पर्बमी सहर मक्याम्नुड” देंमाक्त।

32 मिनु अब्राहाममी “परमप्रभु, मगाइक्तीने। गो चिनु लोत्र हिल्लो

पाइनुड। १० जना ला ठीक पाइब मुर बाक्तेक्म हना?” देंमाक्त। मिनु मेकोमी “गो मेको १० जना ठीक पाइब आन पर्वम यो सहर मक्याम्नुड” देंमाक्त। न्यायाधीस ६:३९

33 मिनु अब्राहाम नु लोव्र पने थुम्शा, परमप्रभु यावे आ लां लमाक्त। अब्राहाम आ बाक्तीके लेम्माक्त।

## 19

### सोदोम नु गोमोररा क्याम्शो

1 मेको परमप्रभु यावे आ स्वर्ग डा गेय पाइब निक्शी सोदोम सहरम नाक्नाक्दो जाक्दीस्सा बाक्त। मेना लोत सहर आ गारो डा ठेयब लाप्चो आ नेक्था निश्शा बाक्मेनु, गुम्से बाक्त। मिनु लोतमी मेको आस कली तशा बोक्शा, खुम्की पा बाम्माक्त। उत्पत्ती १८:२२

2 मिनु लोतमी “आं प्रभु निक्शी, नेनीसे, मुलाक्दो आं खिंम बाक्कीसे। इस खोइल चिकसीसे। सुनी बोक्शा, इस लां लने चाप्नीसी” देंमाक्त। मेको निक्शीमी “ममाइ, गो मेरे लाडगाम इप्नस्कु” देंसा बाक्त।

3 मिनु लोतमी शुश लोव्र पवा नोले आ खिंमी बास बाक्सा बाक्त। लोतमी मेको आस कली ब्रोव्रब्रोव्रशो क्येशा, बोरब ओरुक्ती मसुप्शो शोब्ले सेला बाक्त। मिनु जाम्से बाक्त।

4 मिनु इप्चा क्येडा डोंइती सोदोम सहर डा वोंइश मुरपुकी खिं आ एर ओंथ खुम्सीशा बाक्मा बाक्त। खाल्पा, ठिटा सहर डा वोंइश मुर नेल्ल खुम्सीशा बाक्मा बाक्त।

5 मेकोपुकीमी लोत कली “नाक्नाक्दो इ खिंम जाक्शो वोंइश मुर ते बाक्सा। आंइ दाक्शो पचा कली लाडगाम सोइक्तो” देंमा बाक्त। लेवी १८:२२-२५; न्यायाधीस १९:२२-२४; रोमी १:२७

6 मिनु लोत लाप्चो रे लाडगा गूशा, आ नोले लाप्चो चोक्शा वोदा बाक्त।

7 मिनु मेकोमी “आं लोकबपुकी, मोपा मरिम्शो मपने।

8 नेनीन, आं के कन्ने तमी निक्शी बाक्नीसी। मेको इन कली लाडगा सोइकुड। मार मार पचा दाक्नीनी, मेको निक्शी नु पने। आं खिमी जाक्शो वोंइश मुर आस कली मारेइ मपने। मारदे हना बास बाक्चा कली आं खिम जाक्ताक्से” देंमाक्त।

9 मेकोपुकीमी चहिं “गे लावो। गे ला एको सहरमी अर्को रागी डा मुर बाक्नेवे, आंइ कली हुकुम पचा माल्नेवे? लो, मेको निक्शी आस क्येडा इ कली श्येत गेनीकी” देंमा बाक्त। लोत कली शुश लोत्र पशा, लाप्चो रोक्चा माल्मे बाक्त। २ पत्रुस २:७-८

10 तन्न आगा डा वोंइश मुर निक्शीमी आस गुइ लाडगा गुंइशा, लोत कली ग्याइशशा आगा कीशा, लाप्चो चोक्गसे बाक्त।

11 मिनु मेको निक्शीमी लाडगाम बाक्शो मुर आन कली मिक्च मताइब सेल्से बाक्त। मिनु मेकोपुकीमी लाप्चो मथित्थु, माल्चा प्रोन्मे बाक्त। २राजा ६:१८

12 मिनु मेको निक्शीमी लोत कली “गे इ के सु सु बाक्नीमी? चांइवा, तमी तौ नु सहरम इ मुर सु सु बाक्नीमी? एको सहर रे गुंइदो।

13 मारदे हना गो एको सहर कली क्याम्नस्कु। परमप्रभु यावे आ डोंइती एको आन ग्रांग्रा दिचा डा गेय आ पर्वम शुश रेयके बाक्ब। परमप्रभु यावेमी आंस कली एको सहर क्याम्चा, दे सोइशो बाक्ब” देंसा बाक्त। उत्पत्ती १८:२०

14 मिनु लोतमी आ तमी आस कली ग्युंवे पचशो वोंइश आल आस कली गुम्शा “बोक्कीस, सहर रे लसे। मारदे हना परमप्रभु यावेमी सहर क्याम्ब” दे माइक्सी बाक्त। मेको निक्शीमी चहिं “रित्चा डा लोत्र बाक्त” दे मिम्तसे बाक्त। गन्ती १६:२१

15 मिनु भाले ग्रीमेनु, परमप्रभु यावे आ स्वर्ग डा गेय पाइब निक्शीमी लोत कली “बोक्को, इ मीश नु इ तमी निक्शी आस कली लाइशशा, एको सहर रे प्रोक्कीन। मप्रोक्तीनी हना, एको सहर डा मुर खोदेंशो पा क्याम्चा पुंइसीनीनी” देंसा बाक्त।



१६ मिनु लोत कली ओंखां बोक्शो तशा, मेको कली आ तमी निक्शी नु आ मीशे आन कली गुइ रे कीशा, सहर रे गुंइदसे बाक्त। मोपा परमप्रभु यावेमी लोत नु आ खिं डा मुर आन कली दाक्शा प्रोंइमी बाक्त।

१७ सहर रे गुंइशा, परमप्रभु यावे आ स्वर्ग डा गेय पाइब कामी “ब्रोंइचा दाक्नीनी हना, नोले मकोव्रथु प्रोक्कीन। दिंमम मबाक्कीन। पहाड गे प्रोक्कीन। मो मपाइतीनी हना, गे सहर डा मुर नु क्याम्चा पुंइसीनीनी” देंमाक्त। मती २४:१६

१८ मिनु लोतमी “आं प्रभु, गो मचबु।

१९ नेनीन, गो इन शिशी ताता। गो आंइ कली दाक्शा, बेक्चा रे प्रोंइतीनी। गो पहाड प्रोक्ने मचबु। पहाडमी अर्को श्येतमी आं कली साइक्बा, कों।

२० नेनीन, हयु उइ डा सहर प्रोक्चा कली आं नेक्था बाक्ब। आइक्च यो बाक्ब। मेकेर प्रोक्चा गेयीनी। मेको सहर आइक्च बाक्ब। मेकेर ब्रोंइने चाप्नुड” देंमाक्त।

२१ मिनु मेकोमी “लो, गो इ पुंइशो गेनुड। इ देंशो सहर मक्याम्नुड।

२२ रीब पा प्रोक्कीन। गे मजाक्दीन्नी सम्म मारेइ पने मचाप्नुड” देंमाक्त। मेको सहर कली सोआर नें वोदा बाक्त। आइक्च कली सोआर देंसीब।

२३ मिनु लोत सोआर सहर ओव्रची ना रागीमी नां दाप्ने थुम्शो बाक्माक्त।

२४ मिनु नोले परमप्रभु यावेमी सोदोम नु गोमोररा सहर आस तारी सरीड रे गन्धक नु मी रेउ यिशो खोदेंशो पा यिपदा बाक्त। ब्यवस्था २९:२२; भजन संग्रह ११:६; यसैया १:९-१०; यसैया १३:१९; आमोस ४:११; लूका १७:२९; २पत्रुस २:६; प्रकाश १४:१०

२५ मिनु परमप्रभु यावेमी मेको सहर निक्शी, दिंम नेल्ल, सहर डा मुर नेल्ल नु रूम मार मार वाशो बाक्मे, मेको नेल्ल क्याम्दा बाक्त।

26 लोट नु आ मुर प्रोक्मानु, लोट आ मीशेमी नोले बिर लेशशा कोव्रडा बाक्त। मिनु मेको हिक्सी के थाम दुम्माक्त।

27 मिनु अब्राहाम नाक्त का डोंइती परमप्रभु यावे आ डोंइती राप्शा बाक्तीकेम लमाक्त।

28 मिनु सोदोम नु गोमोररा सहर डा दिंम डा रू नेल्ल कोव्रडा बाक्त। मिनु मेको सहर निक्शी नु रू नेल्ल रे ठेयब चुप्लु डा मी खोदेशो पा कुन गूशो तवा बाक्त।

29 मोपा परमप्रभुमी मेको दिंम, सहर निक्शी क्याम्दा बाक्त। मेना परमप्रभुमी अब्राहाम आ पुंइशो लोव्र मिम्शा, लोट कली मेको सहर रे गूंइशा प्रोना बाक्त। नोले मेकोमी मेको सहर नेल्ल खतम पोक्गा बाक्त।

### लोट आ तमी निक्शी

30 मिनु लोट नु आ तमी निक्शी सोआर रे लशा, पहाड मेर लमा बाक्त। मारदे हना सोआर सहरम बाक्चा हिंमा बाक्त। मेको नु आ तमी निक्शी पहाड डा पुक्खीम बाक्शो बाक्मा बाक्त।

31 मिनु लोट आ डोंइती जरमेशो तमीमी “इस आफ खाल्पा दुम्त। नेल्ल रागीमी इस कली वोंइश मुर मबाक्म।

32 लो, इस आफ कली अडगुर शांबुमी दुक्पाइश्शा, इस आफ नु बाक्स। मोपा इस आफ कली चच युइ दुम्नीम” दे आ लोकब कली देंमाक्त। लेवी १८:७

33 मेको नाक्दो आस आफ कली अडगुर शांबुम दुक्पदसे बाक्त। मिनु आ ठेयब तमी आ आफ नु इम्माक्त। लोटमी आ तमी आं नु इप्शो, बोक्शो मारेइ मतुइक्ता बाक्त।

34 मिनु आ दीसा ठेयब तमीमी आ लोकब कली “नेनो, गो सिनाक्दो आफ नु बाक्ती। गो लेंशा आफ कली अडगुर शांबुमी दुक्पाइक्स। मुलाक्दो गे इपो। मोपा इस आफ रे चच युइ दुम्नीम” देंमाक्त।

35 मिनु मेको निक्शीमी आस आफ कली मेको नाक्दो यो दुक्पदसे बाक्त। मिनु कान्छी आ आफ नु इप्थ लमाक्त। मिनु लोतमी आ तमी आं नु इप्शो, बोक्शो मारेइ मतुइक्ता बाक्त।

36 मिनु लोत आ तमी निक्शीमी आस आफ के कोव्रज कुरसे बाक्त।

37 मिनु ठेयब तमीम तौ का थिमाक्त। मेको आ नें मोआब वोदा बाक्त। मेको मोआबी आन किकी पिपी बाक्माक्त। ब्यवस्था २:९

38 कान्छीमी यो तौ का थिमाक्त। मेको आ नें बेन-अम्मी वोदा बाक्त। मेको अम्मोनी आन किकी पिपी बाक्माक्त। ब्यवस्था २:१९; ब्यवस्था २३:४

## 20

अब्राहाम नु अबीमेलेक

उत्पत्ती १२:१०-२०; उत्पत्ती २६:१-११

1 मेकेर रे अब्राहाम दक्खिनम बाक्ब नेगेब गे लमाक्त। मिनु कादेश नु शुर आस दाते गेरार सहरमी अर्को रागी डा मुर दुम्शा बाक्माक्त। उत्पत्ती १२:९; उत्पत्ती २६:१

2 मेकोमी मुर आन कली आ मीश, सारा आ पर्बम “आं समी बाक्ब” देंमाक्त। मिनु गेरार डा पिप अबीमेलेकमी मेको कली ब्रथ सोइक्ता बाक्त।

3 मिनु अबीमेलेकम आ डोमुमी परमप्रभु आ डोंइती गूशो तवा बाक्त। मिनु “गे मीश चाक्शो आ पर्बम बेक्चा माल्नेवे। मारदे हना मेको ग्युंवे पशो मीश मुर बाक्ब” देंमाक्त।

4 मिनु अबीमेलेकम मेको नु मइप्तीके “परमप्रभु, गे दोस मताइब मुर आन कली यो साइक्नीनी?

5 मेकोमी आं कली ‘आं समी बाक्ब’ मदेम डा? आ मीशेमी यो ‘आं लोक्ब बाक्ब’ देंत। गो रिम्शो थुं नु थमा पा मतुइक्तीकेमी चाक्ता” देंमाक्त।

6 मिनु परमप्रभुमी मेको आ डोमुमी “गे रिम्शो थुंमी पाप्तीवी। गो तुइक्नुड। मोपतीके गो इ कली मेको कली थिचा मगेथु, आं डोंइती मरिम्शो पचा मगेड।

7 मुल मेको मुर आ मीश लेत्तो। मारदे हना मेको आं लोत्र पाइब का बाक्ब। मेकोमी इ पर्बम पुंइब। मिनु गे ब्रोंइनेवे। गे आ मीश कली मलेत्ताक्वी हना, गे थमा पा बेक्चा माल्नेवे। इ मुर नेल्ल यो बेक्चा माल्नीमी, दे तुइक्तो” देंमाक्त। १राजा १३:६

8 मोपतीके अबीमेलेक सुनी कना बोक्शा, आ गेय पाइब नेल्ल आन कली ब्रेशा, आ डोमु नेल्ल शोत्रडा बाक्त। मिनु मुर नेल्ल शुश हिंमा बाक्त।

9 मिनु अबीमेलेकम अब्राहाम कली यो ब्रेत्ता बाक्त। मिनु मेको कली “मारदे आंइ कली ओदेशो पवी? गो नु आं रागी कली ओदेशो मरिम्शो पपाइक्चा कली गो इ कली मार मरिम्शो पाइक्ना? गे मपचा डा गेय पाप्तीवी।

10 गे मारदे ओदेशो पचा मिम्ती?” देंमाक्त।

11 मिनु अब्राहाममी “थमा पा, एको रागी डा मुरपुकी परमप्रभु कली मान पा महिनीमी। मिनु आं मीश आ पर्बम आं कली साइक्नीम, दे मिम्ताक्ड।

12 मेको थमा आं समी यो बाक्ब। आं आफ आ तमी बाक्ब। तन्न आं ममा आ तमी ममाइ। गो मेको कली चाक्ता। लेवी १८:९

13 मिनु परमप्रभुमी आं कली आं आफ आ खिं रे गाक्पाइय्यीनु, गो आं मीश कली ‘आं कली दाक्नेवे हना, गो ते ते जाक्दीस्सा, मेक मेक एको आं लोक्ब बाक्ब, देनो’ दे माइक्ता” देंमाक्त।

14 मिनु अबीमेलेकमी भेडापुकी, बी ब्यफ नु वाइलीम वाइल आन कली लाइश्शा, अब्राहाम कली गेवा बाक्त। आ मीश सारा यो लेत्ता बाक्त।

15 मिनु “नेनीन, आं रागीमी ते ते बाक्चा दाक्नेवे, मेक मेक बाक्ने चाप्नेवे” देंमाक्त।

16 मिनु सारा कली “नेनो, इ लोक्ब कली हजार का चांदी टुक्रा गेता। मेको इन कली इ मुर आन डोंइती इ कली रिम्शो पचा कली

गेता। मोपा नेल्ल आन डोंइती इ कली ठीक पाता” देंमाक्त।

17 मिनु अब्राहामम अबीमेलेक आ पर्वम परमप्रभु कली पुना बाक्त। मिनु परमप्रभुमी अबीमेलेक, आ मीश नु आ गेय पाइब नेल्ल आन पर्वम आल मथितीक रोइ रे सापदा बाक्त।

18 मारदे हना परमप्रभु यावेमी अब्राहाम आ मीश सारा आ पर्वम अबीमेलेक आ खिं डा मुर नेल्ल आन कली आल मथीब सेल्शो बाक्माक्त।

## 21

### इसहाक जरमेशो

1 मिनु परमप्रभु यावेमी सारा कली मार देंमे, मेकोन दुम्पदा बाक्त।  
उत्पत्ती १८:१०

2 मिनु सारामी खाल्पी दुम्शा, अब्राहाम के कोव्रज कुरशा, तौ का थिमाक्त। परमप्रभुमी गेना थीब देंमे, मेना थिमाक्त। हिब्रू ११:११

3 मिनु अब्राहाममी सारा आ थिशो तौ कली इसहाक नें वोदा बाक्त। उत्पत्ती १७:१९

4 मिनु अब्राहाममी आ तौ इसहाक कली ८ नाक्ती दुम्मेनु, खोइक्तीक चिनु खोदा बाक्त। परमप्रभुमी डोंइती दोपा अरेवा, मोपा पवा बाक्त। उत्पत्ती १७:११-१२; प्रेरित ७:८

5 अब्राहाम आ तौ इसहाक थिमेनु, सहे का बर्स दुम्शो बाक्माक्त।  
उत्पत्ती १७:१७

6 मिनु सारामी “परमप्रभुमी आं कली रिप्पाइक्ती। सु सुम एको नेंनीमी, मेको यो गो नु रित्नीम। उत्पत्ती १८:१२

7 सु सुमी अब्राहाम कली ‘इ मीशेमी आल कली दूध तुंडब’ देंनीमी? गो खाल्पा दुम्शो अब्राहाम के तौ का थिती” देंमाक्त।

### हागार नु आ तौ खेरशो

8 मिनु आल कोल्शा, दूध तूचा प्रोना बाक्त। मिनु दूध तूचा प्रोना नाक्ती अब्राहाममी ठेयब भोज सेल्शा, मुर आन कली थुल्मी बाक्त।

9 मिनु सारामी इजीप्त डा हागार नु अब्राहाम आस थिशो तौ इश्माएलमी इसहाक कली शुक्शी पशो तवा बाक्त।

10 मिनु मेकोमी अब्राहाम कली “वाइलीम नु आ तौ आस कली खेरो। मेको वाइलीम आ तौ कली, आं तौ इसहाक नु अडस योक्शा गेचा मदुम्ब” देंमाक्त। गलाती ४:३०

11 अब्राहामम आ लोत्र नेंशा, थुं मनुमाक्त। मारदे हना इश्माएल यो आ तौ बाक्माक्त।

12 तन्न परमप्रभुमी अब्राहाम कली “वोंइश आल नु इ वाइलीम आ पर्बम सुर्ता मपावो। सारामी मार मार देंमे, मेको नेल्ल पावो। मारदे हना इसहाक आ चच युइ इ जात दुम्नीम। उत्पत्ती १७:२१; रोमी ९:७-८; हिब्रू ११:१८

13 मिनु इ वाइलीम आ तौ इश्माएल आ चच युइ रे यो ठेयब जात का सेल्लुड। मारदे हना मेको यो इ तौ बाक्ब” देंमाक्त। उत्पत्ती १७:२०

14 मिनु अब्राहाम सुनी कना बोक्शा, हागार कली शोब्ले नु ब्वाक्कु कुरपाइश्शा, आ तौ नु सोइक्ता बाक्त। मिनु हागार नु आ तौ लसा बाक्त। मिनु लशा, लां जाम्शा, बेयर-शेबा माइश्शो गोरशो रागीम हिरससा बाक्त।

15 मिनु ब्वाक्कु नुप्शा, आ आल कली बुटा आगाम वोदा बाक्त।

16 मिनु हागार चहिं आइदी लशा, निस्से बाक्त। मारदे हना मेकोमी “आं आल बेक्शो मतडल” दे मिम्ता बाक्त। मिनु ठेयब सेंदा पा डाक्माक्त। यसैया ४९:१५

17 मिनु परमप्रभुमी आल आ डाक्शो सेंदा नेना बाक्त। मिनु परमप्रभु आ स्वर्ग डा गेय पाइबमी सरीड रे “हागार, मार दुमे? महिनो। मारदे हना परमप्रभुमी उइ बाक्शो इ तौ आ ब्रेश्शो नेंतु।

18 बोक्को, इ तौ लाइश्शा गाक्को। गो मेको रे ठेयब जात का सेल्लुड” देंमाक्त।

19 मिनु परमप्रभुमी हागार आ मिक्च तपदानु, ब्वाक्कु बुक्तीके

का तवा बाक्त। मिनु आ ब्वाक्कु कुरतीके प्रिंशा, आ तौ कली तूपदा बाक्त। २राजा ६:१७, २०

20 मिनु परमप्रभु मेको वोंइश आल नु बाक्मेनु, मेको कोल्शा, गोरशो रागीमी बाक्शा, लिब्रा आप्स शुश जोक्ब दुम्माक्त।

21 मेको गोरशो रागी आ नें पारान बाक्माक्त। मिनु आ ममामी आ तौ कली इजीप्त रागी डा तमी चाक्शा गेवा बाक्त। उत्पत्ती १६:३

अबीमेलेक नु अब्राहाम सल्ला पशो

उत्पत्ती २६:१५-३३

22 मिनु काबु अबीमेलेक नु आ फौज डा ठेयब कप्तान फीकोल अब्राहाम आ बाक्तीक जाक्शा, अब्राहाम कली “गे मार मार पाइनीनी, परमप्रभु गे नु बाक्ब।

23 मोपतीके गो इन कली मार पुंइनुड देंशा हना, आं कली, आं तमी तौ नु आं चच युइ आंइ कली श्येत मगेकी। गो इन कली रिम्शो पशो खोदेशो पा, आं कली यो रिम्शो पने। इन बाक्शो रागी कली यो रिम्शो पने। ‘रिम्शो पाइनुड’ दे परमप्रभु आ नें थिशा, कसम जने” दे पुना बाक्त। उत्पत्ती २०:१५

24 मिनु अब्राहाममी “गो कसम जाइनुड” देंमाक्त।

25 मिनु अब्राहाममी अबीमेलेक कली हुइक्ता बाक्त। मारदे हना अबीमेलेक आ गेय पाइबपुकीमी अब्राहाम आ इनार आ पर्बम जिशा, रोइक्तमे बाक्त।

26 मिनु अबीमेलेकमी “गो मेको मतुइक्तु, सुम पवा? गे यो मशेंदीनी। मुलाक्त ला नेंता” देंमाक्त।

27 मिनु अब्राहाममी भेडापुकी नु ब्यफपुकी अबीमेलेक कली गेवा बाक्त। मोपा मेको निक्शी सल्ला पाम्से बाक्त।

28 अब्राहामम ७ ओटा पाठी चहिं बगाल रे गुंइशा, वोदा बाक्त।

29 मिनु अबीमेलेकम “मेको ७ ओटा पाठी मारदे वोइक्नी?” दे हिल्लो पवा बाक्त।

30 मिनु “मेको ७ ओटा पाठी आं गुड़ रे लाइक्चा माल्नीनी। गो आं दोशो इनार आ सांकछी दुम्नीनी” देंमाक्त।

31 मिनु मेको बाक्तीके कली बेयर-शेबा, दे नें वोदसे बाक्त। मारदे हना मेको निक्शी मेकेर कसम जाम्से बाक्त।

32 मिनु बेयर-शेबामी मेको सल्ला पने थुम्शा, अबीमेलेक नु फीकोल आ ठेयब कप्तान पलिस्ती आन रागी लेस्सा बाक्त।

33 अब्राहाममी चहिं बेयर-शेबाम रवा का खुमा बाक्त। मिनु मेकेर परमप्रभु यावे, गेना हना यो बाक्ब परमप्रभु आ नें थिशा, मेको नु लोत्र पवा बाक्त। उत्पत्ती १२:८; रोमी १६:२६

34 मिनु पलिस्ती आन रागीमी अब्राहाम अर्को रागी डा मुर दुम्शा, शुश नाक्त बाक्माक्त।

## 22

### परमप्रभुमी अब्राहाम आ थुं नाक्शो

1 मिनु नोले परमप्रभुमी “अब्राहामम आं कली टीबाक्म कों, मटीबाक्म” दे मिम्शा “अब्राहाम” दे ब्रेत्ता बाक्त। अब्राहाममी “गो एक बाक्ती” दे परमप्रभु कली मदा बाक्त। प्रस्थान १५:२५; प्रस्थान १६:४; प्रस्थान २०:२०; ब्यवस्था ८:२; ब्यवस्था १३:४; न्यायाधीस २:२२; हिब्रू ११:१७; याकूब १:१३

2 मिनु मेकोमी “इ तौ लतो। का ला बाक्शो दाक्शो इ तौ इसहाक लतो। मिनु मोरीयाह रागी लावो। मेकेर लशा, इ तौ कली चोशा चढ़ेयी। तेको डांडाम चढ़ेचा माल्नेवे, गो इ कली कोंइनन” देंमाक्त।

3 मिनु अब्राहाम सुनी कना बोक्शा, चढ़ेतीकेम चोचा कली शी चेशशा, आ गधा ठीक पवा बाक्त। मिनु ठिटा निक्शी नु आ तौ इसहाक कली लाइशशा, परमप्रभुमी देंशो पहाड लमा बाक्त।

4 लमा लमा नाक्त सां नोले परमप्रभु आ देंशो बाक्तीके डोन रे तवा बाक्त।



5 मिनु अब्राहाममी आ गेय पाइब निकशी आस कली “एकेर गधा नु बाक्कीसे। गो आं तौ नु मिरी आइक्था लशा, चढ़ेशा, इस बाक्तीक लेत्नस्कु” देंमाक्त।

6 मिनु अब्राहाममी चोशा चढ़ेतीक शी इसहाक कली कुरपदा बाक्त। मिनु मी नु चुक्ब आंमा कुरा बाक्त। मोपा निम्फा लसा बाक्त।

7 मिनु इसहाकम आ आफ कली “आं आफ” देंमाक्त। मिनु अब्राहाममी “गो नेंता” देंमाक्त। मिनु इसहाकमी “गो मी नु शी ला कुरशा गाक्तस, चोशा चढ़ेतीक पाठा चहिं ते बाक्म?” दे हिल्लो पवा बाक्त।

8 मिनु अब्राहाममी “चोशा चढ़ेतीक पाठा परमप्रभुमी गेब” देंमाक्त। मोपा निम्फा लसा बाक्त।

9 मिनु परमप्रभुमी देंशो रागी जाक्दीस्सानु, अब्राहाममी फुल्लु चाक्शा, चढ़ेतीक सेला बाक्त। मिनु चढ़ेतीक तारी शी प्रोव्रडा बाक्त। मिनु आ तौ इसहाक कली गुइ खोइल फ्रेंशा, शी तारी वोदा बाक्त।

10 मिनु अब्राहाममी आ तौ क्योरचा कली चुक्ब शोइश्शा तरेवा बाक्त। मत्ती २६:३९; याकूब २:२१

11 मिनु परमप्रभु यावे आ स्वर्ग डा गेय पाइबमी सरीड रे “अब्राहाम, अब्राहाम” दे ब्रेत्ता बाक्त। मिनु अब्राहाममी “गो नेंता” देंमाक्त।

12 मेकोमी “इ तौ कली मक्योरो। मेको कली मारेइ मपतो। मारदे हना गे परमप्रभु कली मान पा हिंबाक्ते। गो मुल तुइक्ताक्ड। गे इ का ला बाक्शो तौ आं कली गेचा ठीक पाप्तीवी। इ का ला तौ यो आं कली गेचा टीबाक्ते” देंमाक्त। रोमी ८:३२; हिब्रू ११:१७

13 मिनु अब्राहाममी एर गे कोव्रडानु, सांड का आ प्रोव्र चू लहाराम रेशशा, बाक्शो तवा बाक्त। मिनु लशा सांड चाक्शा, आ तौ आ पा डा मेको सांड क्योरशा, चोशा चढ़ेतीक चढ़ेवा बाक्त।

14 मिनु अब्राहाममी मेको डांडा कली परमप्रभु यावे यीरेह, दे नें वोदा बाक्त। मोपतीके मुल सम्म मुरपुकीम “परमप्रभु यावे आ

डांडाम परमप्रभु यावेमी माल्शो गेब” देंनीम। “परमप्रभु यावे यीरेह” आ अर्थ “परमप्रभु यावेमी आं माल्शो गेब” देंशो बाक्ब।उत्पत्ती १६:१३

15 मिनु परमप्रभु यावे आ स्वर्ग डा गेय पाइबमी लेंशा सरीड रे अब्राहाम कली

16 “परमप्रभु यावेमी ‘गो आं नेमी कसम जाता। मारदे हना गे इ तौ आं कली गेचा ठीक पाप्तीवी। प्रस्थान ३२:१३; यसैया ४५:२३; आमोस ६:८; मीका ७:२०; लूका १:७३; हिब्रू ६:१३

17 मार कसम जाता देंशा हना, गो इ कली आसीक गेनुड। इ चच युइ आन कली सोरुल नु समुन्द्र आ नेक्था डा बाल्वा खोदेंशो पा शुश सेल्लुडमी। मिनु मेकोपुकीमी आन जोरी सत्रु आन सहर आंम के सेल्लीम। उत्पत्ती १३:१६; हिब्रू ११:१२

18 इ चच युइ आन पर्बम रागी रागी डा मुर नेल्ल आसीक राइनीम। मारदे हना गे आं देंशो टीब बाक्ते’ दे परमप्रभु यावेमी देंत” दे आ स्वर्ग डा गेय पाइबम अब्राहाम कली लोत्र पवा बाक्त। उत्पत्ती १२:३; गलाती ३:१६

19 मिनु अब्राहाम मेकेर रे लशा, आ गेय पाइब निक्शी आस रिम्तीके लेस्सा बाक्त। मिनु गुम्शा, बेयर-शेबा माइक्तीकेम लमा बाक्त। मिनु अब्राहाम मेक उइ बाक्माक्त।

नाहोर आ चच युइ

20 मिनु मेको नोले मुरुमी अब्राहाम कली “मिल्लामी यो इन लोकब नाहोर रे पा आल थिप्तु। उत्पत्ती ११:२९

21 आ डोंइती जरमेशो तौ ऊज, आ लोकब बूज, अराम आ आफ केमुएल,

22 केसेद, हाजो, पिल्लाश, यिदलाफ नु आ कान्छा बेथुएल बाक्नीम।

23 बेथुएल चहिं रेबेका आ आफ बाक्त। मिल्लामी अब्राहाम आ लोकब नाहोर के ८ जना तौ थिप्तु। उत्पत्ती २४:१५

24 नाहोर आ कान्छी मीश आ नें रूमा बाक्माक्त। मेकोमी तेबाह, गाहाम, ताहाश नु माकाह थिमाक्त” देंमाक्त।

## 23

सारा बेक्शो

1 मिनु सारा सहे का २७ बर्स दुम्शो बाक्माक्त। आ ब्रोंइतीक नाक्त नेल्ल मोशोन बाक्माक्त।

2 सारा कनान रागी डा किरयथ-अरबाम बेक्माक्त। मेको कली हेब्रोन यो देंनीम। मिनु अब्राहाम सारा आ पर्बम हिशेक पा डाक्थ लमाक्त।

3 अब्राहाम सारा आ बेक्शो रां बाक्तीके रे लशा, हित्ती आ मुर आन कली

4 “गो इन दातेमी अर्को रागी डा मुर बाक्नुड। गो थिम्तीक का ग्याप्चा दाक्नुड। मारदे हना आं बेक्शो मुर कली थिम्चा माल्नुड” देंमाक्त। उत्पत्ती १७:८

5 मिनु हित्ती आ मुरपुकीमी अब्राहाम कली

6 “प्रभु, आंइ लोव्र नेनीन, गे आंइ दातेमी परमप्रभुमी सेल्शो ठेयब मुर बाक्नीनी। आंइ के बेक्शो मुर आन कली वोइक्तीक पुक्खी शुश बाक्नीम। तेको दाक्नीनी, मेकोमी इन बेक्शो मुर थिमीन। इन बेक्शो मुर थिम्चा सुइमी मतेक्ब” देंमा बाक्त।

7 मिनु अब्राहाम बोक्शा, हित्ती आ मुर आन डोंइती सेउ पवा बाक्त।

8 मेको आन कली “आं बेक्शो मुर थिम्चा गेतीनी हना, आं पर्बम सोहार आ तौ एफ्रोन नु लोव्र पने।

9 मेको आ रू आ नोले बाक्ब माक-पेला पुक्खी आं कली लेयड, दे पुंइदीन। गिश थाप्चा माल्नुडा, थाप्नुड। इन दातेमी आं बेक्शो मुर थिम्तीके दुम्ल” देंमाक्त।

10 मेना एफ्रोन हित्ती आन दातेमी निश्शो बाक्माक्त। मेको आन सहर डा गारो डा ठेयब लाप्चो आ नेक्था बाक्शा, अब्राहाम आ लोव्र नेन्मेनु, मेको हित्ती एफ्रोनमी अब्राहाम कली

11 “प्रभु, ममाइ, आं लोव्र नेनीन, गो इन कली मेको रू नु पुक्खी गेनुड। आं मुरपुकी सांकछी बाक्नीम। गो इन कली गेनुड। इन बेक्शो मुर थिमीन” देंमाक्त।

12 मिनु अब्राहाममी मेको मुर आन डोंइती सेउ पवा बाक्त।

13 मिनु मुर नेल्ल आन डोंइती अब्राहाममी एफ्रोन कली “आं लोव्र नेनीन। गो मेको रू डा क्येट थाप्नुड। मेको ताक्कीन। गो आं मीश मेक थिम्नुड” देंमाक्त।

14 मिनु एफ्रोनमी अब्राहाम कली

15 “प्रभु, आं लोव्र नेनीन, मेको रू ४ सहे शेकेल चांदी डा बाक्ब। मेको इस दातेमी मारेइ ममाइ। मोपतीके थिमीन” देंमाक्त। शेकेल का ११.५ ग्राम बाक्ब।

16 मिनु अब्राहाममी एफ्रोन आ लोव्र बिस्से बाक्त। मेकोमी एफ्रोनमी हिती आ मुर आन डोंइती देशो खोदेशो पा ४ सहे शेकेल चांदी नाक्शा, गेमी बाक्त। मेको ४ सहे शेकेल चहिं ग्याप्ब लेयब आन दातेमी मोदेशो रू कली ठीक बाक्माक्त। शेकेल का ११.५ ग्राम चांदी बाक्त।

17 माक-पेलामी बाक्शो एफ्रोन आ रू माम्रे आ पूबर् गे बाक्शो बाक्माक्त। मोपा रू नु पुक्खी, रूमी बाक्शो रवा नेल्ल नु एर ओंथ सुरम खुम्शो रवा यो

18 हिती नेल्ल नु ठेयब लाप्चोम बाक्ब आन डोंइती अब्राहाम के दुम्माक्त।

19 मिनु नोले अब्राहामम आ मीश सारा कली माम्रे आ नेक्था माक-पेलामी बाक्शो पुक्खीमी थिमा बाक्त। माम्रे चहिं कनान रागी डा हेब्रोन सहर बाक्माक्त।

20 मिनु मेको रू नु मेक बाक्शो पुक्खी हिती आ मुरपुकी रे अब्राहाम आ मुर थिम्तीक रू दुम्माक्त। उत्पत्ती २५:९-१०; उत्पत्ती ४७:३०; उत्पत्ती ४९:२९-३२; उत्पत्ती ५०:१३

### रेबेका इसहाक आ मीश दुम्शो

1 मिनु अब्राहाम शुश बर्स दुम्शा, खूशो दुम्माक्त। परमप्रभु यावेमी अब्राहाम कली आ पतीक नेल्लेमी आसीक गेवा बाक्त। उत्पत्ती १२:२

2 मिनु अब्राहाममी आ रू खिं नेल्ल कोव्रब नु वाइल आन कली अरेब ठेयब वाइल कली “इ गुइ आं फिला तारी वोतो।

3 गो इ कली परमप्रभु यावे, सरीड नु रागी डा परमप्रभु आ नेमी कसम जपाइक्नुड। मार कसम जपाइक्नुड देंशा हना, आं तौ कली आं बाक्शो कनान रागी डा मीश आल मचाक्को। उत्पत्ती २८:१; प्रस्थान ३४:१६

4 आं रागी नु आं जात डा मीश आल का चाक्को” दे अब्राहाममी वाइल कली मदा बाक्त।

5 मिनु वाइलमी “मेको मीश आल एको रागी जाक्चा मबिस्साक्व हना, इन तौ इन जरमेशो रागीम लाइक्चा माल्नुडा?” दे हिल्लो पवा बाक्त।

6 मिनु अब्राहाममी “मोदेशो गेनायो मपावो। आं तौ कली मेक मलतो।

7 डोंइती परमप्रभु यावे, सरीड नु रागी डा परमप्रभुम आं कली आं आफ आ खिं नु आं जात डा रागी रे गुंइशा, एक सोइक्ताक्यी। मेकोमी कसम जशा, आं कली लोव्र पाप्तु ‘कनान रागी इ चच युइ आन कली गेनुडमी’ दे माइक्ती। मेकोमी आ स्वर्ग डा गेय पाइब इ डोंइती सोइक्ब। आं तौ कली आं जात रे मीश आल का चाक्को। २इतिहास ३६:२३; नेहेम्याह २:२०

8 मेको मीश आल गे नु जाक्चा मबिस्साक्व हना, गे कसम मजशो खोदेशो दुम्नेवे। आं तौ कली चहिं मलतो” दे अब्राहाममी आ वाइल कली अरेवा बाक्त।

9 मिनु मेको वाइलमी आ होव्रप अब्राहाम आ फिला तारी गुइ वोइश्शा, आ देंशो आ पर्बम कसम जवा बाक्त।

10 मिनु नोले मेको वाइलम आ होव्रप आ दलओंठ १० ओटा लाइश्शा, आ होव्रप के मारेइ मारेइ रिम्शो कोसेली कुरशा लमाक्त।

मेकेर रे लशा, मेसोपोटामीया रागीमी नाहोर आ बाक्तीक सहर, अराम-नहराइम मेर जाक्दीम्माक्त। उत्पत्ती ११:२२-३१

11 मिनु मेकेर जाक्दीशशा, नाक्नाक्दो मीश मुरपुकी ब्वाक्कु दिथ जाक्ची ना, सहर मओव्रथु, दलओठपुकी इनार आ नेक्था नाइक्पदा बाक्त।

12 मिनु मेकोमी “परमप्रभु यावे, आं होव्रप अब्राहाम आ परमप्रभु, मुलाक्ती आं कली वारच पने। आं होव्रप कली इन गेना हना यो दाक्तीके कोइदीने। मेकोन पुंइनुड।

13 गो इनार आ नेक्था बाक्नुड। मिनु सहर डा मुर आन तमी ब्वाक्कु दिथ जाक्नीम।

14 गो मीश आल कली ‘इ गाग्री डा ब्वाक्कु इच्का तूचा गेयी’ देंनुड। मेको मीश आलमी ‘तूडो। गो इ दलओठ आन कली यो ब्वाक्कु तुंइनुड’ देंत हना, मेको मीश आल इन गेय पाइब इसहाक कली योव्रशो बाक्ल। मोदेशो दुम्त हना, गे आं होव्रप कली इन गेना हना यो दाक्तीके कोइताक्नी, दे गो तुइक्नुड” दे परमप्रभु कली लोव्र पवा बाक्त।

15 मोपा लोव्र पन पना, रेबेका माइशशो मीश आल का गाग्री कुरशा जाक्माक्त। मेको रेबेका बेथुएल आ तमी बाक्माक्त। बेथुएल चहिं अब्राहाम आ लोकब नाहोर नु आ मीश मिल्का आस तौ बाक्माक्त। उत्पत्ती २२:२३

16 रेबेका थम दारशो मीश आल बाक्माक्त। मिनु ग्युंबे मपथु, कन्ने बाक्शो बाक्माक्त। मिनु इनारम तोइशशा, आ गाग्री प्रिंशा बेप मुप्शा डोंइसे बाक्त।

17 मिनु मेको वाइल रेबेका कली ग्रुमथ दोरमाक्त। मिनु “इ गाग्री डा ब्वाक्कु इच्का तूचा गेयी” दे पुना बाक्त।

18 मिनु रेबेकामी आ गाग्री रीब पा नाइशशा, तूचा गेवा बाक्त।

19 मिनु तूचा गेने थुम्शा “गो इन दलओठ आन कली यो ब्वाक्कु चाक्शा, मरूमा सम्म तुंइनुड” देंमाक्त।

20 मिनु आ गाग्री डा ब्वाक्कु मेकेर बाक्शो शुंगुमी मोइशशा,

दोरशा ब्वाक्कु ब्रथ लमाक्त। दलओंठ नेल्ल आन कली मरूमा सम्म ब्वाक्कु तुंडदा बाक्त।

21 मिनु मेको वाइल छक लाक्शा, मेको कली कोव्रशा, परमप्रभु यावे आ योव्रशो मीश आल बाक्म कों मबाक्म, दे ब्वालेइ पा बाक्माक्त।

22 मिनु दलओंठ रूथ्री ब्वाक्कु तूडमे नोले वाइलम आधी शेकेल सुन के मुन्द्री नु १० शेकेल सुन के चुरा निक्शी शोल्शा, रेबेका कली गेवा बाक्त। शेकेल का ११.५ ग्राम बाक्ब।

23 मिनु वाइलमी “गे सु का आ तमी नवे? आं कली देनो। इ आफ आ खिंम आंइ कली बास बाक्चा गेनीमी कों?” दे हिल्लो पवा बाक्त।

24 मिनु रेबेकामी “गे बेथुएल आ तमी नड। बेथुएल चहिं नाहोर नु मिल्ला आस तौ बाक्ब।

25 आंइ खिंम नल नु जचा थोव्रक शुश बाक्ब। बास बाक्तीक यो बाक्ब” दे मदा बाक्त।

26 मिनु वाइलमी खुम्की पा बाप्शा, परमप्रभु यावे आ डोंइती गु बाप्शा बाक्माक्त।

27 मिनु मेकोमी “परमप्रभु यावे, आं होव्रप अब्राहाम आ परमप्रभु, गे ठेयब बाक्नीनी। गे इन शिशी नु इन रिम्शो पशो मप्रोंइथु, आं होव्रप कली कोंइताक्नी। गे आं कली आं होव्रप आ लोक्ब आ खिं कोंइताक्यीनी” दे परमप्रभु यावे कली ठेयब सेला बाक्त।

28 मिनु रेबेका दोरशा खिं लेशशा, आ ममा आ खिं डा मुर आन कली मार मार दुम्मे, मेको नेल्ल देंमाक्त।

29 मिनु लाबान माइशो, रेबेका आ लोक्ब का बाक्माक्त। मेको दोरशा, इनारम मेको मुर कली गुम्थ लमाक्त।

30 मारदे हना मेकोमी आ समी आ मुन्द्री नु चुरा तशा “मेको मुरुम आं कली मोदेशो लोव्र पाप्तु” देशो नेंशा, लाबान मेको मुर कली गुम्थ लमाक्त। मेको मुर आ दलओंठ नु इनारम बाक्शो बाक्माक्त।

31 मिनु लाबानम मेको कली “परमप्रभु यावे आ आसीक राइब, गे मारदे मेकेर बाक्नीनी? आंइ खिं पिने। गे नु इन दलओंठ आन

कली मारेइ मारेइ ठीक पाता” देंमाक्त।

32 मिनु वाइल खिं ओव्रमाक्त। लाबानमी दलओंठ तार वोइशशो नेल्ल शोल्शा, थुल्चा कली नल लाप्ता बाक्त। मिनु मेको मुर नु आ गेय पाइब आन कली खोइल चिक्चा कली ब्वाक्कु यो गेवा बाक्त।

33 नोले मेको आ डोंइती जचा थोव्रक खेत्मे बाक्त। मेकोमी चहिं “गो मारदे पिडा, इन कली मदेंडा सम्म मजाइनुड, मब्वाइनुड” देंमाक्त। मिनु लाबानमी “इन के मार लोव्र बाक्मे? लो देनीन” देंमाक्त।

34 मिनु वाइलमी “गो अब्राहाम आ वाइल नड।

35 मिनु परमप्रभु यावेमी आं होव्रप कली शुश आसीक गेप्टु। मिनु शुश शोंप पाइशशो दुम्त। मेकोमी मेको कली क्यारश भेडा, सुन चांदी, वाइलीम वाइल, दलओंठ नु गधा शुश गेप्टु।

36 मिनु आं होव्रप आ मीश सारामी खाल्पी दुम्शा, अब्राहाम के तौ का थिप्टु। मिनु अब्राहामम आ तौ कली आ मारेइ मारेइ नेल्ल गेप्टु।

37 मिनु आं होव्रपमी आं कली ‘आं तौ कली आं बाक्शो कनान रागी डा मुर आन तमी मचाक्को।

38 गे आं आफ आं खिं नु आं मुर आन खिं रे मीश आल का चाक्को’ दे कसम जपाइक्ती।

39 मिनु गो आं होव्रप कली ‘मीश आल एको रागी जाक्ने मबिप्बा, कोर में’ देंती।

40 मेकोमी चहिं ‘गो परमप्रभु यावे आ डोंइती गाक्नुड। मेकोमी आ स्वर्ग डा गेय पाइब गे नु सोइक्ब। मेकोमी इ कली वारच पाइब। मिनु आं तौ कली आं मुर आन खिं नु आं आफ आं खिं रे मीश आल का चाक्को।

41 आं खिं डा मुर आन बाक्तीके जाक्दीशशा, मीश आल का मगेतेमी हना, गे कसम मजशो खोदेशो दुम्नेवे’ दे आं होव्रपमी आं कली माइक्ती।



42 मिनु मुलाक्ती इनारम जाक्शा, गो 'परमप्रभु यावे, आं होव्रप, अब्राहाम आ परमप्रभु, गे आं कली वारच पने।

43 गो इनार आ नेक्था बाक्नुड। मिनु मीश आल ब्वाक्कु दिथ जाक्मानु, मीश आल कली इ गाग्री डा ब्वाक्कु इच्का तूचा गेयी, देंनुड।

44 मिनु मेको मीश आलमी तूडीन, गो इन दलओंठ आन कली यो ब्वाक्कु तुंडनुड, देंत हना, मेको मीश आल आं होव्रप आ तौ कली परमप्रभु यावेमी योव्रशो बाक्ल' देंती।

45 मिनु गो आं थुंमी लोव्र पने मथुमथु, रेबेका आ गाग्री मुप्शा पित। मिनु इनारम ब्वाक्कु कीथ तोंइसाक्व। मिनु गो 'आं कली इच्का तूचा गेयी' दे माइक्ता।

46 मिनु मेकोमी आ गाग्री रीब पा नाइश्शा 'तूडो। गो इन दलओंठ आन कली यो तुंडनुड' देंत। मिनु गो तूता। मेकोमी आं दलओंठ आन कली ब्वाक्कु तुंडताक्व।

47 मिनु गो 'गे सु का आ तमी नवे?' दे हिल्लो पडानु 'गो बेथुएल आ तमी नड। बेथुएल नाहोर नु मिल्ला आस तौ बाक्ब' दे माइक्ती। मिनु गो आ नेमी मुन्द्री पाइक्ताक्ड, आ गुइमी चुरा लिक्ताक्ड।

48 मिनु गो परमप्रभु यावे आ डोंइती गु बाप्शा 'परमप्रभु यावे, आं होव्रप अब्राहाम आ परमप्रभु, गे रिम्शो पाइब बाक्नीनी' दे ठेयब सेल्ता। मारदे हना आं होव्रप आ लोक्ब आ खिं डा मुर रे आ तौ कली तमी चाक्चा कली रिम्शो लां कोंइताक्यी।

49 मिनु 'गे आं होव्रप कली शिशी नु रिम्शो पचा मप्रोंइतीनी हना, आं कली देनीन। मेको पचा मदाक्नीनी हना यो देनीन। मारदे हना गो ग्युरा पेरा गे लचा माल्नुड' ” दे लोव्र पवा बाक्त।

50 मिनु लाबान नु बेथुएलमी “मेको नेल्ल परमप्रभु यावे आ पशो बाक्ब। मार पाइनस्कु मार देंनस्कु डा।

51 लो, रेबेका कली लतो। मिनु लावो। इन होव्रप आ तौ आ मीश दुम्ल। दोपा परमप्रभु यावेमी लोव्र पवा, मोपा दुम्ल” देंसा बाक्त।

52 मिनु अब्राहाम आ वाइलम मेको लोत्र नेंशा, परमप्रभु यावे आ डोंडती खुम्की पा बाप्शा, मेको कली ठेयब सेला बाक्त।

53 मिनु आ गेय पाइबमी सुन नु चांदी के गहना नु दारशो वासी रेबेका कली गेमे बाक्त। आ लोकब नु आ ममा आस कली यो मार मार गेमे बाक्त।

54 मिनु जशा तूशा, आ गेय पाइबपुकी नु नाकदो बाक्मा बाक्त। मिनु सुनी कना बोक्मानु, वाइलमी “आं होत्रप आ बाक्तीक लेत्चा गेयीनी” देंमाक्त।

55 मिनु रेबेका आ लोकब नु आ ममामी “रेबेका १० नाक्त सम्म बाक्ल, कोर में। मिनु नोले लन” देंसा बाक्त।

56 मिनु वाइलमी “परमप्रभु यावेमी आं कली आसीक गेशा, रिम्शो पा वारच पाइक्ती। मोपतीके आं कली मक्योल्यीनी। आं होत्रप आ बाक्तीक लेत्चा गेयीनी” देंमाक्त।

57 मिनु मेको निक्शीम “रेबेकामी मार देंबा, मेको नेंय” देंसा बाक्त।

58 मिनु रेबेका कली ब्रेशशा “एको मुर नु लाइनेवे?” दे हिल्लो पाम्सेनु “गो लाइनुड” देंमाक्त।

59 मिनु नोले आ समी रेबेका नु आ कली वारच पाइब, अब्राहाम आ वाइल नु आ गेय पाइब आन कली सोइक्तमे बाक्त।

60 लचा डोंडती रेबेका कली आसीक गेशा “गे आं समी बाक्नेवे। सोशा बोशा, शुश दुमीने। इ चच युइ आन कली आन जोरी सत्रु आन कली ग्राडीन” दे आसीक गेमे बाक्त। उत्पत्ती २२:१७

61 मिनु नोले रेबेका नु आ वारच पाइब बोक्शा, दलओंठ डोइश्शा, मेको मुर नु लसा बाक्त। मोपा वाइलमी रेबेका कली लाइश्शा, आ होत्रप आ खिं लेम्माक्त।

62 मिनु इसहाक बेयर-लहाइ-रोइ माइश्शो ब्वाक्कु बुक्तीके रे पिमाक्त। मारदे हना दक्खिन रागी नेगेबम बाक्शो बाक्माक्त। उत्पत्ती १६:१४; उत्पत्ती २५:११

63 मिनु नाक्नाकदो रूमी हिरथ लमाक्त। मिनु कोत्रडानु, डोन रे दलओंठपुकी पिशो तवा बाक्त।

64 मिनु रेबेकामी इसहाक कली तशा, दलओंठ रे फ्रु तोंइसे बाक्त।

65 मिनु अब्राहाम आ वाइल कली “मेरे इं कली ग्रुथ पीब मुर सु में?” दे हिल्लो पवा बाक्त। मिनु वाइलमी “आं होत्रप बाक्ब” देंमाक्त। मेको नेंशा, रेबेकामी आ कुप्नीम कुल सुम्से बाक्त।

66 मिनु वाइलमी इसहाक कली मार मार दुम्मे, मार मार पवा, नेल्ल शेंदा बाक्त।

67 मिनु इसहाकम रेबेका कली आ ममा सारा आ ताम्बुम ओंइदा बाक्त। मिनु नोले ग्युंवे पाम्से बाक्त। मिनु इसहाकम आ मीश कली दाक्ता बाक्त। मोपा इसहाक आ ममा बेक्शो प्रेंदा बाक्त। उत्पत्ती २३:१-२

## 25

### अब्राहाम आ चच युइ

1 मिनु अब्राहामम अर्को मीश चाक्गा बाक्त। मेको आ नें केतुराह बाक्माक्त।

2 मिनु मेकोमी अब्राहाम रे जिम्नान, योकशान, मेदान, मिदयान, इशबाक नु शुआह थिमाक्त।

3 मिनु योकशानमी शेबा नु देदान थिम्सी बाक्त। देदान आ तौपुकी अश्शुरीम, लेतुशीम नु ले-उम्मीम बाक्मा बाक्त।

4 मिनु मिदयान आ तौ एफाह, एफेर, हनोक, अबीदा नु एल्दाह बाक्मा बाक्त। मेको नेल्ल केतुराह आ चच युइ बाक्मा बाक्त।

5 मिनु अब्राहामम आ मार मार नेल्ल इसहाक कली गेवा बाक्त।

6 अब्राहाममी आ मबेक्थुन अर्को मीश आन तौ आन कली मार मार कोसेली गेमी बाक्त। मिनु आ तौ इसहाक रे फ्राशा, पूर्व डा रागीम बाक्मल, दे पूर्व गे सोइक्तीमी बाक्त।

### अब्राहाम बेक्शो

7 मिनु अब्राहाम नेल्ल पा सहे का ७५ बर्स ब्रोंइमाक्त। उत्पत्ती १२:४

8 मिनु नोले शुश बर्स डा खाल्पा दुम्शा बेक्शा, आ किकी पिपी नु लमाक्त। उत्पत्ती १५:१५

9 मिनु इसहाक नु इश्माएल आ तौ निक्शीमी आ बेक्शो रां माक-पेला माइश्शो रू डा पुक्खीमी लाइश्शा, वोदसे बाक्त। डोंइती मेको रू सोहार आ तौ एफ्रोन आ रू बाक्माक्त। एफ्रोन हिती का बाक्माक्त। मेको रू माग्ने आ पूर्ब गे बाक्माक्त। उत्पत्ती २३:१३-२०

10 अब्राहाममी मेको रू हिती आ मुर रे ग्याप्शो बाक्माक्त। मेकेर डोंइती आ मीश सारा कली नोले अब्राहाम कली वोदमे बाक्त।

11 मिनु अब्राहाम बेक्म नोले परमप्रभुमी इसहाक कली आसीक गेवा बाक्त। मेना इसहाक बेयर-लहाइ-रोइ माइश्शोमी बाक्शो बाक्माक्त। उत्पत्ती १७:१९; उत्पत्ती २४:६२

### इश्माएल आ चच युइ

12 सारा आ वाइलीम इजीप्त डा हागार रे जरमेशो अब्राहाम आ तौ इश्माएल बाक्माक्त। उत्पत्ती २१:१३

13 इश्माएल आ तौ सु सु बाक्मा बाक्त देशा हना, आ डोंइती जरमेशो तौ नेबायोथ बाक्माक्त। मिनु नोले थिशो आन नें केदार, अदबेल, मिब्साम,

14 मिश्मा, दुमा, मस्सा,

15 हादाद, तेमा, येतुर, नाफीश नु केदमा बाक्मा बाक्त।

16 एको इश्माएल आ तौ आन नें, आन बाक्तीके आन नें बाक्मा बाक्त। मेको नेल्ल आन थर डा ठेयब मुर बाक्शो बाक्मा बाक्त। उत्पत्ती १७:२०; गन्ती १:४४

17 इश्माएल नेल्ल पा सहे का ३७ बर्स ब्रोंइमाक्त। मिनु बेक्शा, आ किकी पिपी नु लमाक्त।

18 आ तौपुकी हवीलाह रे इजीप्त लतीक लां शुर सम्म बाक्शो बाक्मा बाक्त। शुर रागी इजीप्त आ डोंइती अस्सुर गे बाक्ब। इश्माएल चहिं आ लोकब नेल्ल आन दातेमी बाक्माक्त। उत्पत्ती १६:१२

इसहाक आ तौ निक्शी

19 इसहाक अब्राहाम आ तौ बाक्माक्त।

20 इसहाक ४० बर्स दुम्मेनु, रेबेका चाक्गा बाक्त। रेबेका चहिं अरामी पदान-अराममी बाक्ब बेथुएल आ तमी, लाबान आ समी बाक्माक्त।

21 मिनु इसहाकमी परमप्रभु यावे कली आ मीश आ पर्बम पुना बाक्त। मारदे हना आल मथीब बाक्माक्त। परमप्रभु यावेमी आ पुंइशो गेवा बाक्त। मिनु रेबेकामी कोव्रज कुरा बाक्त।

22 मिनु आल निक्शी आ कोव्रजम राम्शी पाम्से बाक्त। मिनु रेबेकामी “मुल ओदेशो दुम्ती हना, मार दुम डा? दोपा ब्रोंइनुडा डा?” दे मिम्ता बाक्त। मिनु परमप्रभु यावे कली “मार दुम्नुडा?” दे हिल्लो पवा बाक्त।

23 मिनु परमप्रभु यावेमी मेको कली “इ कोव्रजम जात निक्शी डा मुर बाक्नीसी। मेको जात निक्शी फ्राचा पुंइसीनीस। का अर्को क्येडा बोल्यो बाक्ब। डोंइती जरमेशो चहिं कान्छा आ गेय पाइब दुम्ब” दे शेंदा बाक्त। उत्पत्ती २७:२९; मलाकी १:२; रोमी ९:१०-१२

24 मिनु रेबेकामी आल थिमेनु, जौले बाक्सा बाक्त।

25 मिनु डोंइती डा आ राम वा फेक्शो खोदेशो पा लल चां पाइशो वोंइश आल का थिमाक्त। मिनु मेको कली एसाव नें वोदा बाक्त।

26 मिनु नोले आ लोकबमी आ लोकब आ गेंग्रे ग्याइशशा गूम्याक्त। मोपतीके आ नें याकूब वोदा बाक्त। रेबेका आल थिची ना इसहाक ६० बर्स दुम्शो बाक्माक्त। होसे १२:४

27 मिनु मेको तौ निक्शी कोल्सानु, एसाव जोक्ब सिखारी दुम्माक्त। नेल्ल नाक्त ब्वाकीम बाक्चा दाक्ता बाक्त। याकूब चहिं ताम्बुम बाक्ब नु रू डा गेय पा, सिक्सी पा बाक्ब दुम्माक्त।

28 इसहाकम एसाव कली दाक्ता बाक्त। मारदे हना आ चाक्शो सिखार ब्ववा बाक्त। रेबेकामी चहिं याकूब कली दाक्ता बाक्त।

डोंइती जरमेशो तौ आ अधिकार

29 मिनु काबु याकूबमी खोले क्येवानु, एसाव ब्वाकी रे शोत्रलु बेक्शा जाक्माक्त।

30 मिनु एसावमी याकूब कली “इ क्येशो लल दाल खोले इच्का गेयी। गो शोत्रलु बेक्ती” देंमाक्त। मोपतीके एसाव कली एदोम माइशो याइनी नें वोइशो बाक्माक्त।

31 मिनु याकूबमी “मुलाक्ती डोंइती जरमेशो तौ इ आसीक आं कली गेयी” देंमाक्त।

32 मिनु एसावमी “मुल गो बेक्चता डोंइती जरमेशो तौ आ तचा डा आसीकम मार दुम्बा डा?” देंमाक्त।

33 मिनु याकूबमी “गो मुलाक्ती गेतन, दे कसम जावो” दे मदा बाक्त। मिनु एसावमी याकूब कली “डोंइती जरमेशो तौ आं आसीक इ केन दुम्ल” दे कसम जवा बाक्त। उत्पत्ती २७:३६; हिब्रू १२:१६

34 मिनु नोले याकूबमी एसाव कली शोब्ले नु दाल खोले खेत्ता बाक्त। मिनु मेको जशा तूशा बोक्शा लमाक्त। मोपा एसावमी “डोंइती जरमेशो तौ आ ततीक आसीक ममाल्नुड” दे प्रोना बाक्त।

## 26

### इसहाक गेरार सहर लशो

1 मिनु नोले रागीमी अन्काल दुम्माक्त। डोंइती अब्राहाम बाक्मेनु यो, अन्काल दुम्शो बाक्माक्त। मिनु इसहाक पलिस्ती आन पिप अबीमेलेक आ रागी डा गेरार सहर लमाक्त।

2 मिनु परमप्रभु यावेमी इसहाक आ डोंइती गूमाक्त। मिनु इसहाक कली “इजीप्त रागी मलावो। आं देंशो रागीम बाक्थ लावो।

3 मेको रागीमी अर्को रागी डा मुर दुम्शा बाक्को। गो गे नु बाक्शा, इ कली आसीक गेनुड। गो इ कली नु इ चच युइ आन कली एको रागी नेल्ल गेनुड। गो इ आफ अब्राहाम नु कबल पा, कसम जाता। मुल आं कबल खाप्नुड। उत्पत्ती १७:१९; उत्पत्ती २२:१६-१७

4 इ चच युइ आन कली सरीड डा सोरुल खोदेशो पा शुश सेल्लुड। मेको आन कली एको रागी नेल्ल गेनुड। मिनु इ चच युइ आन पबर्म रागी रागी डा मुर नेल्ल आसीक ताइनीम।

5 मारदे हना अब्राहामम आं देशो टिशा, आ पचा माल्शो पाप्तु। आं शेंशो, आं फुल्लुम मुशा ब्रेक्शो लोव्र नु आं अरेशो नेल्ल पाप्तु” दे मदा बाक्त। उत्पत्ती १५:५

6 मिनु इसहाक गेरार सहर उइ बाक्माक्त।

7 मिनु अबीमेलेक आ मुरपुकीमी इसहाक कली आ मीश आ पबर्म लोव्र पामे बाक्त। मेकोमी चहिं “आं समी बाक्ब” दे लोव्र लेत्ता बाक्त। मारदे हना रेबेका शुश दारशो मीश मुर दुम्तीके “आं मीश बाक्ब” देंचा हिंमाक्त। मारदे हना “मेको कली तशा, लाइक्चा कली आ कली साइक्नीम” दे हिंशो बाक्माक्त।

8 मिनु इसहाक मेको रागीमी शुश बाक्शा, काबु पलिस्ती आन पिप अबीमेलेकमी झेल रे इसहाक नु आ मीश रेबेका चाल्शो तवा बाक्त।

9 मोपतीके अबीमेलेकमी इसहाक कली ब्रेशशा “नेनो, एको थमा पा इ मीश बाक्ब। दोपा ‘आं समी बाक्ब’ देंने?” दे हुइक्ता बाक्त। मिनु इसहाकमी “एको आ पबर्म आं कली साइक्नीमी, कों, दे हिंती” देंमाक्त।

10 मिनु अबीमेलेकमी “आंइ कली मार पवी? आं मुर का मेको नु इप्शो हना, गे आंइ कली शुश मरिम्शो मपपदी वा?” दे मदा बाक्त।

11 मिनु अबीमेलेकमी आ मुर नेल्ल आन कली “सुम मेको नु आ मीश आस कली मरिम्शो पाइबा, मेको थमा पा साइक्चा पुंइसीब” दे माइक्मी बाक्त।

12 मिनु इसहाकमी मेको रागीमी मार मार शोक्शा, मेको बर्सम गेडा का के सहे का गेडा सम्म सिप्पाइश्शा खेला बाक्त। मारदे हना परमप्रभु यावेमी इसहाक कली आसीक गेवा बाक्त। हितोपदेस १०:२२

13 मिनु शुश शोंप पाइश्शो दुम्शा, दारना दारन शुश क्येट थीब दुम्माक्त।

14 मेको आ क्यारश भेडा नु बी ब्यफ शुश दुम्मा बाक्त। मिनु वाइलीम वाइलपुकी यो शुश दुम्मा बाक्त। मोपतीके पलिस्तीपुकीमी गेहे पामे बाक्त।

15 मिनु पलिस्तीपुकीमी अब्राहाम आ गेय पाइब आन दोशो इनार खपीम प्रिंशा, ब्वाक्कु तेक्गमे बाक्त। उत्पत्ती २१:२२-३४

16 मिनु अबीमेलेकम इसहाक कली “आंइ क्येडा गे बोल्यो बाक्नीनी, मोपतीके एकेर रे लने” दे मदा बाक्त।

17 मिनु इसहाक नु आ मुरपुकी मेकेर रे लशा, गेरार डा दिंममी जाक्दीशशा, आन ताम्बु कीशा बाक्मा बाक्त।

18 मिनु इसहाकमी डोंइती अब्राहाम आ दोशो इनारपुकी, लेंशा दोपाइशशा, ब्वाक्कु गूपदा बाक्त। मारदे हना अब्राहाम बेक्म नोले पलिस्तीपुकीमी मेको इनार आन कली खपीम प्रिंशो बाक्मा बाक्त। मिनु मेको इनार आन कली आ आफ आ वोइशशो नें लेंशा वोदा बाक्त।

19 मिनु इसहाक आ गेय पाइबपुकीमी मेको दिंममी दोशा, ब्वाक्कु बुक्तीके थित्मे बाक्त।

20 मिनु गेरार डा गोठलापुकीमी इसहाक आ गोठला आन कली “एको ब्वाक्कु आंइ के बाक्ब” दे जीमे बाक्त। मोपतीके इसहाकम मेको इनार कली एसेक नें वोदा बाक्त। मारदे हना मेकोपुकी आ मुर नु जीमे बाक्त।

21 मिनु लेंशा अर्को इनार का दोत्रमे बाक्त। मेको आ पर्बम यो जीमे बाक्त। मेको कली सित्ना नें वोदा बाक्त।

22 नोले मेकेर रे लशा, अर्को इनार का दोत्रमे बाक्त। मेको आ पर्बम सुइमी जिचा मपोक्गमे बाक्त। मिनु मेको आ नें रेहोबोथ वोदा बाक्त। मिनु “मुल परमप्रभु यावेमी आंइ कली बाक्तीक गेवा बाक्त। गोपुकी एको रागीमी शुश दुम्कल” देंमाक्त।

23 मिनु मेकेर रे लशा, बेयर-शेबा जाक्दीम्मा बाक्त।

24 मिनु मेको नाक्दो परमप्रभु यावे गूशा “गो इ आफ अब्राहाम



आ परमप्रभु नड। महिनो। गो गे नु बाक्नुड, इ कली आसीक गेनन। आं गेय पाइब अब्राहाम आ पर्बम गो इ चच युइ आन कली शुश सेल्लुड” दे लोत्र पवा बाक्त।

25 मिनु इसहाकम मेकेर चढेतीक सेल्शा, परमप्रभु यावे आ नें थिशा ब्रेशा, मेको नु लोत्र पवा बाक्त। मिनु आ ताम्बु मेक उइ कीडा बाक्त। आ गेय पाइबपुकीमी मेकेर इनार का दोत्रमे बाक्त। उत्पत्ती १२:८

इसहाक नु अबीमेलेक सल्ला पशो

26 काबु अबीमेलेक, आ अर्ती गेब अहुज्जाथ नु आ फौज डा ठेयब कप्तान फीकोल नु गेरार सहर रे जाक्शा, इसहाक कली ग्रुम्मे बाक्त।

27 मिनु इसहाकमी “गेपुकी आं कली मदाक्थु, इन बाक्तीके रे सोइक्ताक्यीनी। मुल मारदे आं कली ग्रुम्थ जाक्नी?” दे हिल्लो पवा बाक्त।

28 मिनु मेकोपुकीमी “परमप्रभु यावे गे नु बाक्ब, गो तुइक्नीकी। मोपतीके गोपुकीमी ‘गे नु कसम जशा, कबल पचा’ रिम्शो दुम्ब। ब्यवस्था २९:३; मत्ती १३:१३

29 गे आंइ कली श्येत मगेने। गोपुकीमी यो इन कली श्येत मगेथु, रिम्शो पा लडाइ मपथु सोइक्ताक्क। गे परमप्रभु यावे आ आसीक राइब बाक्नीनी” दे इसहाक कली देंमा बाक्त।

30 मिनु इसहाकम मेको आन कली भोज सेला बाक्त। मिनु मेकोपुकीम जामे, तूडमे बाक्त।

31 मिनु मेकोपुकी आ दीसा सुनी कना बोक्शा, कसम जामे बाक्त। मिनु नोले इसहाकमी मेको आन कली लचा गेवा बाक्त। मिनु आन थुं नाइशशा लमा बाक्त।

32 मेको नाक्ती इसहाक आ गेय पाइबपुकी जाक्शा, इसहाक कली “आंइ दोतीकेमी ब्वाक्कु गूत” दे शेंदमे बाक्त।

33 मिनु मेको इनार कली शिबा नें वोदा बाक्त। मोपतीके मेको सहर आ नें मुल सम्म बेयर-शेबा बाक्ब।

एसाव आ मीश निकशी

34 एसाव ४० बर्स दुम्मेनु, हिती आ मुर बेयरी आ तमी युदीथ नु हिती आ मुर एलोन आ तमी बासेमाथ चाकसी बाक्त। उत्पत्ती ३६:२-३

35 मिनु मेको निकशी आस पबर्म इसहाक नु रेबेका थुं मनुथु, शुश सुर्ता पाम्से बाक्त।

## 27

इसहाकमी आसीक गेशो

1 मिनु इसहाक खाल्पा दुम्शा, ब्राब्रा पा मिक्च मताइब दुम्माक्त। मिनु मेकोमी आ डोंइती जरमेशो तौ एसाव कली “आं तौ” दे ब्रेत्ता बाक्त। मिनु एसावमी “मार देंनी?” दे लोव्र लेत्ता बाक्त।

2 मिनु इसहाकमी “नेनो, गो खाल्पा दुम्ती, आं बेक्ची ना मतुइक्नुड।

3 इ लिब्रा लाइश्शा, सिखार ग्यारथ लावो। मिनु आं कली सिखार चाक्को।

4 मिनु नोले आं दाक्शो ब्रोव्रब्रोव्रशो क्येशा, गेयी। गो आं बेक्चा क्येडा डोंइती जशा ब्वशा, इ कली आसीक गेनुड” देंमाक्त।

5 मिनु रेबेकामी इसहाक नु एसाव लोव्र पशो नेंशो बाक्माक्त। मिनु एसाव ब्वाकी सिखार ग्यारथ लमेनु,

6 रेबेकामी आ तौ याकूब कली “आं तौ नेनो, गो इ आफोमी एसाव कली लोव्र पशो नेंता।

7 मेकोमी एसाव कली ‘आं कली सिखार चाक्को। ब्रोव्रशो क्येवो। गो जशा ब्वशा नोले परमप्रभु यावे आ डोंइती आं बेक्चा क्येडा डोंइती इ कली आसीक गेनुड’ देंत।

8 मोपतीके आं तौ, आं देंशो टिवो। दोपा अरेना, मोपा पावो।

9 मुल गोठ लावो। क्यारश आन दाते रे रिम्शो पाठा निकशी चाक्को। मिनु गो इ आफ कली आ दाक्शो ब्रोव्रशो क्येनुड।

10 मिनु गे चहिं लाइशशा, इ आफ कली खेत्तो। मेकोमी जशा ब्वशा, आ बेक्चा क्येडा डोंइती इ कली आसीक गेवल” देंमाक्त।

11 मिनु याकूबम आ ममा कली “नेनीन, आं लोक्ब एसाव शुश चां पाइशशो बाक्ब। गो मोदेशो मनड। उत्पत्ती २५:२५

12 मिनु आं आफोम आं कली थिशा, तुइक्ब। मिनु गो जोल पाइब दुम्शा, आसीक मतथु, सराप राइनुड” देंमाक्त।

13 मिनु आ ममामी “इ कली पशो सराप गो रडल, आं तौ। गे आं देशो पावो। पाठा निक्शी ब्रथ लावो” देंमाक्त।

14 मिनु याकूबम गोठ लशा, पाठा निक्शी चाक्शा, आ ममा कली गेवा बाक्त। मिनु आ ममामी आ आफ कली आ दाक्शो ब्रोव्रशो श्ये क्येवा बाक्त।

15 मिनु रेबेकामी आ खिंमी वोइशशो आ डोंइती जरमेशो तौ एसाव आ नक वा लाइशशा, आ कान्छा याकूब कली फेक्पदा बाक्त।

16 मिनु मेको पाठा आस कुशुल याकूब आ गुइ तारी नु आ शुर तारी क्येप्ता बाक्त।

17 मिनु आ क्येशो ब्रोव्रशो श्ये नु शोब्ले याकूब कली गेवा बाक्त।

18 मिनु याकूबम आ आफ बाक्तीके लशा, मेको कली “आं आफ” देंमाक्त। मिनु “गो बाक्ती। आं तौ, गे सु नवे” दे हिल्लो पवा बाक्त।

19 याकूबम आ आफ कली “गो इन डोंइती जरमेशो तौ, एसाव, नड। इन पुंइशो गो पाता। बोक्शा निशशा, आं सिखार ब्वने। मिनु आं कली आसीक गेयीनी” देंमाक्त। लेवी १९:१४

20 मिनु इसहाकमी “गिश रीब पा पवी, आं तौ?” दे हिल्लो पवा बाक्त। मिनु “परमप्रभु यावे, इन परमप्रभुमी सिखार आं नेक्था चाक्तु” देंमाक्त।

21 मिनु इसहाकम याकूब कली “आं नेक्था पिवो। इ कली थीनन, आं तौ। गे थमा पा, आं तौ एसाव नवे कों, मनवे” दे मदा बाक्त।

22 मिनु याकूब आ आफ आ नेक्था लमाक्त। इसहाकम मेको

कली सुल्शा “आ सेंदा याकूब के बाक्त, आ गुइ चहिं एसाव के बाक्त” देंमाक्त।

23 मिनु मेको कली मतुइक्ता बाक्त। मारदे हना आ गुइ एसाव खोदेशो पा चां पाइश्शो बाक्माक्त। मोपतीके आसीक गेवा बाक्त।

24 मिनु “गे थमा पा आं तौ एसाव नवे?” दे हिल्लो पवानु “गो नड” देंमाक्त।

25 मिनु इसहाकम “लो, इ सेल्शो जचा ब्वचा थोव्रक चाक्को। इ कली आसीक गेनन” देंमाक्त। मिनु याकूबमी चाक्गा बाक्त। मिनु आ आफोम ब्ववा बाक्त। मिनु याकूबमी अडगुर शांबु यो चाक्शा, गेवा बाक्त। मिनु मेको यो तूडा बाक्त।

26 मिनु आ आफ इसहाकम “आं नेक्था पिवो, आं कली पुक्पु पावो, आं तौ” देंमाक्त।

27 मिनु आ नेक्था लशा, पुक्पु पवा बाक्त। इसहाकमी आ वा आ रिना नाम्शा, आसीक गेवा बाक्त। मिनु मेकोमी “आं तौ आ रिना परमप्रभु यावेमी आसीक गेशो रू आ रिना खोदेशो बाक्ब।

28 परमप्रभुमी इ कली सरीड डा सीत रे नु रिश्शो खप रे शुश चेरब नु अडगुर शांबु गेवल।

29 मुरपुकीम इ कली गेय पामेक्ल। रागी रागी डा मुरपुकी इ डोंइती खुम्की पा बाम्मल। इ लोकब आन दातेमी गे ठेयब दुमो। इ ममा आ तौपुकी इ डोंइती बाम्मल। सु सुम इ कली सराप पामे, मेको आंमान रमल। सु सुम इ कली आसीक गेमे, मेको आसीक रमल” दे आसीक गेवा बाक्त। उत्पत्ती २३:२५; उत्पत्ती १२:३

30 मिनु इसहाकमी आसीक गेवा नोले, याकूब आ आफ आ बाक्तीक रे लमेनु, आ लोकब एसाव आ सिखार ग्यारतीक रे जाक्माक्त।

31 मेकोमी ब्रोव्रशो श्ये क्येशा, आ आफ आ बाक्तीके जाक्शा, आ आफ कली “आं आफ बोक्कीन। आं सिखार ब्वशा, आं कली आसीक गेयीनी” देंमाक्त।

32 मिनु आ आफ, इसहाकमी मेको कली “गे सु नवे?” दे हिल्लो

पवानु “गो इन डोंइती जरमेशो तौ, एसाव नड” देंमाक्त।

33 मिनु इसहाक शुश ख्रिंख्रि पा “सुमी आं कली सिखार चाक्गा? इ जाक्चा क्येडा डोंइती गो जाता। मिनु आसीक गेता। आं आसीक लीब” देंमाक्त।

34 मिनु एसाव आ आफ आ लोव्र नेंशा, ठेयब सेंदा पा डाक्माक्त। मिनु आ आफ कली “आं आफ, आं कली यो आसीक गेयीनी” देंमाक्त। हिब्रू १२:१७

35 मिनु “इ लोकब जाक्शा, जोल पशा, इ आसीक रोइक्ताक्व” देंमाक्त।

36 मिनु एसावमी “आ नें याकूब दुम्शो, ठीक बाक्ब। मुल आं कली निक्शी खेयप ठगेती। आं डोंइती जरमेशो तौ आ अधिकार रोइक्ताकयी। मुल आं आसीक यो लाइक्तु। गे आं कली आसीक महेंदीनी?” दे डाक्शा, देंमाक्त। उत्पत्ती २५:२६; उत्पत्ती २५:३३

37 मिनु इसहाकम एसाव कली “नेनो, गो मेको कली इ प्रभु सेलता। आ लोकब नेल्ल आन कली मेको आ गेय पाइब सेलता। चेरब नु अडगुर शांबु शुश ग्रेल्मल, दे लोव्र पाता। मिनु इ कली मार गेनना डा, आं तौ?” दे लोव्र पवा बाक्त।

38 मिनु एसावमी आ आफ कली “इन के आसीक का ला बाक्बा डा, आं आफ? आं कली यो आसीक गेयीनी” दे शुश डाक्माक्त।

39 मिनु आ आफ इसहाकम “नेनो, मलिलो खप नु सरीड डा सीत इ बाक्तीक रे डोन बाक्ब।

40 इ तरवारम इ गेय पाइनेवे। इ लोकब कली गेय पाइनेवे। २राजा ८:२०,२२ गे बोल्यो दुम्ते हना, आ जुवा इ शुर रे ताइक्नेवे” दे एसाव कली यो आसीक गेवा बाक्त।

41 मिनु एसावमी आ आफोम याकूब कली गेशो आसीक लोव्र आ पर्बम, याकूब कली काइ मदाक्ता बाक्त। आ थुंमी “आं आफ बेक्शा रोंका पने थुम्शो नोले, आं लोकब याकूब कली साइक्नुड” दे मिम्ता बाक्त।

42 मिनु रेबेकामी आ तौ आ लोव्न नेना बाक्त। मिनु मेकोमी याकूब कली ब्रेशशा “नेनो, इ लोकबमी इ कली साइक्या कली मिम्ब।

43 मोपतीके आं तौ, गे आं देंशो पावो। बोक्को, आं लोकब लाबान आ बाक्तीके, हारान सहर प्रोक्को। उत्पत्ती २४:२९

44 इ लोकब आ गाइश्शो मनाइसे सम्म मेक उइ बाक्को।

45 मिनु इ लोकबमी इ पशो प्रेंशा, मचुरत हना, गो इ कली ब्रथ सोइक्नुड। गो दोपा नाक्त कामी आं मुर निकशी जाम्शो तने चाप्नुड डा?” दे आ तौ कली देंमाक्त।

46 मिनु रेबेकामी इसहाक कली “गो हित्ती आ तमी आस पर्बम बेक्चा डा दुम्ती। याकूबमी यो एको खोदेंशो पा एको रागी डा हित्ती आ तमी का चाक्तु हना, गो ब्रोंड्या मदाक्नुड” दे मदा बाक्त। उत्पत्ती २६:३४-३५

## 28

### याकूब कली सोइश्शो

1 मिनु नोले इसहाकमी याकूब कली अरेशा “गे कनान रागी डा मीश आल मचाक्को। उत्पत्ती २४:३

2 साशा, पदान-अराम इम्मा आ आफ बेथुएल आ खिं लावो। मिनु इम्मा आ लोकब लाबान आ तमी का चाक्को। उत्पत्ती २२:२३; उत्पत्ती २४:२९

3 मिनु नेल्ल क्येडा सक्ति पाइश्शो परमप्रभुमी इ कली आसीक गेवल। मिनु इ कली सोशा बोशा, शुश सेलल। हिक्ने मचाप्या डा पा शुश दुम्पदल।

4 अब्राहाम कली गेशो आसीक मुल इ कली नु इ चच युइ आन कली गेवल। इ मुल बाक्शो रागीम अर्को रागी डा मुर बाक्ते, तन्न परमप्रभुमी अब्राहाम कली गेपु। मेको इ कली दुम्ल” दे आसीक गेवा बाक्त।

5 मोदेशो पा इसहाकमी याकूब कली पदान-अराम डा मुर बेथुएल आ तौ आ खिं सोइक्ता बाक्त। मेको याकूब नु एसाव आस ममा आ लोकब लाबान बाक्माक्त।

6 मिनु एसावमी, इसहाकम याकूब कली आसीक गेशा, मीश चाक्चा कली पदान-अराम गे सोइश्शो तुइश्शा, आ आफ आ अरेशो “कनान रागी डा तमी मचाक्को” दे माइश्शो तुइक्ता बाक्त।

7 याकूबमी आम आफ आस कली टिशा, पदान-अराम गे लशो तवा बाक्त।

8 मिनु एसावम कनान रागी डा तमीपुकी आ आफ इसहाकम मदाक्शो तुइश्शा,

9 इश्माएल आ बाक्तीके लमाक्त। मिनु मीश निक्शी बाक्शा यो, अब्राहाम आ तौ इश्माएल आ तमी नेबायोथ आ समी महलाथ चाक्गा बाक्त। उत्पत्ती १६:१६; उत्पत्ती २६:३४; उत्पत्ती २५:१३

### याकूबमी डोमु तशो

10 मिनु याकूब बेयर-शेबा रे गाक्शा, हारान सहर गे लमाक्त।

11 मिनु बाक्तीके का जाक्दीश्शा, नाक्दो मेकेर बाक्माक्त। मारदे हना नां रिक्माक्त। मिनु फुल्लु तार आ पिया वोइश्शा इम्माक्त।

12 मिनु इम्मेनु, डोमुम खप रे सरीड थिशो क्रेसी का तवा बाक्त। मेको क्रेसीमी परमप्रभु आ स्वर्ग डा गेय पाइबपुकी तोइश्शो, डोइश्शो तवा बाक्त। यूहन्ना १:५१

13 मिनु क्रेसी आ डरम परमप्रभु यावे राप्शा, याकूब कली “गो परमप्रभु यावे, इ बाजे अब्राहाम नु इ आफ इसहाक आस परमप्रभु नड। मुल इ इप्शा बाक्तीक रागी इ कली नु इ चच युइ आन कली गेनन्नी।

14 इ चच युइ खप डा फुरक खोदेशो पा शुश दुम्नीम। सोशा बोशा, शुश दुम्शा, पूर्व, पच्छिम, उत्तर, दक्खिनम ब्रशा बाक्नीमी। गे नु इ चच युइ आन पर्वम रागी नेल्ल डा मुर आसीक ताइनीम। उत्पत्ती १३:१४-१५

15 गो गे नु बाक्शा, ते लाइनेवे, गो इ कली कोवनन। गो इ कली एको रागी लेप्पाइक्नन। मारदे हना गो इ कली मप्रोंइनन। इ कली मार मार देंडा, गो मेको नेल्ल पाइनुड” देंमाक्त।

16 मिनु याकूब आ निन्द्रा रे सेंसीशा “परमप्रभु यावे थमा पा एकेर बाक्ब। गो मतुइक्तु” देंमाक्त।

17 मिनु हिंशा “एको हिंचा डा बाक्तीके बाक्ब। परमप्रभु आ बाक्तीक खिं बाक्शा, सरीड डा लाप्चो बाक्ब” देंमाक्त। प्रस्थान ३:५

18 मिनु याकूब सुनी कना बोक्शा, आ पिया आगा डा वोइश्शो फुल्लु राप्पाइश्शा तेल लुक्ता बाक्त। उत्पत्ती ३५:१४-१५

19 मिनु मेको बाक्तीके कली बेथेल नें वोदा बाक्त। डोंइती मेको सहर आ नें लूज बाक्माक्त।

20 मिनु याकूबमी “परमप्रभु गो नु बाक्त हना, लां कोंइशा कोव्रती हना, जचा नु फेक्चा यो गेती हना,

21 थुं नाइश्शा, आं आफ आ खिं लेत्चा गेती हना, परमप्रभु यावे आं परमप्रभु बाक्ब” दे कसम जवा बाक्त।

22 मिनु परमप्रभु कली “आं राप्पाइश्शा वोइश्शो फुल्लु परमप्रभु आ खिं दुम्ल। आं कली मार मार गेनी, मेको के १० भागमी भाग का थमा पा इन कली गेनन्नी” देंमाक्त। उत्पत्ती ३५:१

## 29

याकूब लाबान आ खिं जाक्दीश्शो

1 मिनु याकूब लमे लमे, पूब डा मुर आन रागी जाक्दीम्माक्त।

2 मिनु कोव्रडानु, दिंम कामी इनार का तवा बाक्त। हुल सां भेडा मेकेर बाक्शो बाक्मा बाक्त। मारदे हना मेको आन कली मेको इनार डा ब्वाक्कु तुंइबाक्मा बाक्त। मेको इनार चहिं ठेयब फुल्लुमी सुम्शो बाक्माक्त।



3 मिनु भेडा आन हुल नेल्ल मेकेर खुम्सीशा, गोठलापुकीमी मेको इनार डा फुल्लु क्युकशा, भेडा आन कली ब्वाक्कु तुंडशा, नोले लेंशा इनार सुम्शा वोइक्बाक्मा बाक्त।

4 मिनु याकूबमी मेको भेडा गोठला आन कली “आं लोकबपुकी गे ते डा बाक्नीनी?” दे हिल्लो पवा बाक्त। मिनु मेकोपुकीमी “हारान डा बाक्नीकी” देंमा बाक्त।

5 मिनु याकूबमी “गे नाहोर आ तौ लाबान तुइक्नीनी?” दे हिल्लो पवा बाक्त। मिनु “गो तुइक्नीकी” दे लोव्र लेत्मे बाक्त। उत्पत्ती २४:१०,२४

6 याकूबमी “रिम्शो बाक्मे?” दे हिल्लो पवानु, मेकोपुकीमी “रिम्शो बाक्ब। ह्यु आ तमी राहेल आ भेडा नु जाक्त” देंमा बाक्त।

7 मिनु याकूबमी “चोकची मजाक्शो, भेडा आन कली ब्वाक्कु तुंडशा, जोपाइक्थ लतीन” देंमाक्त।

8 मिनु मेकोपुकीमी “हुल नेल्ल मखुम्सीथु, इनार डा फुल्लु मयाक्थु, भेडा आन कली ब्वाक्कु तुंडने मचाप्नीकी” दे लोव्र लेत्मे बाक्त।

9 मिनु याकूब मेकोपुकी नु लोव्र पवा सम्म, राहेल आ आफ आ भेडा नु जाक्माक्त। मेको गोठाल्नी बाक्माक्त।

10 मिनु याकूबमी आ मामा, लाबान आ तमी राहेल तवा बाक्त। मिनु मेको कली गुम्थ लशा, इनार डा फुल्लु याक्ता बाक्त। मिनु आ मामा आ भेडा आन कली ब्वाक्कु तुंडदा बाक्त।

11 मिनु राहेल कली चुप पाइश्शा डाक्माक्त।

12 राहेल कली “गो इ आफ आ बहिनी रेबेका आ तौ नड” देंमाक्त। मिनु राहेल दोरशा लशा, आ आफ कली मेको लोव्र शेंदा बाक्त।

13 मिनु लाबानमी आ भानीच याकूब जाक्शो लोव्र नेंशा, दोरशा मेको कली गुम्थ जाक्माक्त। मिनु मुप्शा, पुक्पु पा, आ खिं लदा बाक्त। मिनु याकूबमी लाबान कली शुश लोव्र शोव्रडा बाक्त।

14 मिनु लाबानमी “गे थमा पा आं खिं डा मुर बाक्नेवे” देंमाक्त।  
मिनु याकूब महिना का खोदेशो मेकेर बाक्माक्त।

15 मिनु लाबानमी याकूब कली “गे आं खिं डा मुर बाक्ते हना  
यो, आं कली मो गेय पचा ममाल्नेवे। मार पुंइनेवे, देनो” दे हिल्लो  
पवा बाक्त।

16 लाबान आ तमी निक्शी बाक्सा बाक्त। आ डोंइती जरमेशो  
आ नें लेआ नु कान्छी आ नें राहेल बाक्माक्त।

17 लेआ मदारशो बाक्माक्त। राहेल चहिं शुश दारशो बाक्माक्त।

18 याकूबम राहेल कली दाक्ता बाक्त। मिनु लाबान कली “इन  
कान्छी तमी राहेल आ पर्बम गो इन कली ७ बर्स गेय पाइनुड”  
देंमाक्त।

19 मिनु लाबानमी “अर्को मुर कली गेचा क्येडा इ कली गेचा  
रिम्शो बाक्ब। गो नु गेय पा बाक्को” देंमाक्त।

20 मिनु याकूबम राहेल आ पर्बम ७ बर्स गेय पवा बाक्त। मेको  
७ बर्स याकूब कली नाक्त का निक्शी खोदेशो पा लमाक्त। मारदे  
हना राहेल कली शुश दाक्ता बाक्त।

21 मिनु याकूबमी लाबान कली “आं मीश गेयीनी। ७ बर्स  
दुम्माक्त। मेको नु ग्युंवे पाइनुड” दे मदा बाक्त।

22 मिनु लाबानमी सहर डा मुर नेल्ल ब्रेशशा, भोज गेमी बाक्त।

23 मिनु नाक्नाक्दो लाबानमी आ तमी लेआ लाइशशा, याकूब  
कली गेवा बाक्त। मिनु याकूब मेको नु इम्माक्त।

24 लाबानमी आ तमी लेआ कली आ गेय पाइब वाइलीम जिल्पा  
गेवा बाक्त।

25 मिनु याकूब सुनी कना बोक्शा, आ मीश कोव्रडानु, लेआ  
बाक्माक्त। मिनु गाइशशा लाबान कली “गे आं कली मार पनी? गो  
इन कली राहेल आ पर्बम गेय मपडा डा? मारदे आं कली ठगेनी?”  
दे मदा बाक्त।

26 मिनु लाबानमी “आंइ रागीमी जेठी क्येडा डोंइती कान्छी  
मगेनीकी।

27 हप्ता का मेको नु बाक्को। नोले गो इ कली अर्को यो गेनन।  
गे अर्को ७ बर्स गेय पचा माल्नेवे” दे मदा बाक्त।

28 मिनु याकूब मेको बिश्शा, लेआ नु हप्ता का बाक्माक्त। मिनु  
नोले लाबानमी राहेल कली यो गेवा बाक्त।

29 लाबानमी आ तमी राहेल कली आ गेय पाइब वाइलीम  
बिल्हाह गेवा बाक्त।

30 मिनु याकूबम राहेल कली यो चाक्गा बाक्त। मिनु लेआ क्येडा  
राहेल कली शुश दाक्ता बाक्त। मिनु लाबान कली अर्को ७ बर्स गेय  
पवा बाक्त। लेवी १८:१८

### परमप्रभुमी लेआ आ श्येत तशो

31 मिनु परमप्रभु यावेमी याकूबमी लेआ कली मदाक्शो तशा  
“आल थीब दुम्ल” दे आसीक गेवा बाक्त। तन्न राहेल आल  
मथीब बाक्माक्त।

32 मिनु लेआ कोव्रज कुरशा, तौ का थिमाक्त। मेको आ नें रूबेन  
वोदा बाक्त। मारदे हना “परमप्रभु यावेमी आं श्येत ताप्तु। मुल रे  
आं वोंइशेम आं कली दाक्ब” देंमाक्त।

33 मिनु लेंशा कोव्रज कुरशा, तौ का नु थिमाक्त। मिनु “परमप्रभु  
यावेमी आं कली मदाक्शो तशा, अर्को तौ का यो गेती” देंशा, मेको  
आ नें सिमियोन वोदा बाक्त।

34 मिनु लेंशा कोव्रज कुरशा, अर्को तौ का थिमाक्त। मिनु “मुल  
रे आं वोंइश गो नु बाक्ब। मारदे हना गो तौ सां थीतामी” देंमाक्त।  
मोपतीके आ नें लेवी वोदा बाक्त।

35 मिनु लेंशा कोव्रज कुरशा, तौ का नु थिमाक्त। मिनु “गो  
परमप्रभु यावे कली ठेयब सेल्नुड” दे मेको कली यहूदा नें वोदा  
बाक्त। मिनु आल थिचा नांइसे बाक्त।

## 30

याकूब आ अर्को आल

1 मिनु राहेलमी “आल मथीब बाकडा बाक्त” दे तुइशशा, आ लोकब कली गेहे पवा बाक्त। मिनु याकूब कली “गे आं कली आल मगेतीनी हना, गो बेक्नुड” देंमाक्त।

2 मिनु याकूबमी राहेल आ लोत्र आ पर्वम गाइशशा “परमप्रभुमी इ कली आल मथीब सेल्लु। गो मेको क्येडा ठेयब नडा डा?” देंमाक्त। भजन संग्रह १२७:३

3 मिनु राहेलमी “गो इन कली आं गेय पाइब बिल्हाह गेनुड। मेकोमी आं कली आल थिचा माल्ब। मिनु आं के आल दुम्मल” देंमाक्त। उत्पत्ती १६:२

4 मिनु मेकोमी याकूब कली आ गेय पाइब बिल्हाह गेवा बाक्त। मिनु याकूब मेको नु इम्माक्त।

5 मिनु बिल्हाह कोत्रज कुरशा, तौ का थिमाक्त।

6 मिनु राहेलमी “परमप्रभुमी आं कली नाक्शा, आं पुंइशो नेंतु। मिनु आं कली तौ का गेती” देंमाक्त। मोपतीके आ नें दान वोदा बाक्त।

7 मिनु राहेल आ गेय पाइब बिल्हाहमी लेंशा कोत्रज कुरशा, अर्को तौ का थिमाक्त।

8 मिनु राहेलमी “गो आं लोकब नु परमप्रभु खोदेशो पा जिशा ग्राती” देंमाक्त। मोपतीके मेको आ नें नाप्ताली वोदा बाक्त।

9 मिनु लेआमी “लेंशा आल मथीनुड” दे मिम्शा, याकूब कली आ गेय पाइब जिल्पा गेवा बाक्त।

10 मिनु लेआ आ गेय पाइब जिल्पामी तौ का थिमाक्त।

11 मिनु लेआमी “रिम्शो दुम्त” दे आ नें गाद वोदा बाक्त।

12 मिनु लेआ आ गेय पाइब जिल्पामी अर्को तौ का नु थिमाक्त।

13 मिनु लेआमी “गो ग्येरसाक्यी। मारदे हना मीश मुरपुकीमी आं पर्वम ‘आसीक राइब बाक्ब’ देंनीम” देंमाक्त। मिनु आ तौ कली आशेर नें वोदा बाक्त।

14 मिनु काबु रूबेनमी चेरब रिक्ची ना आल थिपाइक्ब फल थिदा बाक्त। मिनु आ ममा लेआ कली गेवा बाक्त। मिनु राहेलमी

लेआ कली “इ तौ आ चाक्शो फल आं कली का निक्शी गेयी” देंमाक्त।

15 मिनु मेकोमी “गे आं वोंइश आ थुं रोइक्चा ला ममाइ, आं तौमी चाक्शो फल यो रोइक्नेवे?” देंमाक्त। मिनु राहेलमी “इ तौ आ फल आ पर्वम मुलाक्दो याकूब इ खिंम बाक्ल” देंमाक्त।

16 मिनु नाक्नाक्दो याकूब रू रे जाक्मेनु, लेआम ग्रुमथ लशा “गे आं खिंम बाक्चा मालनीनी। गो आं तौ आ चाक्शो फल इन पर्वम थाप्ताक्ड” देंमाक्त। मिनु मेको नाक्दो याकूब लेआ नु इम्माक्त।

17 मिनु परमप्रभुमी लेआ आ पुंइशो गेवा बाक्त। मिनु याकूब के ४ जना तौ थिशा नोले अर्को तौ का नु थिमाक्त।

18 मिनु लेआमी “परमप्रभुमी आं कली रिम्शो पाप्तु। मारदे हना गो आं गेय पाइब आं वोंइश कली गेता” देंमाक्त। मिनु आ नें इस्साकार वोदा बाक्त।

19 मिनु लेंशा कोव्रज कुरा बाक्त। मिनु ५ जना तौ थिशा यो, अर्को तौ का नु थिमाक्त।

20 मिनु “परमप्रभुमी आं कली रिम्शो पाप्तु। मुल आं वोंइश गो नु बाक्ब। मारदे हना गो ६ जना तौ थीतामी” देंमाक्त। मिनु मेको कली जबूलून नें वोदा बाक्त।

21 मिनु नोले तमी का यो थिमाक्त। मेको कली दीना नें वोदा बाक्त।

22 नोले परमप्रभुमी राहेल कली मिम्ता बाक्त। मिनु आ पुंइशो गेशा, आल थीब दुम्माक्त। १सामुएल १:१९

23 मिनु कोव्रज कुरशा, तौ का थिमाक्त। मिनु “परमप्रभुमी श्येत रे प्रोंइती” देंमाक्त। यसैया ४:१; लूका १:२५

24 मोपतीके आ नें योसेफ वोदा बाक्त। मिनु “परमप्रभु यावेमी आं कली अर्को तौ का नु गेयील” दे पुना बाक्त। उत्पत्ती ३५:१७-१९

याकूब शोंप पाइशो दुम्शो

25 मिनु राहेलमी योसेफ थिशा नोले याकूबमी लाबान कली “आं कली लचा गेयीनी। गो आं रागी, आं खिं लचा दाक्नुड।

26 आं मीशपुकी, आं आलपुकी नु आं कली लचा गेकी। गो एको तचा कली इन गेय पाता। गो इन कली दोदेशो रिम्शो गेय पडा, मेको गे तुइक्नीनी” देंमाक्त। उत्पत्ती २९:२०, ३०; उत्पत्ती ३१:४३

27 मिनु लाबानमी “गे आं कली दाक्नेवे हना, इच्का नु बाक्को। मारदे हना गे एक बाक्शा, परमप्रभु यावेमी इ गेय पतीके आं कली आसीक गेती, दे तुइक्नुड। उत्पत्ती ३९:५

28 गे मार माल्नेवे, मेको इ कली गेनुड” दे मदा बाक्त।

29 मिनु याकूबमी “गो दोदेशो गेय पडा, इन बी ब्यफ गिश दुम्मा, गे तुइक्नीनी।

30 आं जाक्ची ना का निक्शी बाक्तेक्मे, मुल शुश दुम्तेक्म। मिनु गो जाक्डा रे परमप्रभु यावेमी इन कली आसीक गेप्टु। मिनु आं खिं गेना कोव्रनुडा?” दे मदा बाक्त।

31 मिनु लाबानमी “गो मार गेचा माल्नुडा?” देंमेनु, याकूबमी “आं कली मारेइ गेचा ममाल्नीनी। आं देशो पाइतीनी हना, गो लेशा इन गोठला दुम्नुड।

32 गो मुलाक्ती इन क्यारश भेडा नेल्ल कोव्रथ लाइनुड। मिनु पुत्ले पाडग्रे नेल्ल गुंइनुड। क्यारश भेडा रे यो क्येर नु पुत्ले पाडग्रे गुंइनुड। मेको आं गाल्च दुम्नीम।

33 मोदेशो दुम्मेनु, आं ठीक पतीके तुइक्नीनी। तेको क्यारश आन दातेमी पुत्ले पाडग्रे मपाइश्शो नु पाठा आन दातेमी क्येर मबाक्मा, मेको आं खुइ पशो, दे तुइक्नीनी” दे मदा बाक्त।

34 मिनु लाबानमी “इ देशो खोदेशो दुम्ल” देंमाक्त।

35 मिनु मेको नाक्ती लाबानमी गोठ नेल्ल रे टाटे पाडग्रे क्यारश बोका नेल्ल नु पुत्ले पाडग्रे भेडा सांड गुंइदा बाक्त। तेक तेको इच्का बुश नु क्येर बाक्मा, मेको योव्रशा, आ तौ आन गुइमी गेवा बाक्त।

36 मिनु आ तौ आन गोठ नु याकूब आ गोठ नाक्त सां गाक्तीक

लां डोन वोदा बाक्त। याकूबम चहिं लाबान आ अरु क्यारश भेडा कोव्रडा बाक्त।

37 मिनु याकूबमी ब्वाकीम पिपल, कटुस नु अर्को रवा आन क्येख राशी जिकशा, बुश रेखा गुंडशा खेवा बाक्त।

38 मिनु मेको कोक्केपुकी क्यारश नु भेडा आन ब्वाक्कु तूतीकेमी वोदा बाक्त। मिनु ब्वाक्कु तूशा डा मिन ब्वांइसीमानु,

39 मेको आ टाटे पाडग्रे कोक्के तशा, टाटे पाडग्रे पाठापुकी जरमेसीमा बाक्त।

40 याकूबमी मेको पाठा आन कली गुंडशा फ्राशा आंम बगाल डा गोठ सेला बाक्त। आंम क्यारश भेडा लाबान आ गोठम मवोदा बाक्त।

41 मिनु गेना बोल्यो नु रिम्शो बोकापुकी माल्ची ना बाक्मा नु ब्वाक्कु तूथ जाक्मा, मेना मेको कोक्केपुकी तूतीकेमी आन डोंइती वोदा बाक्त। मिनु “कोक्के आन डोंइती ब्वांइसीमल” देंमाक्त।

42 बगाल डा मरिम्शो क्यारश भेडा जाक्तेक्म हना, कोक्के मवोदा बाक्त। मोदेंशो पा मरिम्शो क्यारश भेडा लाबान कली, रिम्शो बोल्यो चहिं याकूब के दुम्मा बाक्त।

43 मिनु याकूब शुश शोंप पाइशो दुम्शा, क्यारश भेडा, वाइलीम वाइल, दलओठपुकी नु गधा शुश पाइशो दुम्माक्त।

## 31

याकूबम लाबान कली प्रोंइशो

1 मिनु लाबान आ तौपुकीमी “याकूबमी आंइ आफ आ मारेइ मारेइ नेल्ल रोइक्ताक्व। आंइ आफ आ शोंप रे शोंप पाइशो दुम्त” देंशो, याकूबमी नेना बाक्त। उत्पत्ती ३०:३५

2 मिनु याकूबमी “लाबानम आं कली मदाक्ब दुम्त” दे तुइक्ता बाक्त।

3 मिनु परमप्रभु यावेमी याकूब कली “इ आफ आ रागी इ मुर आन बाक्तीक लेशशा लावो। गो गे नु बाक्नुड” देंमाक्त। उत्पत्ती २८:१५

4 मिनु याकूबमी राहेल नु लेआ आस कली गोठीम ब्रेत्तीम्सी बाक्त।

5 मिनु मेको आस कली “इस आफोम डोंइती आं कली दाक्शो खोदेशो पा मुल मदाक्ब, दे तुइक्ताक्ड। आं आफ आ परमप्रभु गो नु बाक्शो बाक्त।

6 गो इस आफ कली दोदेशो पा आं बोल नेल्लेमी गेय पडा, मेको गे निक्शीम तुइक्नीसी।

7 इस आफोमी आं कली ठगेप्टु। आं गेय डा तचा माल्शो थोव्रक १० खेयप फाइक्तु। तन्न परमप्रभुमी मेको कली आं कली श्येत गेचा, मगेवा बाक्त।

8 इस आफोमी ‘पुत्ले पाडग्रे नेल्ल इ के दुम्ल’ देंमेनु, क्यारश भेडा नेल्लेमी पुत्ले पाडग्रे गिक्तेक्म। मेकोमी ‘रेखा पाइशो नेल्ल इ के दुम्ल’ देंमेनु, नेल्ल रेखा पाइशो गिक्तेक्म।

9 मोदेशो पा परमप्रभुमी इस आफ आ क्यारश भेडा बी ब्यफ रोइशशा, आं कली गेती।

10 क्यारश भेडा आन ब्वांइसीची ना गो डोमुमी बोका नेल्ल पुत्ले पाडग्रे, रेखा पाइशो नु खाल्शो रड डा तातामी।

11 मिनु परमप्रभु आ स्वर्ग डा गेय पाइबमी आं कली डोमुमी ‘याकूब’ दे ब्रेत्ताक्यी। ‘मिनु गो बाक्ती’ दे लोव्र लेत्ताक्ड।

12 मिनु मेकोमी आं कली ‘कोव्रडो, ब्वांइसीब बोका नेल्ल पुत्ले पाडग्रे, रेखा पाइशो नु खाल्शो रड डा बाक्नीम। मारदे हना लाबानमी इ कली मार पशो बाक्बा, गो नेल्ल ताता।

13 गो परमप्रभु नड। गो इ कली बेथेलम गुम्ता। गे मेकेर फुल्लु का कली तेल लुक्ताक्वी। मिनु आं कली कसम जाप्तीवी। मुल बोक्को, मेको रागी रे गूडो। इ जरमेशो रागी लेतो’ दे माइक्ती” दे आ मीश निक्शी आस कली देंमाक्त। उत्पत्ती २८:१८-२२



14 मिनु राहेल नु लेआमी “आंस आफ आ खिंमी आस थेरशो रू नु शोंप बाक्मा डा?

15 आंस कली अर्को रागी डा मुर खोदेशो सेल्शा, लेयशा ताक्शो नेल्ल जाप्तु। उत्पत्ती २९:१८, २७

16 परमप्रभुमी आंस आफ रे लाइशो शोंप, आंस कली नु आंस आल के दुम्त। परमप्रभुमी इन कली मार देंबा, मेकोन पने” देंसा बाक्त।

17 मिनु याकूब सुनी कना बोक्शा, आ आलपुकी नु आ मीशपुकी दलओंठ तारी डोइक्पदा बाक्त।

18 मिनु मारेइ मारेइ पदान-अराम रे आ गेय पा सेल्शो बस्तु भाव नेल्ल खुल्शा, आ शोंप लाइशो, आ आफ इसहाक आ खिं कनान रागी लचा गोवा बाक्त।

19 लाबान आ भेडा आन ऊन खोइक्थ लशो बाक्माक्त। मेना राहेलमी आ आफ आ खिं डा मूर्तिपुकी खुइ पा कुरा बाक्त। न्यायाधीस १७:५; न्यायाधीस १८:१७; १सामुएल १९:१३; २राजा २३:२४; जकरिया १०:२

20 याकूबमी अरामी लाबान कली “गो लशो” दे मदेथु, गाक्मा बाक्त।

21 मोदेशो पा याकूब आ मारेइ मारेइ कुरशा, प्रोक्माक्त। मिनु सुनी बोक्शा, युफ्रेटीस खोला शोक्समा बाक्त। मिनु गिलाद डांडा गे लमा बाक्त।

22 मिनु लमा आ नाक्त सां नोले मुरुमी “याकूब प्रोक्त” दे लाबान कली शेंदमे बाक्त।

23 मिनु लाबानमी आ लोक्ब आन कली ब्रेशशा, मेकोपुकी नु ७ नाक्ती सम्म याकूब कली माल्शा, गिलाद डांडाम गुमा बाक्त। उत्पत्ती ३१:४७

24 मिनु परमप्रभुमी अरामी लाबान कली डोमुमी “गे होस पावो। याकूब कली मारेइ मपावो” देंमाक्त।

25 मिनु लाबानमी याकूब कली गुमानु, आ ताम्बु गिलाद डा पहाडम कीडा बाक्त। याकूबम चहिं आ ताम्बु आइक्था डा

डांडाम कीशा, वोदा बाक्त।

26 मिनु लाबानमी याकूब कली “गे मार पवी? मारदे आं मतुइक्थु प्रोक्नी? आं तमीपुकी लडाइमी ग्याइश्शो खोदेशो पा लाइक्तीवी।

27 गे मारदे खुइश्शा गाक्नी? मारदे आं कली मारेइ मदेनी? गो इन कली ग्येरशा, कुम्सो पशा, खैजडी नु बीना ताप्शा, लां सम्म चोव्रदीशा सोइक्तन्नी वा।

28 गे आं कली आं चचपुकी नु आं तमीपुकी नु पुक्पु पाइक्मुचा मगेवी। मरिम्शो पाइब बाक्ते।

29 इ कली श्येत गेचा आं गुइमी बाक्ब। तन्न सिनाक्दो इ आफ आ परमप्रभुमी आं कली ‘गे होस पावो। याकूब कली मारेइ मरिम्शो मपावो’ दे लोत्र पाप्तु।

30 मिनु गे इ आफ गुम्चा शुश दाक्ताक्वी हना यो, मारदे आं खिं डा मूर्ति खुइ पा लदी?” दे हिल्लो पवा बाक्त।

31 मिनु याकूबमी लाबान कली “गे इन तमी निक्शी आं गुइ रे रोइक्नीनी, दे हिंती। उत्पत्ती ३१:१९

32 इन मूर्तिपुकी चहिं सुका आ ताम्बुम थित्नीनी, मेको मब्रोंइल। इन लोक्ब आन डोंइती आं बाक्तीकेम इन के मार बाक्मे, कोव्रशा लतीन” देंमाक्त। मारदे हना याकूबमी राहेलम मेको मूर्तिपुकी खुइ पशो, दे मतुइक्ता बाक्त।

33 मिनु लाबानमी याकूब आ ताम्बु, लेआ आ ताम्बु, गेय पाइब निक्शी आस ताम्बु ओव्रशा, माल्शा मथिदा बाक्त। लेआ आ ताम्बु रे गूशा, राहेल आ ताम्बु ओव्रमाक्त।

34 मिनु राहेलम मेको खिं डा मूर्ति आन कली दलओंठ आ तारी डा नित्तीकेमी खुइश्शा, मेको आ तारी निस्से बाक्त। मिनु लाबानमी ताम्बु नेल्लेमी माल्शा मथिदा बाक्त।

35 मिनु राहेलमी “आं प्रभु, मगाइक्तीने, गो इन डोंइती बोक्ने मचाप्नुड, मारदे हना गो मथिचा दुम्ती” देंमाक्त। मोपतीके माल्शा मथिदा बाक्त। लेवी १५:१९-२०

36 मिनु याकूब चुरशा, लाबान कली “मार दूली पडा। आं कली मार मरिम्शो पशो आ पर्बम खेदा पनी?

37 आं मारेइ मारेइम माल्तीनी, इन थोवकी मार थिन्नी? इन लोकब नु आं लोकब आन डोंइती देनीन। एकोपुकीमी इस दातेमी निसाफ पामेक्ल।

38 गो गे नु २० बर्स बाक्ती। इन क्यारश भेडाम पाठा मशाम्देम। इन बगाल डा बोका का यो मब्वड।

39 जन्तुमी साइशो यो इन कली मचाक्गु। गो आंमा थाप्ताक्ड। नाक्दो, नाक्ती जन्तुमी साइक्तेक्म हना यो, गे आं कली थाप्पाइक्तीनी। प्रस्थान २२:११-१२

40 नाक्ती हुष्मोम बाक्ती, नाक्दो ग्यू बेक्शा, यो मइप्थु, नां सोइताक्ड।

41 मोदेशो पा गो इन खिंमी २० बर्स गेय पाता। इन तमी निक्शी आस पर्बम गो १४ बर्स गेय पाता। ६ बर्स इन क्यारश भेडा आन पर्बम गेय पाता। गे आं गेय डा तचा माल्शो थोवक १० खेयप फाइक्तीनी। उत्पत्ती २९:२०,३०; उत्पत्ती ३०:३१-३६

42 आं आफ आ परमप्रभु, अब्राहाम आ परमप्रभु नु इसहाक आ मान पा हिंशो परमप्रभु गो नु मबाक्शो हना, गे आं कली मुल श्येतथ सोइक्तीनी वा। परमप्रभुमी आं श्येत नु आं गेय तशा, सिनाक्दो इन कली हुइक्ताक्व” देंमाक्त। उत्पत्ती ३१:२४,५१

43 मिनु लाबानमी याकूब कली “एको तमी निक्शी आं तमी बाक्नीस। एको आल आं आल बाक्नीम। एको क्यारश भेडा आं के बाक्नीम। इ तशो नेल्ल आं के बाक्ब। आं तमी आस कली मुलाक्ती गो मार पने चाप्नुडा डा? एको आस तौ आन कली गो मार पने चाप्नुडा डा?

44 मोपतीके गे नु गो कबल पस, इस डोंइती सांकछी बाक्मल” दे मदा बाक्त।

45 मिनु याकूबम फुल्लु का चाक्शा राप्पाइशशा,

46 आ मुर आन कली यो “फुल्लु खुप्तीन” देंमाक्त। मिनु मेकोपुकीमी यो फुल्लु खुप्तमे बाक्त। मिनु मेकेर जामे बाक्त।

47 मिनु लाबानमी मेको कली येगार-सहादुता, दे नें वोदा बाक्त। याकूबम चहिं मेको कली गलेद, दे नें वोदा बाक्त। उत्पत्ती ३१:२३

48 मिनु लाबानमी “एको फुल्लु खुप्तीके मुलाकती इस पशो कबल आ सांकछी बाकब” देमाक्त। मौपतीके मेको कली गलेद देनीम। गलेद आ अर्थ सांकछी डा फुल्लु खुप्तीके बाकब। यहोसु २४:२७

49 मिनु मेको राप्पाइशो फुल्लु कली मिस्पा नें वोदा बाक्त। मारदे हना लाबानमी “परमप्रभु यावे गे नु गो इस ब्राची ना इस कली कोत्रब बाकल। न्यायाधीस ११:११

50 गे आं तमी आस कली श्येत गेप्तीवी हना, अर्को मीश चाकतीवी हना, गो इस दातेमी मुर सांकछी मबाक्तेकम हना यो, परमप्रभु इस सांकछी बाकब” देमाक्त।

51 मिनु लाबानमी लेंशा, याकूब कली “कोत्रडो, एको खुप्शो फुल्लु नु मेको लाइशो राप्पाइशो फुल्लु गो इस दातेमी बाकब।

52 एको खुप्शो फुल्लु गो रे इ बाक्तीके, गे रे आं बाक्तीके श्येत गेथ मलमल।

53 अब्राहाम आ परमप्रभु, नाहोर आ परमप्रभु नु आन किकी पिपी आन परमप्रभुम इस दातेमी निसाफ पवल” देमाक्त। मिनु याकूबमी इसहाक आ मान पा हिंशो परमप्रभु आ नें थिशा, कसम जवा बाक्त।

54 मिनु मेको डांडामी याकूबमी चढ़ेतीके चढ़ेवा बाक्त। मिनु आ खिं डा मुर आन कली “शोब्ले जने” दे गेवा बाक्त। मिनु जशा, मेको नाकदो मेक उइ बाक्मा बाक्त। उत्पत्ती ३१:४२

55 मिनु लाबान सुनी कना बोक्शा, आ तमी नु आ चच आन कली पुक्पु पाइशशा, आसीक गेशा, आ खिं लेम्माक्त।

## 32

याकूबम एसाव कली गुम्चा चिक्शो

1 मिनु याकूब लांमी लना लन बाक्मेनु, परमप्रभु आ स्वर्ग डा गेय पाइबपुकी याकूब कली गुम्थ जाक्मा बाक्त।

2 मिनु याकूबमी मेको आन कली तशा “एकेर परमप्रभु आ लडाइ पाइब आन बाक्तीके बाक्ब” देंमाक्त। मोपतीके मेको गुम्तीक रागी आ नें महा-नाइम वोदा बाक्त। महा-नाइम आ अर्थ चहिं “बाक्तीक निक्शी” बाक्ब।

3 मिनु याकूबमी आ लोकब एसाव गुम्चा कली आ डोंइती मुरपुकी एदोम डा सेइर रागी सोइक्ता बाक्त। उत्पत्ती ३६:८

4 मेको आन कली “गे आं प्रभु एसाव कली ‘इन गेय पाइब याकूबमी इन कली लोत्र सोइक्ताक्व। गो मुल सम्म लाबान नु आ रागीमी अर्को रागी डा मुर दुम्शा बाक्ती।

5 गो नु शुश ब्यफ, गधा, क्यारश भेडा, वाइलीम वाइल बाक्नीम। गो आं प्रभु, इन डोंइती शिशी तडल, दे मुर आन कली सोइक्ताक्ड’ देंत, देंचा माल्नीनी” दे अरेशा सोइक्तीमी बाक्त।

6 मिनु आ सोइश्शो मुरपुकी लेशशा जाक्शा, याकूब कली “गोपुकी इन लोकब एसाव आ बाक्तीक जाक्दीत्तक। मेकोमी ४ सहे मुर नु कुशा, इन कली गुम्थ जाक्ब” दे शेंदमे बाक्त।

7 मिनु याकूब शुश हिंशा, सुर्ता पवा बाक्त। मेको नु बाक्ब मुर क्यारश भेडा, बी ब्यफ नु दलओंठ आन कली हुल निक्शी पा योक्गा बाक्त।

8 मेकोमी “एसावमी डोंइती डा हुल साइक्तु हना, अर्को प्रोक्ने चाप्नीम” दे मिम्ता बाक्त।

9 मिनु याकूबम “आं बाजे अब्राहाम आ परमप्रभु, आं आफ इसहाक आ परमप्रभु, आं कली लोत्र पाइब परमप्रभु यावे, गे आं कली ‘इ खिं डा मुर आन बाक्तीक, इ रागी लेतो। गो इ कली रिम्शो पाइनुड’ दे लोत्र पाइतीनी। उत्पत्ती ३१:३,१३

10 गो, इन गेय पाइब आं कली पशो गेना हना यो दाक्तीक नु इन रिम्शो पचा मप्रोंइतीके मशिरनुड। गो कोक्के का ला कुरशा, यर्दन खोला शोक्शा लशो नड। मुल आं के हुल निक्शी दुम्शो बाक्नीम। २सामुएल ७:१८

11 गो आं कली आं लोकब एसाव आ गुइ रे प्रोनीने। मारदे हना आं कली, आं मीश आन कली नु आल नेल्ल आन कली साइक्ब, दे हिंती।

12 गे आं कली ‘गो इ कली थमा पा रिम्शो पाइनुड। इ चच युइ आन कली समुन्द्र डा बाल्वा खोदेशो पा, हिक्ने मचाप्चा डा सेल्लुड’ देंतीनी” दे याकूबमी परमप्रभु कली लोत्र पवा बाक्त।  
उत्पत्ती २८:१३-१४

13 मिनु मेको नाक्दो मेकेर बाक्शा, आ मारेइ मारेइ रे एसाव कली कोसेली योत्रडा बाक्त।

14 मेकोमी सहे निक्शी ओटा क्यारश, २० ओटा बोका, सहे निक्शी ओटा भेडा नु २० ओटा सांड,

15 मिनु ३० ओटा दूध तूब चाइक्ब पाइश्शो दलओंठ, ४० ओटा बी नु १० ओटा ब्यफ, २० ओटा गधैनी नु १० ओटा गधा एसाव कली योत्रशा, ठीक पवा बाक्त।

16 मिनु आ गेय पाइब आन कली का का पा हुल हुल पा गेवा बाक्त। आ गेय पाइब आन कली “गे आं डोंइती हुल हुल पना पन गाक्कीन। हुल नेल्ल कालेमी मखुलीन। का अको क्येडा डोन खुल्चा माल्नीनी” दे माइक्मी बाक्त।

17 मिनु नेल्ल क्येडा ठेयब अरेतीके लोत्र “आं लोकब एसाव इन कली गुम्थ जाक्त हना, मेकोमी इन कली ‘गे सुका आ मुर ननी? ते लाइनीनी? इन डोंइती गाक्ब बगाल सु के नमी?’ दे हिल्लो पाप्तु हना,

18 गेमी ‘एको इन गेय पाइब याकूब के नम। आ प्रभु एसाव कली कोसेली बाक्ब। आं यो खोइश्शा पिना पिन बाक्ब’ देंचा माल्नीनी” दे गेय पाइब आन कली माइक्मी बाक्त।

19 मोदेशो पा डोंइती गाक्ब, नोले गाक्ब नु नेल्ल क्येडा नोले गाक्ब नेल्ल आन कली अरेमी बाक्त। मिनु “मोदेशो पा एसाव नु गुम्ची ना लोत्र पचा माल्नीनी।

20 मिनु ‘इन गेय पाइब आंइ नोले पिना पिन बाक्ब’ देंचा मप्रेंदीन”

दे माइक्मी बाक्त। मारदे हना याकूबमी “गो आं डोंइती सोइशशो कोसेलीमी गो मेको कली लेम्नुड। मिनु नोले मेको कली गुम्नुड, आं कली ब्राइबा को” दे मिम्ता बाक्त।

21 मिनु आ कोसेली आ डोंइती लदमे बाक्त। आं चहिं मेको नाक्दो आ मुर बाक्तीकेमी बाक्माक्त।

### याकूब यब्बोक खोलाम बाक्शो

22 मिनु मेको नाक्दो बोक्शा, आ मीश निक्शी, आ गेय पाइब मीश निक्शी नु आ ११ जना तौ आन कली लाइशशा, यब्बोक खोला शोक्पाइक्मी बाक्त।

23 मिनु मेको आन कली शोक्पाइशशा, आ मारेइ मारेइ यो सोइक्ता बाक्त।

24 मिनु आइक्ची हांबुम याकूब का ला बाक्माक्त। मिनु नां रिक्शा, नां मसोत्रम सम्म मुर का नु राम्शी पवा बाक्त। होसे १२:४-५

25 मेको मुरुम याकूब नु राम्शी पा आं ब्रुचशो तशा, याकूब आ फिला डा बोंइसे थिवा बाक्त। मिनु आ फिला डा बोंइसे याक्ता बाक्त।

26 मिनु मेको मुरुमी “नां दाप्चावानु, मुल लचा गेयी” देंमाक्त। मिनु याकूबमी “आं कली आसीक मगेवी सम्म मप्रोंइनन” दे मदा बाक्त मत्ती १५:२२-२८

27 मिनु मेकोम “इ नें मार में?” दे हिल्लो पवानु, याकूबमी “याकूब” देंमाक्त।

28 मिनु मेकोमी “मुल डा मेरे इ नें याकूब ममाइ, इ नें इस्राएल देंचा माल्नीम। मारदे हना गे परमप्रभु नु राम्शी पा ग्राते, मुर नु राम्शी पा यो ग्राते” देंमाक्त। उत्पत्ती ३५:१०; येरमीया २०:७

29 मिनु याकूबम “इन नें मार में?” दे हिल्लो पवा बाक्त। मिनु मेकोमी “आं नें मारदे माल्दे?” देशा, मेको कली आसीक गेवा बाक्त। न्यायाधीस १३:१७-१८

30 मिनु याकूबमी “गो परमप्रभु आ कुल तशा यो मबेकड” दे मेको बाक्तीके आ नें पेनीएल वोदा बाक्त। प्रस्थान ३३:२०

31 मिनु नां दाप्पेनु, याकूब पेनुएल रे खोड चेड पा गाक्माक्त।

32 मोपतीके इस्राएलीपुकीमी मुल सम्म मेको बोंइसे ग्याइक्ब नारी नु मेकेर डा श्ये मब्वाइनीमी। मारदे हना मेकोमी याकूब आ फिला डा बोंइसे याक्ता बाक्त।

## 33

### याकूब नु एसाव गुम्शो

1 मिनु याकूबम लां गे कोव्रडानु, एसाव नु ४ सहे मुर पिन पिन पशो तवा बाक्त। मिनु आ आलपुकी लेआ, राहेल नु आस गेय पाइब मीश निक्शी नु गाक्पाइक्मी बाक्त। उत्पत्ती ३२:७

2 मेको गेय पाइब मीश नु आस आल आन कली नेल्ल क्येडा डोंइती गाक्पदा बाक्त। मिनु मेको आन नोले लेआ नु आ आलपुकी, नेल्ल क्येडा नोले राहेल नु योसेफ गाक्पदा बाक्त।

3 मिनु मेको नेल्ल आन डोंइती आंमा गाक्माक्त। मिनु मेको आ लोक्ब गुम्चा क्येडा डोंइती ७ खेयप खुम्की पा बाम्माक्त।

4 मिनु एसावमी मेको कली तशा, दोरशा गुम्थ जाक्माक्त। मिनु आ लोक्ब कली मुप्शा पुक्पु पदा बाक्त। मिनु निम्फा डाक्सा बाक्त।

5 मिनु एसावमी कोव्रशा, आलपुकी नु मीश मुर आन कली तशा “गे नु बाक्ब सु नमी?” दे हिल्लो पवा बाक्त। मिनु याकूबमी “परमप्रभुमी इन गेय पाइब कली शिशी पशा, गेशो आलपुकी नम” दे मदा बाक्त। भजन संग्रह १२७:३

6 मिनु नोले मेको गेय पाइब मीश निक्शी नु आस आलपुकी जाक्शा, एसाव आ डोंइती खुम्की पा बाम्मा बाक्त।

7 मिनु लेआ नु आ आलपुकी जाक्शा, खुम्की पा बाम्मा बाक्त। मिनु नोले योसेफ नु राहेल जाक्शा, खुम्की पा बाप्सा बाक्त।



8 मिनु एसावमी “इ डोंइती गाक्शो मार मार मारदे सोइक्ती?” दे हिल्लो पवा बाक्त। मिनु “आं प्रभु, इन डोंइती शिशी तडल, दे सोइक्ताकड” दे लोत्र लेत्ता बाक्त। उत्पत्ती ३२:१४-२१

9 मिनु एसावमी “आं लोकब, आं कली मारेइ मारेइ गाप्शो बाक्ब। इ कली वोंइसो” देंमाक्त।

10 मिनु याकूबमी “मदुम्ब। गो इन डोंइती शिशी ताता हना, आं कोसेली ताक्कीन। मारदे हना गो इन कुल तशा, परमप्रभु आ कुल तशो खोदेशो पा ग्येरसाक्यी। गे आं कली दाक्शा ब्राइतीनी। उत्पत्ती ३२:३१

11 इन कली गेशो आसीक लतीन। मारदे हना परमप्रभुमी आं कली शुश शिशी पाप्तु। आं के मारेइ मारेइ यो गाप्शो बाक्ब” दे एसाव कली मदा बाक्त। मिनु याकूबमी शुश लोत्र पा एसावमी मेको नेल्ल ताक्गा बाक्त।

12 मिनु एसावमी “लो, पिन। गो गे नु लाइनुड” देंमाक्त।

13 मिनु याकूबमी “आं प्रभु, आं आलपुकी आइक्च बाक्नीम। क्यारश भेडा, बी ब्यफ आन चाइक्ब बाक्नीम। मेको आन कली नाक्ती का ला शुश गाक्पाइशशा, श्येत गेता हना, नेल्ल बेक्नीम।

14 आं प्रभु, गे इन गेय पाइब क्येडा डोंइती गाक्कीन। गो बी ब्यफ नु आलपुकी चाप्चा डा पा गाक्नीकी। नोले आं प्रभु आ बाक्तीक सेइर सहर जाक्नीक” देंमाक्त।

15 मिनु एसावमी “आं मुर का निक्शी गे नु गाक्मल” दे मदा बाक्त। मिनु याकूबमी “ममाल्लुड। मारदे आं प्रभुम आं कली मोदेशो रिम्शो पचा मिम्बा?” देंमाक्त।

16 मिनु मेको नाक्ती एसाव सेइर गे लेम्माक्त।

17 याकूब चहिं सुक्कोथ गे लमाक्त। मेकेर खिं का सेल्शा, आ बी ब्यफ आन कली गोठपुकी सेला बाक्त। मोपतीके आ बाक्तीके आं नें सुक्कोथ वोदा बाक्त।

18 मोपा याकूब पदान-अराम रागी रे मारेइ मदुम्भु रिम्शो पा लेशशा, कनान रागी डा शेकेम सहर जाक्दीम्माक्त। सहर आ

नेक्था आ बाक्तीक सेला बाक्त।

19 मिनु आ ताम्बु कीतीके रू हमोर आ तौ आन दाते शेकेम आ आफ रे सहे का केसीता थाप्शा, ग्यबा बाक्त। केसीता मेकेर डा क्येट बाक्त। सुन के बाक्बा कों, चांदी के बाक्बा कों, गिश हेल्लो बाक्ब मतुंडसीब। यहोसु २४:३२

20 मिनु मेकेर चढ़ेतीक का सेला बाक्त। मेको आ नें “एल-एलोहे-इस्त्राएल” दे वोदा बाक्त। मेको आ अर्थ परमप्रभु, इस्त्राएल आ परमप्रभु बाक्ब। उत्पत्ती १२:७-८

## 34

दीना शेकेम सहर कोव्रथ लशो

1 मिनु लेआ आ तमी, दीना मेको रागी डा मीश आल आन कली गुम्थ लमाक्त।

2 हिच्ची डा हमोर आ तौ शेकेम, मेको रागी डा पिप आ तौमी दीना कली तशा, ग्याइश्शा मेको नु इप्शा, बिथोलो पवा बाक्त। न्यायाधीस ९:२८

3 मिनु याकूब आ तमी दीना कली शुश दाक्शा, रिम्शो लोव्र पवा बाक्त।

4 मिनु शेकेममी आ आफ कली “मेको मीश आल आं कली चाक्कीन” दे मदा बाक्त।

5 मिनु याकूबमी “शेकेममी इन तमी दीना कली बिथोलो पाप्तु” देंशो नेना बाक्त। आ तौपुकी चहिं रू डा गोठीम बाक्मा बाक्त। याकूब आ तौपुकी मजाक्मा सम्म सिक्सी पा बाक्माक्त।

6 मिनु शेकेम आ आफ हमोर याकूब नु लोव्र पचा कली जाक्माक्त।

7 मिनु मेको नेंशा, याकूब आ तौपुकी यो रू रे जाक्मा बाक्त। आन थुं मनुथु, शुश चुरमा बाक्त। मारदे हना शेकेमम इस्त्राएल आ तमी नु इप्शा, बिथोलो पशो बाक्माक्त। मो पचा मदुम्शो बाक्माक्त।

8 मिनु हमोरमी इस्त्राएल कली “आं तौ शेकेममी इन तमी कली शुश दाक्ब, चाक्चा गेने।

9 मिनु आंइ तमीपुकी इन तौपुकीमी चाक्मेक्ल। इन तमीपुकी आंइ कली चाक्चा गेने।

10 गे गोपुकी नु बाक्कीन। आंइ रागी इन कली ग्याप्चा लेयचा, बाक्चा कली गेनीकी” देंमाक्त।

11 मिनु शेकेममी मीश आल आ आफ याकूब नु आ लोकब आन कली “इन डोंइती शिशी तडल। गे मार देंनीनी इन कली गेनुड।

12 मेको मीश आल चाक्चा गेतीनी हना, गो इन माल्शो मारेइ मारेइ गेनुड” देंमाक्त। प्रस्थान २२:१५

13 याकूब आ तौपुकीमी आन समी कली बिथोलो पाइब, शेकेम नु आ आफ हमोर आस कली जोल पा

14 “गो आंइ समी खोइक्तीक चिनु मखोइश्शो मुर आन कली गेने मचाप्नीकी। मेको आंइ कली मशिरब।

15 गे आंइ खोदेशो पा वोंइश आल वोंइश मुर नेल्लेमी खोइक्तीक चिनु खोइक्तीनी हना, उत्पत्ती १७:१०-१४

16 आंइ तमीपुकी इन कली लाइक्चा गेनीकी। मिनु इन तमीपुकी गो चाक्नीकी। मिनु गो गेपुकी नु बाक्शा, मुर का खोदेशो दुम्नीकी।

17 गेपुकी आंइ देंशो मबिस्साक्नी हना, आंइ तमी लाइश्शा, गाक्नीकी” दे लोत्र पामे बाक्त।

18 मिनु हमोर नु आ तौ शेकेम मेको आस देंशो नेंशा, ग्येरससा बाक्त।

19 मिनु मेको ठिटा मेको पचा बिस्से बाक्त। मारदे हना याकूब आ तमी कली शुश दाक्ता बाक्त। मेको आ आफ आ खिं डा नेल्ल क्येडा मान ताइब बाक्माक्त।

लेआ आ तौ निक्शी गाइश्शो

20 मिनु हमोर नु आ तौ शेकेम आस सहर डा लाप्चो ओत्रशा, मेको निक्शीमी मुर आन कली

21 “एको मुरपुकी गो नु दुशा बाक्चा दाक्नीम। मोपतीके एक बाक्चा गेने। मारदे हना इं रागी ठेयब बाक्ब। मेको आन कली यो

गारब। गोपुकी मेको आन तमी चाक्य। इं तमी मेको आन कली गेय।

22 गो वोंइश मुर नेल्ल ख्रोइक्तीक चिनु ख्रोइक्साक्य हना ला, मेकोपुकी गो नु बाक्ने बिन्नीम।

23 मार, मेको आन बी ब्यफ, क्यारश भेडा नु आन शोंप नेल्ल इं के मदुम्बा डा? गो मेको आन लोत्र बिश्शा हना, इं दातेमी बाक्नीम” देंसा बाक्त।

24 मिनु सहर डा मुर नेल्ल हमोर नु शेकेम आस लोत्र टिशा, ख्रोइक्तीक चिनु ख्रोइक्चा गेमे बाक्त। सहर नेल्ल डा वोंइश मुरुम मोदेशो पामे बाक्त।

25 मिनु नाक्त सां नोले आन ख्रोइक्तीके नेल्ल क्येडा खाइक्मानु, याकूब आ तौ निक्शी, दीना आ लोकब, सिमियोन नु लेवी, आस तरवार लाइश्शा, सुइ आन मतुइक्थु, सहर ओव्रशा, सहर डा वोंइश मुर नेल्ल सदसे बाक्त। उत्पत्ती ४९:५-७

26 मिनु मेको निक्शीमी हमोर नु शेकेम आस कली यो साइश्शा, दीना शेकेम आ खिं रे गुंइशा, लदसे बाक्त।

27 मिनु याकूब आ अर्को तौपुकी यो सहर ओव्रमा बाक्त। मेकोपुकीमी सहर डा मारेइ मारेइ लदमे बाक्त। मारदे हना शेकेममी आन समी कली बिथोलो पवा बाक्त।

28 मिनु आन क्यारश भेडा, बी ब्यफ, गधा नु मार मार सहर नु आन रूमी बाक्मा, मेको नेल्ल लदमे बाक्त।

29 आन शोंप नेल्ल, आन आलपुकी, आन मीश नु आन खिं डा मारेइ मारेइ नेल्ल लदमे बाक्त।

30 मिनु याकूबमी सिमियोन नु लेवी आस कली “गे आं कली श्येत गेतीसी। मुल एको रागी डा मुरुमी आं कली मदाक्नीम। कनानी नु परिज्जी आन दातेम आं कली मरिम्शो रिना पाइश्शो खोदेशो सेलतीसी। गोपुकी नु शुश मुर मबाक्नीम। इं कली लडाइ तोशा, इं खिं डा मुर नेल्ल साइक्नीम” दे मेको आस कली हुइक्तीम्सी बाक्त।

31 मिनु मेको निक्शीमी “मार, मेकोमी आंस समी कली तेल्लेम खोदेशो सेल्चा दुम्बा?” देंसा बाक्त।

## 35

याकूबमी आसीक तशो

1 मिनु परमप्रभुमी याकूब कली “बोक्शा सासो। बेथेल सहर लावो। मिनु मेकेर बाक्को। इ लोक्ब एसाव रे प्रोक्डेनु, इ डोंडती गूशो परमप्रभु, आं कली, चढ़ेतीक का सेलो” दे मदा बाक्त। उत्पत्ती २८:११-२२; उत्पत्ती ३१:१३

2 मिनु याकूब आ खिं डा मुर नु आ बाक्शो मुर नेल्ल आन कली “इन गुइमी बाक्शो मूर्ति ताइक्तीन। इन फेक्शो वा प्रुइशशा, चिक्शा, अर्को फेक्सीन। उत्पत्ती ३१:१९; ब्यवस्था २७:१५; यहोसु २४:२३

3 मिनु बोक्य, बेथेल लय। गो मेकेर जाक्दीशशा, परमप्रभु कली चढ़ेतीक का सेल्लुड। गो श्येत जडानु, आं पुंइशो गेप्लु। गो ते गाक्ती हना यो, मेको गो नु बाक्त” दे माइक्मी बाक्त।

4 मिनु मेकोपुकीमी याकूब कली आन मूर्ति नु आन पांइशो मारवाडी नेल्ल गेमे बाक्त। याकूबमी मेको नेल्ल शेकेम आ नेक्था बाक्शो रवा आगाम थिमा बाक्त। यहोसु २४:२६; न्यायाधीस ९:६

5 मिनु मेकोपुकी लचा गोव्रमे बाक्त। परमप्रभुमी एर ओथ डा सहर डा मुर आन कली हिंब सेल्मी बाक्त। मोपतीके मेकोपुकीमी मेको आन कली खेदा मपामे बाक्त। प्रस्थान २३:२७; यहोसु १०:१०

6 मिनु लशा, याकूब नु मेको नु बाक्ब मुर नेल्ल कनान रागी डा लूज सहर जाक्दीम्मा बाक्त। लूज सहर कली बेथेल नें वोइशो बाक्माक्त।

7 याकूबम मेकेर चढ़ेतीक का सेला बाक्त। मेको आ नें एल-बेथेल वोदा बाक्त। मारदे हना आ लोक्ब एसाव रे प्रोक्मेनु, मेकेर परमप्रभुम तपांइसीशो बाक्माक्त।

8 मेना रेबेका कली कोव्रब देबोरा बेक्माक्त। मिनु मेको कली बेथेल आ नेक्था, रवा आगामी थिम्मे बाक्त। मेको कली याकूबम अल्लोन-बकुथ नें वोदा बाक्त। मेको आ अर्थ डाक्चा डा रवा बाक्ब। उत्पत्ती २४:५९

### परमप्रभुमी याकूब कली गुम्शो

9 पदान-अराम रे लेम्मेनु, परमप्रभुमी याकूब कली लेंशा गुम्शा, मेको कली आसीक गेशा

10 “इ नें याकूब बाक्ब। तन्न मुल रे याकूब मदेंचा, इ नें इस्राएल दुम्चा माल्ब” देंमाक्त। मोपतीके इस्राएल नें वोइशो बाक्माक्त। उत्पत्ती ३२:२९

11 मिनु परमप्रभुमी मेको कली “गो नेल्ल क्येडा सक्ति पाइशो परमप्रभु नड। गे सोशा बोशा, शुश दुमीने। गे रे रागी का डा शुश मुर नु रागी रागी डा मुर यो दुम्नीम। गे रे पिपपुकी दुम्नीमी। उत्पत्ती १७:१; उत्पत्ती २८:३-४; उत्पत्ती १७:६

12 अब्राहाम नु इसहाक कली गेशो रागी गो इ कली नु इ चच युइ आन कली गेनुड” देंमाक्त।

13 मिनु परमप्रभुमी लोव्र पने थुम्शा, मेको आ बाक्तीक रे लमाक्त।

14 मिनु याकूबमी परमप्रभु नु लोव्र पशो मिम्चा कली मेकेर फुल्लु का राप्पदा बाक्त। मिनु मेको आ तारी तूचा थोव्रक चढेतीक नु तेल लुक्ता बाक्त। उत्पत्ती २८:१८-१९

15 याकूबमी परमप्रभु नु लोव्र पतीक सहर कली बेथेल नें वोदा बाक्त।

### बेन्यामीन जरमेसेनु राहेल बेक्शो

16 मिनु बेथेल रे एफ्राथ जाक्दीत्चा कली गाक्शो बाक्मा बाक्त। मेना राहेल आल थिचा चिक्शो बाक्माक्त।

17 सुत्केरी रोइम शुश श्येत जवानु, आ वारच पाइब मीश मुरुमी “महिनो, गे अर्को तौ का नु थीनेवे” दे लोव्र पवा बाक्त। उत्पत्ती ३०:२४

18 मिनु मेको मबेक्थु, आ सोक्त लची ना आ तौ आ नें बेन-ओनी वोदा बाक्त। आ आफोम चहिं आ नें बेन्यामीन वोदा बाक्त। मेको आ अर्थ आं श्येत डा तौ बाक्ब।

19 मिनु राहेल बेक्माक्त। मिनु एफ्राथ लतीक लांमी थिम्मे बाक्त। एफ्राथ बेथलेहेम सहरम बाक्ब। उत्पत्ती ४८:७; १सामुएल १०:२; येरमीया ३१:१५; मत्ती २:१८

20 मिनु याकूबमी आ थिम्तीक तारी फुल्लु के थाम का राप्पदा बाक्त। मुल सम्म राहेल आ थिम्तीके तारी मेको ठेयब फुल्लु के थाम बाक्ब।

### इस्राएल आ तौपुकी

21 मिनु इस्राएल लना लन, आ ताम्बु एदेर माइशो लाइशो खिं आ नेक्था कीडा बाक्त।

22 मिनु इस्राएल मेको रागीमी बाक्मेनु, आ तौ रूबेन आ आफ आ मीश बिल्हाह नु इम्माक्त। मिनु इस्राएलमी मेको नेना बाक्त। उत्पत्ती ४९:४

### याकूब आ १२ जना तौ

#### १इतिहास २:१-२

23 लेआ आ तौ रूबेन, याकूब आ डोंइती जरमेशो तौ बाक्माक्त। सिमियोन, लेवी, यहूदा, इस्साकार नु जबूलून नेल्ल लेआ आ तौ बाक्मा बाक्त।

24 राहेल आ तौ योसेफ नु बेन्यामीन बाक्सा बाक्त।

25 राहेल आ गेय पाइब बिल्हाह आ तौ दान नु नाप्ताली बाक्सा बाक्त।

26 लेआ आ गेय पाइब जिल्पा आ तौ गाद नु आशेर बाक्सा बाक्त। मेको नेल्ल पदान-अराममी जरमेशो याकूब आ तौ बाक्मा बाक्त।

### इसहाक बेक्शो

27 मिनु याकूब, आ आफ इसहाक आ खिं माप्रे जाकदीम्माक्त। मेको कली किरयथ-अरबा सहर नु हेब्रोन यो देंनीम। मेको अब्राहाम नु इसहाक आस बाक्तीक रागी बाक्माक्त।

28 मिनु इसहाक सहे का ८० बर्स दुम्माक्त।

29 मिनु इसहाक शुश बर्स डा खाल्पा दुम्शा बेक्माक्त। आ क्येडा डोंइती बेक्शो किकी पिपी आन बाक्तीक लमाक्त। मिनु आ तौ एसाव नु याकूबम मेको कली थिम्से बाक्त।

## 36

एसाव आ तौ चच युइ

इतिहास १:३५-५४

1 एको एसाव आ चच युइ बाक्नीम। एसाव कली एदोम यो देंनीम। उत्पत्ती २५:३०; ब्यवस्था २३:८

2 एसावमी कनान रागी डा मीश निक्शी चाक्गा बाक्त। का हित्ती डा एलोन आ तमी आदाह, अर्को होर डा हिव्वी सिबोन आ तौ अनाह आ तमी ओहोली-बामा बाक्माक्त। उत्पत्ती २६:३४

3 मिनु इश्माएल आ तमी बासेमाथ, नेबायोथ आ समी यो चाक्गा बाक्त। उत्पत्ती २८:९

4 मिनु आदाहमी एसाव के एलीफाज थिमाक्त। बासेमाथमी रूएल थिमाक्त।

5 ओहोली-बामामी येऊश, यालाम नु कोराह थिमाक्त। मेकोपुकी कनान रागीम जरमेशो एसाव आ तौ बाक्मा बाक्त।

6 मिनु एसावमी आ मीशपुकी, आ तौपुकी, आ तमीपुकी, आ खिं डा मुर नेल्ल, आ बी ब्यफ नु बस्तु भाव नेल्ल कनान रागीम चेम्शो शोंप नेल्ल लाइशशा, याकूब रे डोन अर्को रागी लमाक्त।

7 मारदे हना शुश शोंप दुम्तीके, बस्तु भाव शुश दुम्तीके, काथा बाक्ने मचाप्से बाक्त। मिनु आस बाक्शो रागीम शुश बस्तु भाव दुम्तीके थुल्ने मचाप्से बाक्त। उत्पत्ती १३:६



8 मिनु मेको एदोम माइश्शो एसाव सेइर डा पहाड लशा बाक्माक्त।

9 एसाव आ चच युइ सेइर पहाड डा एदोमी माइश्शो सु सु बाक्मा बाक्त देंशा हना,

10 एसाव आ मीश आदाह आ तौ एलीफाज, आ मीश बासेमाथ आ तौ रूएल बाक्माक्त।

11 मिनु एलीफाज आ तौपुकी तेमान, ओमार, सेफो, गाताम नु केनाज बाक्मा बाक्त।

12 एसाव आ तौ एलीफाज आ कान्छी मीश तिम्ना बाक्माक्त। मेकोमी अमालेक थिमाक्त। मेकोपुकी एसाव आ मीश आदाह आ तौपुकी बाक्मा बाक्त।

13 मिनु रूएल आ तौपुकी नाहाथ, जेराह, शम्माह नु मिज्जा बाक्मा बाक्त। मेको एसाव आ मीश बासेमाथ आ तौपुकी बाक्मा बाक्त।

14 मिनु सिबोन आ तौ अनाह आ तमी, एसाव आ मीश ओहोली-बामा आ तौपुकी येऊश, यालाम नु कोराह बाक्मा बाक्त।

### हुकुम पाइब एसाव आ तौपुकी

15 मिनु एसाव आ तौ आन दाते डा ठेयब मुर सु सु बाक्मा बाक्त देंशा हना, आ डोंइती जरमेशो तौ एलीफाज आ तौ तेमान, ओमार, सेफो नु केनाज,

16 कोराह, गाताम नु अमालेक, एलीफाजमी एदोम रागीमी थिशो आदाह आ तौ बाक्मा बाक्त।

17 मिनु एसाव आ तौ रूएल आ तौ आन दाते डा ठेयब मुर नाहाथ, जेराह, शम्माह नु मिज्जा बाक्मा बाक्त। मेकोपुकी रूएलमी एदोम रागीमी थिशो, एसाव आ मीश बासेमाथ आ तौ बाक्मा बाक्त।

18 मिनु एसाव आ मीश ओहोली-बामा आ तौ आन दाते डा ठेयब मुर येऊश, यालाम नु कोराह बाक्मा बाक्त। मेकोपुकी अनाह आ तमी, एसाव आ मीश ओहोली-बामाम, जरमेशो बाक्मा बाक्त।

19 मेकोपुकी एदोम माइशो एसाव आ तौ आन दाते डा ठेयब मुर बाक्मा बाक्त।

सेइर आ चच युइ

20 मिनु डोंइती मेको रागीम बाक्ब सेइर आ तौ होरीपुकी सु सु बाक्मा बाक्त देशा हना, लोतान, शोबाल, सिबोन, अनाह उत्पत्ती १४:६; ब्यवस्था २:१२, २२

21 दीशोन, एजेर नु दीशान बाक्मा बाक्त। मेकोपुकी एदोम रागी डा सेइर आ तौ होरी आन दाते डा ठेयब मुर बाक्मा बाक्त।

22 लोतान आ तौ होरी नु हेमान बाक्सा बाक्त। लोतान आ समी तिम्ना बाक्माक्त।

23 शोबाल आ तौपुकी अल्वान, मानाहाथ, एबाल, शेफो नु ओनाम बाक्मा बाक्त।

24 सिबोन आ तौ आइयाह नु अनाह बाक्सा बाक्त। मिनु अनाहमी आ आफ सिबोन आ गधा योव्रदीमेनु, गोरशो रागीमी होश ब्वाक्कु बुक्तीके थिदा बाक्त।

25 अनह आ आल दीशोन नु आ तमी ओहोली-बामा बाक्सा बाक्त।

26 मिनु दीशोन आ तौपुकी हेम्दान, एशबान, इथ्रान नु केरान बाक्मा बाक्त।

27 एजेर आ तौपुकी बिल्हान, जावान नु अकान बाक्मा बाक्त।

28 दीशान आ तौ ऊज नु अरान बाक्सा बाक्त।

29 होरी आन दाते डा ठेयब मुरपुकी लोतान, शोबाल, सिबोन, अनाह,

30 दीशोन, एजेर नु दीशान बाक्मा बाक्त। मेको सेइर रागी डा होरी आन ठेयब मुर बाक्मा बाक्त।

एदोम रागी डा पिपपुकी

31 डोंइती इस्राएल डा मुर आन पिप मबाक्शो बाक्माक्त। एदोम रागीमी चहिं सासन पाइब पिपपुकी बाक्मा बाक्त।

32 मिनु बेओर आ तौ बेलामी एदोम रागीमी सासन पवा बाक्त।  
मिनु मेको आ सहर आ नें दिनहाबा बाक्माक्त।

33 मिनु बेला बेक्शा नोले बोज्रा डा जेराह आ तौ योबाब मेकेर  
डा पिप दुम्माक्त।

34 मिनु योबाब बेक्शा नोले तेमान आ मुर आन रागी डा हुशाम  
पिप दुम्माक्त।

35 मिनु हुशाम बेक्म नोले बेदाद आ तौ हादाद पिप दुम्माक्त।  
मेकोमी मोआब रागीमी मिदयानी नु लडाइ पशा ग्रामाक्त। आ सहर  
आ नें अवीथ बाक्माक्त।

36 मिनु हादाद बेक्म नोले मासेकाह डा सम्ला पिप दुम्माक्त।

37 मिनु सम्ला बेक्म नोले युफ्रेटीस खोला आ नेक्था बाक्शो  
रेहोबोथ डा शावल पिप दुम्माक्त।

38 मिनु शावल बेक्म नोले आकबोर आ तौ बाल-हनान पिप  
दुम्माक्त।

39 मिनु आकबोर आ तौ बाल-हनान बेक्म नोले हादार पिप  
दुम्माक्त। आ सहर आ नें पाहु बाक्माक्त। आ मीश मेहेताबेल  
बाक्माक्त। मेको मात्रेद आ तमी बाक्माक्त। मात्रेद चहिं मे-जाहाब  
आ तमी बाक्माक्त।

एसाव रे पिशो थर

40 एसाव रे पिशो थर आन खिं नु आन बाक्तीके तेको बाक्मा  
बाक्त देंशा हना, तिम्ना, अल्वाह, येथेथ,

41 ओहोली-बामा, एलाह, पिनोन,

42 केनाज, तेमान, मिब्सार,

43 मग्दीएल नु यिराम बाक्मा बाक्त। मेको एदोम आ थर  
आन बाक्तीक बाक्मा बाक्त। एसाव एदोमी आन किकी पिपी  
बाक्माक्त।

## 37

याकूब आ तौ योसेफ आ कथा

1 याकूब आ आफ अर्को रागीम बाक्शो खोदेशो पा याकूब यो कनान रागीम बाक्शो बाक्माक्त।

2 एको याकूब आ खिं डा मुर आन कथा बाक्ब। योसेफ १७ बर्स दुम्शा आ लोकब आन क्यारश भेडा गोठ डा गोठला बाक्माक्त। आ आफ आ मीश बिल्हाह नु जिल्पा आस तौ कली वारच पाइब बाक्माक्त। मिनु योसेफमी मेको आन मरिम्शो पशो आ आफ कली शोत्रबाक्माक्त।

3 इस्राएलमी नेल्ल क्येडा योसेफ कली दाक्शो बाक्माक्त। मारदे हना मेकोमी खाल्पा दुम्शा थिमाक्त। मिनु योसेफ कली दारशो फेक्तीके का फेरपदा बाक्त।

4 मिनु आ लोकबपुकीमी “आफोम नेल्ल क्येडा योसेफ कली दाक्ताक्व” दे तुइश्शा, योसेफ कली मदाक्तमे बाक्त। मिनु योसेफ नु रिम्शो लोत्र यो मपामे बाक्त।

### योसेफ आ डोंइती डा डोमु

5 काबु नाक्दो योसेफमी डोमु का तवा बाक्त। मिनु योसेफमी आ लोकब आन कली शेंदीमी बाक्त। मिनु मेकोपुकीमी डोंइती क्येडा मदाक्तमे बाक्त।

6 योसेफमी मेको आन कली “गो सिनाक्दो डोमु का ताता।

7 गो नेल्ल रूमी चेरब मुठा फ्रेशा बाक्तय। मिनु आं मुठा बोक्शा राप्त। मिनु इन मुठापुकी एर ओंथ बाक्शा, आं मुठा कली सेउ पाम्तेक्मे” देंमाक्त।

8 आ लोकबपुकीम “गे आंइ कली अरेब दुम्नेवे? आंइ कली हुकुम पाइब दुम्नेवे?” दे गाइश्शा देंमा बाक्त। मिनु योसेफ कली आ डोमु नु आ देशो आ पर्बम डोंइती क्येडा मदाक्तमे बाक्त।

### योसेफ आ नोले डा डोमु

9 मिनु नोले योसेफम लेंशा अर्को डोमु तवा बाक्त। मिनु आ लोकब आन कली “नेनीन, गो अर्को डोमु का यो ताता। नां, तास्ला नु ११ ओटा सोरुलपुकीम आं कली सेउ पाइक्तीमी” देंमाक्त।

10 मेको डोमु आ आफ नु आ लोकब आन कली शेंदीमीनु, आ आफोमी “मार डोमु तवी? गो, इ ममा नु इ लोकबपुकी इ डांइती थमा पा खुम्की पा बाप्चा माल्नीकी?” दे हुइक्ता बाक्त।

11 मिनु आ लोकबपुकीमी योसेफ कली मदाक्तमे बाक्त। आ आफोम चहिं योसेफ आ देंशो मिम्शा आ थुंमी वोदा बाक्माक्त।

### योसेफ कली लेयशो

12 मिनु योसेफ आ लोकबपुकी क्यारश भेडा योत्रचा कली शेकेम माइशो रागीमी बाक्शो बाक्मा बाक्त। उत्पत्ती ३३:१८-१९

13 इस्राएलमी योसेफ कली “इ लोकबपुकी शेकेम नेक्थान क्यारश भेडा योत्रनीम। गो इ कली शेकेम सोइक्नन” देंमाक्त। मिनु योसेफम “लो, गो लाइनुड” देंमाक्त।

14 मिनु “लावो, इ लोकब नु क्यारश भेडा नेल्ल रिम्शो बाक्मा कों, दोदेशो पा बाक्मा, कोत्रथ लावो। मिनु कोत्रशा, शेंदी” देंमाक्त। मिनु योसेफ कली हेब्रोन बेंसी रे सोइक्तानु, शेकेम गे लमाक्त। उत्पत्ती ३५:२७

15 मिनु योसेफमी लेखमी मुर का गुमाक्त। मिनु मेकोमी “गे मार मली?” दे हिल्लो पवा बाक्त।

16 मिनु योसेफमी “आं लोकब आन कली माल्थ गाक्ती। क्यारश भेडा ते योत्रशो बाक्मा, तुइक्ती?” दे हिल्लो पवा बाक्त।

17 मिनु मेको मुरुमी “मेकोपुकी एकेर रे लाम्तेक्मे। ‘दोथान लचा’ देंशो नेंता” देंमाक्त। मिनु योसेफम आ लोकब आन कली दोथानम थिम्मी बाक्त।

18 मिनु आ लोकबपुकीम योसेफ कली डोन रे पिशो तशा, आन नेक्था जाक्चा क्येडा डांइती “मेको कली साइक्चा” दे सल्ला पामे बाक्त।

19 मिनु मेकोपुकीमी “कोत्रडीन, डोमु ताइब जाक्त।

20 मुल मेको कली साइय्य। मिनु ढोडोडगा कामी पिक्क्य। मिनु “जन्तुम साइशशा ब्वाप्तु” देंय। आ डोमु तशो गाप्बाक्म कों, मगाप्बाक्म तुइक्नय” देंमुमा बाक्त।

21 मिनु रूबेनमी मेको आन लोव्र नेंशा, मेको कली “मसाइय्य” देंमाक्त। मेकोमी “आ लोकबपुकी रे प्रॉइनुड” दे मिम्ता बाक्त।  
उत्पत्ती ४२:२२

22 रूबेनमी मेको आन कली “मसतीने। लेख डा ढोडोडगा कामी ताइक्चा” दे माइक्मी बाक्त। मारदे हना योसेफ कली आन गुइ रे प्रॉइशा, आफ आ खिं सोइक्नुड, दे मिम्ता बाक्त।

23 मिनु योसेफ आ लोकब आन बाक्तीके जाक्मेनु, मेकोपुकीमी आ नक फेरशो रिम्शो फेक्तीक वा पुइक्तमे बाक्त।

24 मिनु लेख डा ढोडोडगा कामी पिक्गमे बाक्त। मेको ढोडोडगाम ब्वाक्कु मबाक्शो बाक्माक्त।

25 मिनु शोब्ले जथ निस्सीमा बाक्त। मिनु कोव्रडमेनु, गिलाद सहर रे इश्माएल जात डा ग्याप्ब लेयब मुर नु आन दलओंठपुकी पिशो तामे बाक्त। मेको आन दलओंठपुकीमी मस्लापुकी, खेक्तीकपुकी नु धूप इजीप्तमी लेयचा कली लाइक्बाक्मा बाक्त।

26 मिनु यहूदामी आ लोकब आन कली “इं लोकब साइश्शा, जोल पचा, मार रिम्शो दुम्बा डा?

27 नेनीन, इश्माएल आ मुर आन कली लेयशा सोइक्तय, मसाइय्य। मारदे हना इं लोकब, इं आंम मुर बाक्ब” देंमाक्त। मिनु आ लोकबपुकी बिस्समा बाक्त।

28 मिदयान डा इश्माएली ग्याप्ब लेयब मुर पिना पिन बाक्मा बाक्त। मिनु योसेफ कली ढोडोडगा रे फेशशा, इश्माएली आन कली चांदी के २० शेकेलम लेयडमे बाक्त। मिनु मेकोपुकीमी योसेफ कली इजीप्त लदमे बाक्त। शेकेल का ११.५ ग्राम, तोला खोदेशो बाक्ब।उत्पत्ती २५:२; लेवी २७:१-८

29 मिनु रूबेनमी योसेफ प्रॉइचा कली मेको ढोडोडगा लशा कोव्रडानु, योसेफ कली मथित्थु, सुर्ता पा, आ वा खाक्गा बाक्त।

30 मिनु आ लोकब आन कली “मेको आल मबा। दोपा आ आफ आ डोंइती जाक्दीत्नुडा?” दे लोव्र पवा बाक्त।

31 मिनु मेकोपुकीमी योसेफ आ फेक्शो वा लाइशशा, पाठा का क्योरशा, आ फेक्शो वा हुशेम खुम्मे बाक्त।

32 मिनु मेको फेरशो फेक्शो वा आन आफ कली लाइशशा गेमे बाक्त। मेकोपुकीमी आन आफ कली “कोव्रडीन, एको वा थित्तक। इन तौ आ फेक्शो वा कों?” दे हिल्लो पामे बाक्त।

33 मिनु मेको वा तशा “आं तौ आ फेक्शो वा बाक्त, दे तुइक्ता बाक्त। मिनु ब्वाकी डा जन्तुमी मेको कली साइशशा, नेक्मे बाक्त” दे डाक्माक्त। उत्पत्ती ३७:२०

34 मिनु याकूबम आ फेक्शो वा खाक्शा, अरन्डी फेक्शा, शुश नाक्ती रोंका पवा बाक्त।

35 आ तमी तौ आन आफ कली लेम्थ जाक्मा बाक्त। मिनु याकूबमी “गो आं बेक्ची ना सम्म आं तौ कली रोंका पाइनुड” दे लेम्चा मगेमी बाक्त। मोपा आ आफ योसेफ आ पर्बम डाक्माक्त।

36 मिनु मेको मिदयान डा मुरपुकीमी योसेफ कली इजीप्त रागी डा फाराओ आ नेल्ल क्येडा ठेयब गेय पाइब पोतीफर कली लेयडमे बाक्त।

## 38

### यहूदा नु तामार

1 मिनु नोले यहूदा आ लोकबपुकी रे लशा, अदुल्लाम सहर डा हीरा माइशशो मुर आ बाक्तीक लमाक्त।

2 मेकेर बाक्शा, यहूदामी कनानी शुआ नें पाइशशो मुर आ तमी तवा बाक्त। मिनु मेको चाक्शा, मेको नु बाक्माक्त।

3 मिनु मेकोमी कोव्रज कुरशा, तौ का थिमाक्त। मेको आ नें एर वोदा बाक्त।

4 मिनु लेंशा कोव्रज कुरशा, अर्को तौ का नु थिमाक्त। मेको आ नें ओनान वोदा बाक्त।

5 मेकोमी लेंशा कोव्रज कुरशा, अर्को तौ का नु थिमाक्त। मेको आ नें शेलाह वोदा बाक्त। मेको आल थिची ना यहूदा केसीब माइक्तीकेमी बाक्शो बाक्माक्त।

6 मिनु यहूदामी आ डोंइती जरमेशो तौ एर कली मीश आल का चाक्गा बाक्त। मेको आ नें तामार बाक्माक्त।

7 यहूदा आ डोंइती जरमेशो तौ एरमी परमप्रभु यावे आ डोंइती मरिम्शो पना पन बाक्माक्त। मिनु परमप्रभु यावेमी मेको कली सदा बाक्त।

8 मिनु यहूदामी ओनान कली “रिउम पतीक गेय पा इ लोकब आ मीश नु बाक्को। इ लोकब कली आल सेलो” दे मदा बाक्त।  
ब्यवस्था २५:५-१०

9 मिनु ओनानमी आ आल मदुम्ब, दे तुइश्शा, आ लोकब आ मीश नु बाक्की ना आ लोकब आ आल मसेल्चा, दे आ वांचेर खपीम ताइक्बाक्माक्त।

10 मिनु मेको कली मो पशो तशा, परमप्रभु यावेमी मेको कली मदाक्शो बाक्माक्त। मोपतीके मेको कली यो सदा बाक्त।

11 मिनु यहूदामी आ चाइमी तामार कली “इ आफ आ खिंम बाक्शा, शेलाह मकोल्म सम्म रिम्दो” दे लेम्दा बाक्त। मारदे हना यहूदामी “मेको नु बाक्शा, आ लोकब निक्शी खोदेशो पा, अर्को यो बेक्बा कों” दे मिम्ता बाक्त। मिनु तामार आ आफ आ खिं लमाक्त।

12 मिनु नोले शुआ आ तमी, यहूदा आ मीश बेक्माक्त। मिनु आ रोंका पतीक नुम नोले यहूदा आ भेडा आन कली ऊन खोइक्बपुकी गुम्चा कली आ वारच अदुल्लाम सहर डा मुर हीरा नु तिम्नाह लमाक्त।

13 मिनु मुर कामी तामार कली “इ शिउ आ भेडा ऊन खोइक्थ तिम्नाह कुइब” दे मदा बाक्त। यहोसु १५:५७

14 मिनु आ वोंइश बेक्शो वा प्रुइश्शा, आ कुल तेल्लेम खोदेशो पा सुम्से बाक्त। मिनु मोदेशो पा तिम्नाह एनाइम लतीक लांमी निश्शा बाक्माक्त। मारदे हना शेलाह कोल्शा यो, यहूदामी मेको नु ग्युंबे मपाइक्ता बाक्त।



15 मिनु यहूदाम मेको कली लांम तशा “तेल्लेम का बाक्ब” दे मिम्ता बाक्त। मारदे हना आ कुल सुमा बाक्त।

16 मिनु मेको कली “आं कली ओव्रचा गेयी” देंमाक्त। मारदे हना आ चाइमी बाक्ब, दे मतुइक्ता बाक्त। मिनु तामारमी “गे गो नु बाक्शो डा आं कली मार गेनीनी?” दे हिल्लो पवा बाक्त। लेवी १८:१५

17 मिनु “गो आं गोठ डा पाठा का सोइक्नन” देंमाक्त। मिनु तामारमी “मेको मसोइक्तीनी सम्म मार गेनीनी?” दे हिल्लो पवा बाक्त।

18 मिनु यहूदामी “मार पुंइनेवे?” दे हिल्लो पवा बाक्त। मिनु मेकोमी “इन छाप, इन डोरी नु इन गुइ डा कोक्के गेचा नड” दे मदा बाक्त। मिनु मेको नेल्ल गेशा नोले मेको नु बाक्माक्त। मिनु कोव्रज कुरा बाक्त।

19 मिनु तामार बोक्शा लशा, आ वोइश बेक्शो डा वा लेंशा फेक्से बाक्त।

20 मिनु यहूदामी मेको पाठा गेचा नु आ छाप, डोरी नु कोक्के लेत्चा कली आ अदुल्लाम डा आ वारच कली सोइक्ता बाक्त। मेकोमी मेको मीश मुर कली मथिदा बाक्त।

21 मिनु मेकोमी मेकेर डा मुर आन कली “एकेर एनाइम डा लांम बाक्ब तेल्लेम ते लमे?” दे हिल्लो पामी बाक्त। मिनु मेकोपुकीमी “एकेर तेल्लेम मबाक्ब” देंमा बाक्त।

22 मिनु मेको यहूदा आ बाक्तीक लेशशा “मेको कली थिन्ने मचबु। मेकेर डा मुरपुकीमी ‘एकेर तेल्लेम मबाक्ब’ देंतेक्म” दे यहूदा कली शेंदा बाक्त।

23 मिनु यहूदामी “मेकोन बाक्ल। गो मुने मदोक्डल। गो पाठा का सोइक्ताक्ड। गे मेको कली मथिदी, मार पचा डा?” देंमाक्त।

24 मिनु महिना सां नोले मुर कामी यहूदा कली “इ चाइमी तामारम तेल्लेम पाप्तु। तेल्लेम पा कोव्रज कुरशो बाक्त” देंमाक्त। मिनु यहूदामी “मेको चोचा कली चाक्कीन” दे लोव्र लेत्ता बाक्त।

25 मिनु तामार कली चाक्गमेनु, मेकोमी आ शिउ कली “एको छाप, डोरी नु कोक्के सु के बाक्मे मेको रे पा कोव्रज कुरशो नड। एको छाप, डोरी नु कोक्के सु के बाक्मे, कोव्रडीन” दे लोव्र कुरब सौइक्ता बाक्त।

26 मिनु यहूदा मेको छाप, डोरी नु कोक्के तुइश्शा, मेकोमी “आं क्येडा मेको ठीक पाइब बाक्त। मारदे हना गो मेको कली आं तौ शेलाह मगेड” देंमाक्त। तन्न तामार कली मचाक्गा बाक्त।

27 मिनु आल थिचा रोइ पची ना, आ कोव्रजम जौले आल बाक्सा बाक्त।

28 मिनु आल थिचावानु, आल कामी आ गुइ गुंइदा बाक्त। मिनु आ वारच पाइब मीश मुरुमी लल श्येले पाइश्शा “एको डोंइती डा बाक्ब” देंमाक्त।

29 मिनु मेको आ गुइ ओंइशा, आ लोकब जरमेसे बाक्त। मिनु मेको वारच पाइबमी “इ गूची ना गिश ठेयब गार सेली” दे मदा बाक्त। मोपतीके आ नें पेरेस वोदा बाक्त। पेरेस आ अर्थ खाक्शो गार बाक्ब। रूथ ४:१८; मत्ती १:३

30 मिनु नोले लल श्येले पाइश्शो आल जरमेसे बाक्त। मिनु मेको आ नें जेराह वोदा बाक्त।

## 39

### योसेफ पोतीफर आ खिम बाक्शो

1 मेको इश्माएल जात डा ग्याप्ब लेयबपुकीमी योसेफ कली इजीप्त रागी चाक्दीत्मे बाक्त। मिनु इजीप्त रागी डा पिप आ नेल्ल क्येडा ठेयब गेय पाइब पोतीफरमी योसेफ कली ग्यबा बाक्त। उत्पत्ती ३७:२८, ३६

2 मिनु परमप्रभु यावे योसेफ नु बाक्शो बाक्माक्त। योसेफ इजीप्त डा होव्रप आ खिम बाक्मेनु, मार मार पवा, मेको नेल्ल रिम्शो दुम्शा लमाक्त। उत्पत्ती २६:२४

3 मिनु आ होत्रपमी “परमप्रभु यावे योसेफ नु बाक्माक्त। मिनु योसेफमी मार मार पवा, मेको नेल्ल परमप्रभु यावेमी रिम्शो दुम्पदा बाक्त।” दे तुइक्ता बाक्त।

4 मिनु योसेफ पोतीफर आ डोंइती शिशी तवा बाक्त। मिनु आ खिंमी गेय पवानु, आ ठेयब गेय पाइब सेला बाक्त। मिनु अर्को गेय पाइबपुकी कली अरेब यो सेला बाक्त। आ मारेइ मारेइ योसेफ कली कोत्रपदा बाक्त।

5 मिनु पोतीफरमी योसेफ कली आ खिं डा नेल्ल कोत्रब मुर सेलानु, परमप्रभु यावेमी योसेफ आ पर्बम मेको कली शुश आसीक गेवा बाक्त। पोतीफर आ खिंम मार मार बाक्मा, आ रूम मार मार ब्वारा, मेको नेल्ल कली परमप्रभु यावेमी आसीक गेवा बाक्त।  
उत्पत्ती ३०:२७

6 मोपा पोतीफरमी आ मार मार नेल्ल योसेफ आ गुइमी जिम्मा गेवा बाक्त। आ जचा ब्वचा ला आंमा कोत्रडा बाक्त। योसेफ आ रां नु कुल थम दारशो बाक्माक्त। उत्पत्ती ४३:३२

7 मिनु पोतीफर आ खिंमी बाक्मेनु, आ होत्रपोक्ममी योसेफ कली दाक्शा, मेको नु बाक्चा मला बाक्त। मेको मीश मुरुम योसेफ कली “पिवो, गो नु बाक्को” दे मदा बाक्त।

8 योसेफमी “गो गे नु मबाक्नुड। आं होत्रपमी आ मार मार नेल्ल आं कली ‘कोत्रडो’ दे जिम्मा गेती।

9 आं कली आ खिं डा नेल्ल क्येडा ठेयब सेलती। मार मार बाक्मा, नेल्ल जिम्मा गेती। इन कली चहिं आं कली मगेयी। मारदे हना गे आ मीश ननी। गो दोपा परमप्रभु आ डोंइती मोदेशो मरिम्शो पाप पने चाप्नुडा? गो मपाइनुड?” दे मदा बाक्त। प्रस्थान २०:१४; लेवी १८:२०

10 मिनु मेको मीश मुरुमी नाक्त किंत किंत योसेफ कली लोत्र पशा “पिवो, गो नु बाक्को” दे मदा बाक्त। योसेफम चहिं मेको आ लोत्र मटिवा बाक्त।

11 मिनु काबु योसेफ आ गेय पचा कली पोतीफर आ खिम बाक्माक्त। खिम गेय पाइब मुर सुइ मबाक्मा बाक्त।

12 मिनु मेको मीश मुरुमी योसेफ आ फेक्शो वा ग्याइश्शा कीशा “गो नु बाक्को” देमाक्त। मिनु योसेफ आ फेक्शो वा प्रोइशा, खिं रे दोरशा लाडगा गूमाक्त।

13 पोतीफर आ मीशेमी योसेफ आ फेक्शो वा आंम गुइमी प्रोइशा वोइश्शा, खिं रे प्रोक्शो तशा,

14 खिं डा मुर आन कली ब्रेश्शा “कोव्रडीन, पोतीफरमी एको हिब्रू मरिम्शो पपाइक्चा कली चाक्तु। एकोमी आं कली ग्याइक्ताक्यी ‘गो नु बाक्को’ दे माइक्ती। गो चहिं ठेयब सेंदामी वाइ ब्रेत्ती।

15 मिनु आं कली वाइ ब्रेश्शो तशा, आ वा प्रोइशा प्रोक्त” दे माइक्मी बाक्त।

16 मिनु मेकोमी योसेफ आ फेक्शो वा आ नेक्था वोइश्शा, आ वोइश मजाक्म सम्म रिम्दा बाक्त।

17 पोतीफर जाक्मेनु, आ मीशेमी “एको इन चाक्शो गेय पाइब हिब्रूमी आं कोठा ओव्रशा ‘गो नु बाक्को’ देत।

18 गो चहिं वाइ ब्रेत्ती। मिनु आ फेक्शो वा प्रोइशा, खिं रे गूशा प्रोक्त” दे मदा बाक्त।

19 मिनु आ होव्रपमी आ मीश आ लोव्र नेंशा, चुरमाक्त।

20 योसेफ कली लाइश्शा, जेल्खानम चोक्पदा बाक्त। मेकेर पिप आ चोक्शो मुरपुकी यो बाक्मा बाक्त। मिनु योसेफ मेकोपुकी नु बाक्माक्त।

21 मिनु परमप्रभु यावेमी योसेफ कली वारच पशा, जेल्खान डा कोव्रब कली “योसेफ रिम्शो मुर बाक्ब” दे तुइक्पदा बाक्त।

22 मिनु मेको कोव्रब मुरुमी योसेफ कली जेल्खानम चोक्शो मुर आन कली कोव्रब सेला बाक्त। मिनु मेकेर बाक्शो गेय नेल्ल योसेफमी पवा बाक्त।

23 मेको जेल्खान डा कोव्रब मुरुमी योसेफ आ पशो यो मकोव्रडा बाक्त। मारदे हना परमप्रभु यावे मेको नु बाक्शो तुइक्ता बाक्त। मेको नेल्ल रिम्शो पाइब, दे थमा सुदा बाक्त। मिनु परमप्रभु यावे मेको नु बाक्मेनु, आ गेय नेल्ल रिम्शो दुम्माक्त।

## 40

### योसेफमी डोमु आ अर्थ शेंशो

1 मिनु नोले मार दुम्माक्त देंशा हना, इजीप्त डा पिप फाराओ आ खिंमी पिप कली तूचा गेब आन ठेयब मुर नु पिप कली शोब्ले चोइब आन ठेयब मुरुमी आस प्रभु इजीप्त डा पिप कली मरिम्शो पाम्से बाक्त।

2 मिनु फाराओमी मेको तूचा गेब आन ठेयब मुर नु शोब्ले चोइब आन ठेयब मुर आस पर्बम गाइक्ता बाक्त।

3 मिनु मेको निम्फा आस कली नेल्ल क्येडा ठेयब गेय पाइब आ जेल्खानमी चोक्सी बाक्त। मेकेर योसेफ यो बाक्शो बाक्माक्त।

4 मिनु जेल्खान डा कोव्रब मुरुम योसेफ कली “मेको निम्फा आस कली वारच पावो” दे अरेवा बाक्त। मिनु वारच पवा बाक्त।

5 मिनु इजीप्त डा पिप आ गेय पाइब ठेयब मुर निक्शी जेल्खानमी बाक्सानु, काबु नाक्दो निम्फामी डोमु ताम्से बाक्त। मेको आस डोमु आस अर्थ निक्शी बाक्माक्त।

6 मिनु सुनी कना योसेफ मेको निक्शी आस कली वारच पथ, आस कोठा ओव्रमेनु, निम्फा सुर्ता पा बाक्शो ताम्सी बाक्त।

7 मिनु योसेफमी जेल्खानम बाक्शो फाराओ आ गेय पाइब आ ठेयब मुर निक्शी आस कली “मारदे सुर्ता पनी?” दे हिल्लो पाम्सी बाक्त।

8 मिनु मेको निक्शीमी “गो डोमु ताइतस्कु। मिनु मेको डोमु आ अर्थ मरुप्स्कु। शेंब मुर मबा” देंसा बाक्त। मिनु योसेफमी “परमप्रभुमी मेको डोमु मार बाक्बा दे शेंबा ममाइ डा? लो, आं

कली देनीन” दे माइकसी बाक्त। उत्पत्ती ४१:१५-१६; दानीएल २:२७-२८

9 मिनु फाराओ कली तूचा गेब आन ठेयब मुरुमी “गो आं डोमुमी आं डोंइती अडगुर बोट का ताता।

10 मिनु मेको अडगुर बोटमी राशी सां बाक्तेकम। मिनु मेको कोच्वा दाप्शा, फू यो बोइक्तेकमे। बोइश्शा डा मिन अडगुर गेडा सिश्शा मीतेकम।

11 मिनु आं गुइमी फाराओ आ कचौरा बाक्त। मिनु गो अडगुर आ गेडा आ रस फाराओ आ कचौरामी चिम्ता। मिनु कचौरा पिप कली गेता” दे लोव्र पवा बाक्त।

12 मिनु योसेफमी “इन तशो डोमु आ अर्थ मार बाक्ब देंशा हना, मेको राशी सां नाक्ती सां बाक्नीम।

13 मिनु सांबु नाक्ती फाराओम इन कली जेल्खान रे प्रोंइशा डा मिन इन डोंइती पशो गेय लेंशा गेब। मिनु गे डोंइती डा खोदेशो पा फाराओ कली तूचा गेनीनी। लेंशा फाराओ कली कचौरा गेनीनी। इन तशो डोमु आ अर्थ एको बाक्ब।

14 इन कली रिम्शो दुम्मेनु, आं कली यो मप्रेंदीन। आं कली शिशी पने। फाराओ कली आं कली मेको जेल्खान रे गुंइचा, दे लोव्र पने।

15 डोंइती आं कली हिब्रू रागी रे खुइ पा चाक्तीमी। मुल जेल्खानम चोक्तीमी। गो मारेइ मरिम्शो मपड” देंमाक्त। उत्पत्ती ३७:२८

16 मिनु फाराओ कली शोब्ले चोइब आन ठेयब मुरुम मेको डोमु आ अर्थ रिम्शो बाक्त, देंशा, योसेफ कली “गो यो डोमु का ताता। मेको डोमुम पिरीडगा सां बुश शोब्ले पियाम कुरशो बाक्ती।

17 नेल्ल क्येडा आ तार डा पिरीडगामी फाराओ कली शुश खाल डा चोशो शोब्ले बाक्तेकमे। मेको पिरीडगा डा शोब्ले चिक्बीम खुइ पा जाम्तेकम” दे मदा बाक्त।

18 मिनु योसेफमी “इन तशो डोमु आ अर्थ मार बाक्ब देंशा हना, मेको पिरीडगा सां, नाक्त सां बाक्नीम।



5 मिनु फाराओ लेंशा निन्द्रा पवानु, लेंशा अर्को डोमु तवा बाक्त। मार तवा बाक्त देंशा हना, चेरब बोट कामी शुश आख पाइशो ७ ओटा ग्रेल्शो बाला सिशो तवा बाक्त।

6 मिनु नोले पूर्व डा फशेम बुश सेल्शो ७ ओटा सोप्पीक्च आइक्च बाला तवा बाक्त।

7 मिनु मेको आइक्च बालामी मेको शुश आख पाइशो ७ ओटा बाला आन कली दाक्मे बाक्त। नोले फाराओ सेंशा, आ डोमु तशो तुइक्ता बाक्त।

8 मिनु आ थुं मनुथु सुनी कना इजीप्त डा जादू पाइब नु जोक्ब तुइक्ब नेल्ल आन कली ब्रेथ सोइक्तीमी बाक्त। मेको जाक्मानु, आ डोमु मेको आन कली शेंदीमी बाक्त। तन्न सुइमी फाराओ कली मेको डोमु आस अर्थ देंने मचाप्मे बाक्त। दानीएल २:३

9 मिनु फाराओ कली तूचा गेब आन ठेयब मुरुमी आ पिप कली “मुलाक्ती आं मरिम्शो पशो मिम्ताक्ड।

10 फाराओमी आ गेय पाइब आस पर्बम चुरमेनु, गो नु शोब्ले चोइब आन ठेयब मुर नेल्ल क्येडा ठेयब गेय पाइब आ जेल्खानम चोक्सीशा बाक्स्कुनु,

11 गो निक्शीम काबु नाक्दो डोमु ताइतस्कु। मेको डोमु निक्शी के अर्थ निक्शी बाक्सा बाक्त।

12 मेना हिब्रू रागी डा ठिटा का यो जेल्खानम बाक्त। मेको इन नेल्ल क्येडा ठेयब गेय पाइब आ गेय पाइब बाक्त। गो निक्शीमी तशो डोमु मेको कली माइक्स्कुनु, योसेफमी डोमु आ अर्थ नेल्ल आंस कली शेंताक्स्की। आं तशो डोमु आ अर्थ शेंताक्यी। मिनु अर्को मुर आ तशो डोमु आ अर्थ यो शेंताक्व।

13 दोदेशो पा शेंदा, मोदेशोन दुम्त। आं गेय आं कली लेंशा गेतीनी। अर्को कली चहिं क्याइशशा साइक्तेक्म” देंमाक्त।

14 मिनु फाराओमी योसेफ कली ब्रथ सोइक्ता बाक्त। मेकोपुकीमी योसेफ कली रीब पा जेल्खान रे गुंडपदमे बाक्त।



योसेफ कली चां प्रेक्शा, नक वा फेक्पा, फाराओ आ बाक्तीके चाक्मे बाक्त।

15 मिनु फाराओमी योसेफ कली “गो डोमु निक्शी ताता। सुइमी मेको आस अर्थ शेने मचबेम। मिनु गो इ पर्वम लोव्र नेंता। गे मुर आन तशो डोमु आ अर्थ शेने चाप्नेवे ने” देंमाक्त।

16 मिनु योसेफमी फाराओ कली “गो डोमु डा लोव्र मतुइक्नुड। परमप्रभुमी फाराओ कली थमा पा थुं नाइक्चा डा लोव्र तुइक्पाइक्ब” देंमाक्त। उत्पत्ती ४०:८

17 मिनु फाराओमी “गो आं डोमुमी नील खोला आ नेक्था बाक्ती।

18 मिनु नील खोला रे ७ ओटा दारशो दोम्शो बी गूतेक्म। मिनु बुदी मीलु घांस ब्वाम्तेक्म।

19 मिनु नोले ७ ओटा मदारशो ग्येंशो बी गूतेक्म। गो इजीप्त रागी नेल्लेमी मोदेशो मदारशो बी गेनायो मतडमी।

20 मिनु मदारशो गेयशो बीपुकीमी डोंइती गूशो दोम्शो बी आन कली ब्वाम्तेक्म।

21 मिनु मेको आन कली ब्वशा यो, गेयशो बी मदोम्म। डोंइती डा खोदेशो पा गेयस डा गेयस बाक्तेक्म। बी ब्वाम्तेक्म, दे सुइमी थमा मसुदेम। मिनु नोले गो सेंसाक्यी।

22 मिनु लेंशा इप्ती। मिनु डोमु तडानु, चेरब बोट का रे ७ ओटा ठेयब रिम्शो बाला पाइश्शो तातामी।

23 मिनु नोले अर्को बोट रे ७ ओटा पूर्व डा फशेम सोव्रशो इम्चीली सोप्पीक्च बाला ताता।

24 मिनु इम्चीली सोप्पीक्च बालापुकीमी मेको ७ ओटा रिम्शो बाला आन कली दाक्तेक्म। गो एको आं डोमु जादू पाइब आन कली माइक्तामी। मेकोपुकीम एको डोमुमी मार दुम्बा, दे देंने मचबेम” दे योसेफ कली देंमाक्त।

25 मिनु योसेफमी फाराओ कली “इन डोमु निम्फा कांइचीक खोदेशो बाक्ब। परमप्रभुमी मार पचशो बाक्मे, मेको इन कली

डोमुमी कोंइताक्व ।

26 मेको ७ ओटा रिम्शो बी ७ ओटा बर्स बाक्नीम । मिनु मेको ७ ओटा रिम्शो बाला यो ७ बर्स बाक्नीम । डोमु निक्शी कांइचीक खोदेशो बाक्नीस ।

27 मिनु मेको आ नोले ग्रूशो ७ ओटा ग्येंशो बीपुकी ७ ओटा बर्स बाक्नीम । मिनु मेको ७ ओटा गेडा मसिश्शो, पूर्व डा फशेम सोत्रशो सोप्पीक्च बाला यो ७ ओटा बर्स बाक्नीम । मेको ७ बर्स डा अन्काल बाक्नीम ।

28 आं देंशो मार बाक्ब देंशा हना, परमप्रभुमी मार पचा चिक्शो बाक्मे, मेको इन कली कोंइताक्व । मोदेशो बाक्ब ।

29 नेनीन, इजीप्त रागी नेल्लेमी ७ बर्स सम्म शुश बाली नाली ग्रेल्शा, रिम्शो बर्स दुम्चा चिक्शो बाक्नीम ।

30 मिनु आ नोले ७ बर्स सम्म अन्काल दुम्ब । मिनु मेको मरिम्शो ७ बर्सम इजीप्त रागीमी अन्न ग्रेल्शो नेल्ल प्रेंनीम । मिनु मेको अन्कालमी रागी कली थुम्पाइक्ब ।

31 मिनु मेको ठेयब अन्काल दुम्शा, डोंइती अन्न ग्रेल्शो बर्स नेल्लेमी प्रेंनीम । मारदे हना मेको अन्काल शुश श्येत डा बाक्ब ।

32 मिनु इन डोमु निक्शी खेयप ताइतीनी, मेको आ अर्थ मार बाक्ब देंशा हना, परमप्रभुमी मेको थमा पा पाइब नु पचा चिक्शो बाक्ब ।

33 मोपतीके फाराओमी निप्स पाइश्शो मुर का इजीप्त रागी डा ठेयब मुर सेलीन ।

34 मिनु आं देंशो पशा, कोत्रब मुरपुकी यो वोइक्चा मालनीनी । मेकोपुकीमी फाराओ आ सासनमी रिम्शो ७ बर्सम इन रागी नेल्ल रे अन्न ५ भाग तिरो पोक्चा मालनीम ।

35 मेको रिम्शो बर्स डा अन्न खुप्शा, अन्काल डा बर्सम सहर डा मुर आन कली थुल्चा कली उप्शा वोइक्चा मालनीम ।

36 मेको उप्शा वोइश्शो अन्न इजीप्त रागीमी अन्काल मदुम सम्म उप्चा माल्ब । मोपा वोइश्शोनु, अन्कालमी मबेक्नीम” दे योसेफमी

फाराओ कली मदा बाक्त।

### योसेफ ठेयब मुर दुम्शो

37 मिनु फाराओ नु आ गेय पाइब नेल्लेमी “योसेफ आ देशो लोत्र रिम्शो बाक्ब” दे मिम्तमे बाक्त। हितोपदेस १४:३५

38 मिनु फाराओम आ गेय पाइब आन कली “गो योसेफ खोदेशो मुर अर्को सु थिन्ने चाप्नया डा? परमप्रभु आ सोक्तीम ब्रीशो मुर का थिन्ने चाप्नया डा?” दे हिल्लो पामी बाक्त। प्रस्थान ३१:३; हितोपदेस २:६

39 मिनु फाराओमी योसेफ कली “परमप्रभुमी मेको नेल्ल इ कली तुइक्पाइक्तु। इ खोदेशो जोक्ब तुइक्ब मुर सुइ मथिंसीब।

40 इ कली आं रागी डा मुर आन कली हुकुम पाइब सेल्लन। इ देशो लोत्र मुर नेल्लेमी टिचा माल्नीम। गे आं सरकार डा गेय पाइब नेल्ल आन क्येडा ठेयब मुर दुम्नीनी। गो सिरपेचम पतीके ला इ क्येडा ठेयब बाक्नुड। भजन संग्रह ११३:७

41 नेनीन, गो इ कली इजीप्त रागी नेल्ल डा ठेयब मुर सेल्लन्नी” देंमाक्त। प्रेरित ७:१०

42 मिनु फाराओम आ छाप क्येप्तीक औंठी आ ब्रेप्चो रे प्रुइश्शा, योसेफ आ ब्रेप्चोम लिक्ता बाक्त। मिनु योसेफ कली दारशो बुश वा फेक्पाइश्शा, सुन के माला रेल्ला बाक्त। एस्तर ३:३०; दानीएल ५:२९

43 मिनु फाराओमी योसेफ कली आ नोले डा बग्गीमी डोइक्पदा बाक्त। मिनु योसेफ आ डोंइती बाक्बपुक्कीमी “योसेफ आ डोंइती पोक्च थेक्शा, सेउ पने” दे ब्रेम्मा बाक्त। मोपा इजीप्त रागी डा हुकुम पाइब सेला बाक्त। एस्तर १०:३

44 मिनु फाराओमी “गो फाराओ नड। इजीप्त रागीमी गे मार पचा देंनी, मेको ला पचा माल्नीम” दे योसेफ कली देंमाक्त।

45 मिनु फाराओमी योसेफ कली साफेनाथ-पानेआह, दे नक नें वोदा बाक्त। मिनु योसेफ कली पोतीफेरा माइश्शा ओन सहर डा

नाक्सो आ तमी आसेनाथ नु ग्युंवे पाइक्ता बाक्त। मिनु योसेफ इजीप्त रागी नेल्ल कोव्रथ हिरचा गोवा बाक्त।

46 योसेफ फाराओ पिप आ डोंइती लोव्र पवानु, ३० बर्स दुम्शो बाक्माक्त। मिनु फाराओ आ डोंइती रे लशा, इजीप्त रागी नेल्ल हिरथ लमाक्त। उत्पत्ती ३७:२

योसेफम इजीप्त कली गेय पशो

47 मिनु मेको रिम्शो बाली ग्रेलतीक ७ बर्समी इजीप्त नेल्ल डा रूमी थाम्पा अन्न ग्रेल्माक्त।

48 मिनु योसेफमी मेको बाली ग्रेल्शो ७ बर्स डा अन्न सहर सहरम उप्शा, वोदा बाक्त। मेको सहरम एर ओंथ सु सु आन रू बाक्मे, मेकेर डा अन्न मेको सहरम उप्शा वोदा बाक्त।

49 मिनु योसेफमी समुन्द्र डा बाल्वा खोदेशो पा अन्न उप्शा, शुश दुम्तीके पुक्चा यो प्रोना बाक्त। मारदे हना पुक्ने मचाप्चा डा पा शुश बाक्माक्त।

योसेफ आ तौ निक्शी

50 मिनु अन्काल दुम्चा डोंइती योसेफ आ मीश ओन सहर डा नाक्सो पोतीफेरा आ तमी आसेनाथमी तौ निक्शी थिमाक्त।

51 मिनु योसेफमी “डोंइती श्येत जडानु, परमप्रभुमी आं आफ आ खिं डा मुर आन कली प्रंपाइक्ती” दे मिम्शा, आ डोंइती जरमेशो तौ कली मनस्से नें वोदा बाक्त।

52 अर्को कली एफ्राइम नें वोदा बाक्त। मारदे हना “परमप्रभुमी आं कली रागीमी श्येत जडानु, शुश दुम्पाइक्ती” दे मिम्ता बाक्त।

53 मिनु इजीप्त रागीमी मेको रिम्शो अन्न ग्रेल्शो ७ बर्स नुम्माक्त।

54 मिनु योसेफ आ देशो ७ बर्स डा अन्काल दुम्चा गोवा बाक्त। मेको अन्काल रागी रागी नेल्लेमी दुम्माक्त। इजीप्त रागीमी चहिं अन्न थिंसे बाक्त।

55 मिनु इजीप्त रागीमी ठेयब अन्काल दुम्शा, मुरपुकीमी फाराओ कली “अन्न गेकी” दे पुन्मे बाक्त। मिनु फाराओम इजीप्त डा मुर

आन कली “योसेफ नु पुंइथ लने। मेकोमी मार देंबा, मेको पने” दे माइक्मी बाक्त।

56 मिनु मेको अन्काल रागी रागी नेल्लेमी दुम्माक्त। मेना योसेफमी अन्न वोइक्तीक नेल्ल रोक्या गोवा बाक्त। इजीप्त डा मुर आन कली अन्न लेयपदा बाक्त। रागी नेल्लेमी ठेयब अन्काल दुम्माक्त।

57 मिनु अर्को रागी डा मुरपुकी यो इजीप्त रागीमी अन्न ग्याप्य, योसेफ आ डोंइती जाक्मा बाक्त। मारदे हना मेको अन्कालम रागी नेल्ल ग्रीइक्माक्त।

## 42

याकूब आ तौपुकी इजीप्त लशो

1 मिनु याकूबमी इजीप्त रागीमी अन्न बाक्ब दे तुइश्शा, आ तौ आन कली “गे मारदे कोव्रमुशा बाक्नीनी? मारेइ मपाइनीनी?

2 नेनीन, इजीप्त रागीमी अन्न बाक्ब। मिनु गोपुकी अन्कालमी मबेक्य, ब्रोंइय अन्न ग्याप्य लने” देंमाक्त।

3 मिनु योसेफ आ १० जना लोक्बपुकी इजीप्त अन्न ग्याप्य लमा बाक्त।

4 याकूबमी योसेफ आ लोक्ब बेन्यामीन कली चहिं श्येत दुम्बा कों, दे हिंशा, आ लोक्बपुकी नु मसोइक्ता बाक्त।

5 मोपा याकूब आ तौपुकी अर्को मुर नु इजीप्त अन्न ग्याप्य जाक्दीम्मा बाक्त। मारदे हना कनान रागीमी यो अन्काल दुम्माक्त।

6 मिनु योसेफ सरकार डा ठेयब मुर दुम्शा, रागी नेल्ल डा मुर आन कली अन्न लेयपदा बाक्त। योसेफ आ लोक्बपुकी जाक्शा, योसेफ आ डोंइती खुम्की पा बाप्शा, सेउ पामे बाक्त।

7 मिनु योसेफमी आ लोक्ब आन कली तशा, तुइक्ता बाक्त। तन्न मतुइश्शो खोदेशो पा ठेयब सेंदामी “ते रे जाक्नी?” दे हिल्लो पामी बाक्त। मिनु मेकोपुकीमी “गो कनान रागी रे अन्न ग्याप्य जाक्तक” देंमा बाक्त।

8 योसेफम आ लोकब आन कली तुइक्ता बाक्त। मेकोपुकीमी चहिं योसेफ कली मतुइक्त्मे बाक्त।

9 मिनु योसेफम आ लोकब आन पबर्म आ डोमु मिम्ता बाक्त। मिनु मेको आन कली “गे क्यारी पाइब बाक्नीनी। एको रागीम ते रे ओत्रचा, दे कोत्रथ जाक्तीनी” दे आ लोकब आन कली माइक्मी बाक्त। उत्पत्ती ३७:५-९

10 मिनु मेकोपुकीमी “ममाइ प्रभु, इन गेय पाइब अन्न ग्यापथ जाक्तक।

11 गो नेल्ल मुर का आ तौ नकी। गोपुकी ठीक पाइब बाक्नीकी। इन गेय पाइब, गो क्यारी पाइब मनकी” देंमा बाक्त।

12 मिनु योसेफमी “ममाइ, गे एको रागी ‘दोपा ओत्रचा’ दे कोत्रथ जाक्तीनी” देंमाक्त।

13 मिनु मेकोपुकीमी “गो इन गेय पाइब १२ जना लोकब बाक्नीकी। कनान रागी डा मुर का आ तौ नकी। नेनीन, कान्छा मुल आ आफ नु बाक्ब। का चहिं मबाक्ब” दे योसेफ कली मदमे बाक्त।

14 मिनु योसेफमी “आं देशो खोदेशो पा, गे क्यारी पाइब बाक्नीनी।

15 गो इन कली कोत्रनुड, फाराओ आ नेमी इन लोकब कान्छा मजाक्म सम्म गे एकेर रे लचा मताइनीनी।

16 इन दाते डा का कली इन लोकब कान्छा ब्रथ सोइक्तीन। मेना सम्म गे एक जेल्खानम बाक्नीनी। इन लोत्र थमा बाक्म कों, जोल बाक्म कों, नोले तुंइसीब। गे इन लोकब कान्छा मचाक्तीनी हना, फाराओ आ नेमी गे क्यारी पाइब बाक्नीनी” देंमाक्त।

17 मेको नेल्ल आन कली नाक्त सां सम्म जेल्खानम चोक्मी बाक्त। उत्पत्ती ३७:२४

18 मिनु नाक्त सां नोले योसेफमी “गो परमप्रभु कली मान पा हिंनुड। मोपतीके गेपुकी ब्रोंइचा कली आं देशो पने।

19 गे ठीक पाइब मुर बाक्तीनी हना, इन दाते डा का चहिं जेल्खानम बाक्कीने। अर्को अन्न कुरशा, इन खिं लने।

20 इन लोकब कान्छा कली एक चाक्कीन। मिनु इन लोव्र थमा बाक्ब, दे तुंडसीब। मिनु गे बेक्चा ममाल्नीनी” दे आ लोकब आन कली माइक्मी बाक्त। मिनु आ देशो पामे बाक्त।

21 मेकोपुकीमी “गो थमा पा इं लोकब आ पर्बम ठेयब पाप पाइतय। मेकोमी इं कली तशा, शुश हिंशा, पुनानु यो, मेको आ लोव्र मनंय। मोपतीके इं कली एको श्येत दुम्त” देंमुमा बाक्त। भजन संग्रह ५०:२१

22 मिनु रूबेनमी “मेको आल कली मारेइ पाप मपने, दे गो इन कली मदेडा डा? तन्न गे आं लोव्र मनंनी। मेको कली श्येत गेशो हुश आ क्येक्क लेत्चा पुंडसाक्य” दे आ लोकब आन कली देमाक्त। उत्पत्ती ३७:२१-२२

23 मिनु योसेफमी मेको आन लोव्र नेल्ल रुप्तु, दे मतुइक्तमे बाक्त। मारदे हना योसेफमी मेकोपुकी नु लोव्र पवानु, आन लोव्र रूप्ब नु आ कली आ अर्थ देंब मुर का वोदा बाक्त।

24 मिनु योसेफ आ लोकबपुकी रे लशा डाक्माक्त। मिनु लेशशा जाक्शा, मेकोपुकी नु लोव्र पशा, मेको आन डोंइती सिमियोन कली पाइक्ता बाक्त।

25 मिनु नोले योसेफमी आन धोक्रोम अन्न प्रिंपाइशशा, आन गेशो क्येट यो लेंशा, आन धोक्रोम कुर पपाइशशा, लां कली जचा थोव्रक यो गेपाइक्मी बाक्त। आ लोकब आन कली मोदेशो पाइक्मी बाक्त।

26 मिनु मेकोपुकी अन्न आन गधा तारी वोइशशा लमा बाक्त।

27 मिनु लांमी बास बाक्मानु, आन दाते डा कामी आ गधा कली थुल्चा, दे आ धोक्रो रोकगा बाक्त। मिनु आ धोक्रो आ शोव्रमी आ थाप्शो क्येट थिदा बाक्त।

28 मिनु मेकोमी आ लोकब आन कली “आं क्येट लेत्मे देय मार में? आं धोक्रो आ शोव्रम बाक्त, शां” दे लोव्र पवा बाक्त। मिनु नेल्लेमी सुर्ता पशा “परमप्रभुमी इं कली मार पवा” दे हिंमा बाक्त।

29 मेकोपुकीमी आन आफ याकूब आ खिं कनान रागी जाक्दीशशा, मार मार दुम्मे, नेल्ल शोव्रडमे बाक्त।

30 मेकोपुकीमी “मेको रागी डा ठेयब मुरुम आंइ कली ठेयब सेंदामी लोव्र पशा, आंइ कली आन रागी क्यारी पाइब सुइव्तु।

31 गोपुकीमी ‘गो ठीक पाइब बाक्नीकी, गो क्यारी पाइब मनकी।

32 गो १२ लोकब, आफ का आ तौ नकी। का मुल मबाक्ब, कान्छा कनान रागीम आफ नु बाक्ब’ दे माइव्तक।

33 मिनु मेको रागी डा ठेयब मुरुम आंइ कली ‘गो दोपा तुइक्नुडा, गे ठीक मुर बाक्नीनी, दे इन लोकब का गो नु बाक्चा माल्ब। अरु चहिं अन्कालम जचा कली अन्न कुरशा, खिं लेशशा लने। उत्पत्ती ४२:२४

34 मिनु इन लोकब कान्छा कली एक चाक्कीन। मेको नोले ला गेपुकी क्यारी पाइब मननी, दे तुइक्नुड। मेना इन लोकब कली प्रॉइशा, लचा गेनुड’ दे माइक्तीकी” दे आन आफ कली देंमा बाक्त।

35 मिनु नोले आन धोक्रो रोकशा, नेल्लेमी आन थाप्शो क्येट आन धोक्रोमी थित्मे बाक्त। मिनु मेकोपुकी नु आन आफ मेको क्येट तशा, हिंमा बाक्त।

36 मिनु आन आफ याकूबमी “गे आं आल कली रोइक्ब बाक्नीनी। योसेफ लत। सिमियोन लत। मुल बेन्यामीन लाइक्चा माल्नीनी। एको नेल्ल आं कली श्येत गेचा कली बाक्ब” दे आ तौ आन कली देंमाक्त।

37 मिनु रूबेनमी “गो बेन्यामीन ठीक पा मलेत्ताक्ड हना, आं तौ निक्शी आस कली सतीन” दे आ आफ कली मदा बाक्त।

38 मेकोमी “आं तौ गे नु लचा मगेनुड। आ लोकब बेक्त, आ का ला बाक्ब। मेको कली लांमी मार मार दुम्ने चाप्ब। बेक्त हना, गेपुकीमी चां बोइश्शो आं कली ठेयब श्येत जपाइश्शा तुरसुम वोइक्चा माल्नीनी” दे याकूबम आ तौ आन कली माइक्मी बाक्त।



याकूब आ तौपुकी लेंशा इजीप्त लशो

1 मिनु मेको रागीमी अन्काल बारना बारन लमाक्त।

2 मिनु आन इजीप्त रे चाक्शो अन्न नेल्ल नुष्शा, आन आफोमी मेको आन कली “लेंशा इच्का जचा थोत्रक ग्यापथ लने” दे माइक्मी बाक्त।

3 मिनु यहूदामी “मेको ठेयब मुरुमी ‘गे इन लोकब कान्छा मचाक्तीनी हना, आं कली ग्रुमथ मजाक्कीन’ दे आंइ कली हुइक्ताक्व। उत्पत्ती ४२:१५-३४

4 गे आंइ लोकब कान्छा कली गोपुकी नु सोइक्ताक्नी हना, ला लाइनीकी।

5 गे मेको कली गो नु मसोइक्ताक्नी हना, मलाइनीकी। मारदे हना मेको ठेयब मुरुमी ‘गे इन लोकब कान्छा मचाक्तीनी हना, आं कली ग्रुमथ मजाक्कीन’ दे आंइ कली हुइक्ताक्व” दे आ आफ कली देंमाक्त।

6 मिनु इस्राएलमी “मारदे मेको मुर कली ‘आंइ लोकब कान्छा बाक्ब’ दे शेंदीनी? मिनु आं कली ओदेशो मरिम्शो पाइय्यीनी” दे माइक्मी बाक्त।

7 मिनु मेकोपुकीमी “मेको ठेयब मुरुमी ‘इन आफ मुल सम्म ब्रोंइशो बाक्बा? अर्को लोकब यो बाक्बा?’ दे आंइ कली खिं डा मुर आन पर्बम शुश हिल्लो पाप्तु। मिनु गोपुकीमी मेकोन देंतक। ‘इन लोकब कान्छा चाक्कीन’ देंब, दे गो दोपा तुइक्नीकी?” दे आन आफ कली देंमा बाक्त। उत्पत्ती ४२:७-१३

8 मिनु यहूदामी “कान्छा गो नु सोइक्तीन। गे गो नु इं आइक्च आल यो मबेक्मल, दे गो लाइनीकी।

9 गो एको आ जमानी दुम्नुड। गो लेशशा जाक्डानु, गो एको कली चाक्शा, इन डोंइती मवोइक्ता हना, गेना हना यो आं पाप लील।

10 गो एको कली रिम्शा मबाक्शो नकी हना, गो खेयप निक्शी लने पिने थुम्क वा” दे आ आफ कली देंमाक्त।

11 मिनु आन आफ इस्राएलमी “मुल मो दुम्चा माल्शो बाक्त हना,

गे मेको ठेयब मुर कली इं रागी डा नेल्ल क्येडा रिम्शो फल, इच्का खेक्तीक तेल, इच्का खुदो, मस्लापुकी, ब्रोव्रशो रिना पाइब थोव्रक, फोरो नु देसी बदाम कोसेली लतीन। हितोपदेस १८:१६

12 मिनु इन क्येट नु डोंइती डा इन धोक्रोम बाक्शो क्येट यो लतीन। प्रेशा मो दुम, कौ? मार दुम्मे? उत्पत्ती ४२:२७, ३५

13 इन लोकब कान्छा लाइशशा, मेको ठेयब मुर कली लेंशा गुम्थ लने।

14 नेल्ल क्येडा सक्ति पाइशशो परमप्रभुमी मेको मुर आ डोंइती इन कली शिशी गेवल। मिनु इन अर्को लोकब नु बेन्यामीन यो सोइक्तल। गो श्येत जचान माल्शो बाक्ती हना यो, श्येत जडल” दे आ तौ आन कली माइक्मी बाक्त।

15 मिनु आ तौपुकीमी मेको कोसेली, डोंइती डा क्येट, अर्को क्येट नु बेन्यामीन लाइशशा, इजीप्त रागी लशा, योसेफ आ डोंइती जाक्दीम्मा बाक्त।

16 मिनु योसेफमी मेकोपुकी नु बेन्यामीन कली तशा, आ खिं डा ठेयब गेय पाइब मुर कली “मेको मुर आन कली आं खिं लाइक्मी। बस्तु का क्योरशा, भोज ठीक पावो। मारदे हना मुलाक्ती मेकोपुकी गो नु जाइनीम” देंमाक्त।

17 मिनु मेको मुरुम योसेफ आ देंशो पशा, नेल्ल आन कली योसेफ आ खिं ओंइदीमी बाक्त।

18 मेकोपुकी चहिं हिंमा बाक्त, मारदे हना योसेफ आ खिं आगा ओंइदीमी बाक्त। मिनु मेकोपुकीमी “मारदे हना इं डोंइती डा क्येट इं धोक्रोम थित्तय। मिनु इं कली वाइल सेल्चा नु इं गधा रोइक्चा कली इं कली एके ओंइताक्मे” देंमुमा बाक्त। उत्पत्ती ४२:२८

19 मिनु योसेफ आ खिं डा ठेयब गेय पाइब आ नेक्था लशा, लाप्चो रे मेको नु लोव्र पामे बाक्त।

20 मिनु “हजुर, गोपुकी डोंइती खेयप का जचा थोव्रक ग्याप्थ जाक्तक।

21 मिनु गोपुकी बास बाक्तीके जाक्दीशशा, आंइ धोक्रो रोक्शा, कोव्रकानु, आंइ क्येट नेल्ल आंइ धोक्रो धोक्रोम थित्तक।

22 मुल गो लेंशा चाक्तक। अर्को जचा थोव्रक ग्याप्चा कली यो क्येट चाक्तक। सुम आंइ क्येट आंइ धोक्रोम कुर पवा, गो मतुइक्नीकी” दे ठेयब गेय पाइब कली देंमा बाक्त।

23 मिनु मेकोमी “इन थुं नाइक्तीने, महिनीने। इन परमप्रभु, इन आफ आ परमप्रभुमी इन क्येट इन धोक्रोम कुर पवा माइ। गो इन क्येट ताक्ता” देंमाक्त। मिनु मेकोमी सिमियोन कली चाक्गा बाक्त।  
उत्पत्ती ४२:२४

24 मिनु मेको मुरुम मेको आन कली योसेफ आ खिं ओंइशा, खोइल चिक्चा कली व्वाक्कु गेवा बाक्त। आन गधा आन कली थुला बाक्त।

25 मिनु नाक्ती दुग्चा चिक्तानु, मेको नु काथा जचा माल्ब देंशो नेंशा, आन कोसेली गेचा कली ठीक पामे बाक्त।

26 मिनु योसेफ जाक्मेनु, मेकोपुकीमी आन कोसेली लाडगा रे ओंइशा, मेको आ डोंइती वोइशशा, खुम्की पा बाप्शा खेत्मे बाक्त।

27 मिनु योसेफमी मेको आन कली “दोपा बाक्नी? इन आफ, इन देंशो खाल्पा, रिम्शो बाक्मे? मुल सम्म ब्रोंइमे?” दे हिल्लो पामी बाक्त।

28 मिनु मेकोपुकीमी “इन गेय पाइब आंइ आफ मुल सम्म ब्रोंइशो नु रिम्शो बाक्ब” देंशा, आन पिया खुक्शा, सेउ पामे बाक्त। उत्पत्ती ३७:७,९

29 मिनु योसेफमी आ लोक्ब बेन्यामीन, आ ममा आ तौ तशा “इन देंशो इन लोक्ब कान्छा एकोन बाक्बा?” देंशा, बेन्यामीन कली “परमप्रभुमी इ कली शिशी पवल, आं तौ” देंमाक्त।

30 मिनु योसेफमी आ लोक्ब तशा, ग्येरसीशा डाक्चा कली ते लड, दे आ कोठा लशा डाक्माक्त।

31 मिनु आ कुल चिक्शा, लेम्माक्त। मिनु गेय पाइब आन कली “शोब्ले खेत्तीन” देंमाक्त।

32 मिनु योसेफ, आ लोकब नु मेको नु जाइब इजीप्त डा मुर नेल्ल आन कली आन पेवा पेवा जचा थोव्रक खेत्मे बाक्त। मारदे हना इजीप्त डा मुर हिब्रू नु जचा मदुम्बाक्माक्त। इजीप्त डा मुरपुकी प्रांग्रा दीबाक्मा बाक्त। उत्पत्ती ३९:६; उत्पत्ती ४६:३४; प्रस्थान ८:२२

33 मिनु योसेफमी आ लोकब आन कली डोंइती जरमेशो, माइला, साइला पा कान्छा सम्म गार पा निप्पदा बाक्त। मिनु मेकोपुकी छक लाक्मा बाक्त।

34 मिनु योसेफ आ डोंइती रे जचा ब्वचा थोव्रक लाइशशा, मेको आन कली खेप्पदा बाक्त। बेन्यामीन आ भाग अरु आन क्येडा ५ भाग खोइ शुश बाक्माक्त। मिनु मेकोपुकी योसेफ नु जशा तूशा, ग्येरशा बाक्मा बाक्त।

## 44

### योसेफ नु आ लोकबपुकी

1 मिनु योसेफमी आ खिं डा ठेयब गेय पाइब कली “मेको मुर आन धोक्रो प्रिपतो। गिश कुरने चाप्नीमी, मिश प्रिपतो। मिनु आन क्येट अन्न आ शोव्रम वोतो।

2 मिनु आं चांदी के कचौरा, आ क्येट नु मेको नेल्ल क्येडा ठिटा आ धोक्रो आ शोव्रम वोतो” दे मदा बाक्त। मिनु मेकोमी योसेफ आ देशो खोदेशो पा पवा बाक्त।

3 मिनु सुनी कना रिम्शो पा नां मसोव्रथु, मेको मुर नु आन गधा आन कली लचा गेमे बाक्त।

4 मिनु सहर रे लमानु, योसेफम आ ठेयब गेय पाइब कली “बोक्को, मेको आन नोले खोतो। मिनु मेको आन कली थिश्शा ‘मारदे गे रिम्शो पाइब कली मरिम्शो पनी?

5 मारदे आं प्रभु आ मार मार तूतीक नु लिंक्यु कोव्रतीक चांदी के कचौरा खुइ पनी? गे मरिम्शो पाइतीनी’ दे माइक्मी” दे मदा बाक्त।

6 मिनु मेको आन कली थिश्शा, मोदेशो लोव्र पवा बाक्त।

7 मिनु मेकोपुकीमी “आंइ प्रभुम मारदे मोदेशो लोव्र पाइबा? गो मो मपक।

8 नेनीन, आंइ धोक्रोमी थिश्शो क्येट कनान रागी रे लेंशा चाकतक। गो दोपा इन प्रभु आ खिं रे सुन चांदी खुइ पाइनीकी? उत्पत्ती ४३:२१

9 गो इन गेय पाइब सु नु मेको कचौरा बाकमे, मेको बेक्ल। मिनु गोपुकी यो इन वाइल दुम्कल” दे मदमे बाकत।

10 मिनु मेकोमी “इन देशो खोदेशो दुम्ल। सु आ धोक्रोम थिंसीबा, मेको आं वाइल दुम्ब। अरु मो लाइनीनी” देंमाकत।

11 मिनु नोले मेकोपुकीमी रीब रीब पा आन धोक्रो गधा रे शोल्शा, रोक्शा कौव्रडमे बाकत।

12 मिनु मेकोमी डोंइती जरमेशो आ धोक्रोमी, नोले नेल्ल आन धोक्रोमी का का पा माल्शा, कान्छा ला लीमाकत। मिनु कचौरा बेन्यामीन आ धोक्रोमी थिदा बाकत।

13 मिनु मेकोपुकीमी आन वा खाक्शा, आन अन्न लेंशा गधा तार वोइश्शा, सहर लेम्मा बाकत।

14 मिनु यहूदा नु आ लोकबपुकी योसेफ आ खिं जाक्मानु, योसेफ मेक उइ बाकमाकत। मेको आ डोंइती खुम्की पा बाम्मा बाकत।

15 योसेफम मेको आन कली “गे मार पनी? आं खोदेशो मुरुम नेल्ल तुइक्ब, दे मतुइक्तीनी?” दे मेको आन कली हुइक्ता बाकत।

16 मिनु यहूदामी “आंइ प्रभु कली मार देंनीकी? मार लोव्र पाइनीकी? गोपुकी ‘ठीक मुर बाक्नीकी’ दे दोपा देने चाप्नीकी? परमप्रभुमी इन गेय पाइब आन मरिम्शो कोंइताक्व। नेनीन, गोपुकी नु कचौरा धोक्रोम बाक्ब, गो नेल्ल आंइ प्रभु इन वाइल दुम्तक” देंमाकत। उत्पत्ती ४२:२१-२२

17 मिनु योसेफमी “ममाइ, मेको मपाइनुड। तन्न सु मुर नु आं कचौरा बाकमे, मेको ला आं वाइल दुम्चा माल्ब। गोपुकी चहिं थुं नाइश्शा, इन आफ आ बाक्तीक लने” देंमाकत।

18 मिनु यहूदा मेको आ नेक्था लशा “आं प्रभु, लोत्र का पचा गेयीनी। इन गेय पाइब आ पर्वम मगाइक्तीने। गे फाराओ खोदेशो बाक्नीनी।

19 आं प्रभुमी डोंइती आ गेय पाइब आन कली ‘इन के आफ बाक्बा? अर्को लोकब यो बाक्बा?’ दे हिल्लो पाइतीनी। उत्पत्ती ४२:७, १३; उत्पत्ती ४३:७

20 मिनु गोपुकीमी आंड प्रभु कली ‘आंड के आफ खाल्पा दुम्शो बाक्ब। मिनु खाल्पाम थिशो तौ का यो बाक्ब। मेको आ लोकब चहिं बेक्त। मेको लीशो आ ममा आ का ला तौ बाक्ब। मिनु आ आफोमी मेको कली शुश दाक्ब’ दे इन कली देंतक।

21 मिनु गेमी ‘आं कली कोंइचा कली मेको एक चाक्कीन’ देंतीनी।

22 गोपुकीमी आंड प्रभु कली ‘मेको वोंइश आलमी आ आफ कली प्रोंइने मचाप्ब। प्रोंइतु हना, आ आफ बेक्ब’ देंतक।

23 मिनु गेमी इन गेय पाइब आन कली ‘इन लोकब कान्छा मचाक्तीनी हना, गे आं कली गुम्थ मपिने’ देंतीनी। उत्पत्ती ४२:१५; उत्पत्ती ४३:३-५

24 गोपुकी आंड आफ इन गेय पाइब आ बाक्तीके जाक्दीशशा, इन लोत्र नेल्ल माइक्तक।

25 आंड आफोमी ‘लेंशा जचा थोत्रक ग्याप्थ लने’ देंत।

26 मिनु गोपुकीमी ‘आंड लोकब कान्छा मलाइक्तक हना, गो लने मचाप्नीकी। मारदे हना आंड कान्छा भाइ गोपुकी नु मलत हना, गुम्चा मदुम्ब’ देंतक।

27 मिनु इन गेय पाइब आंड आफोम आंड कली ‘आं मीशेम तौ निक्शी थिप्तु, गे तुइक्नीनी।

28 का आं बाक्तीक रे लत। जन्तुमी मेको कली ब्वाम्तेक्मे। गो मेको कली लेंशा मतड। उत्पत्ती ३७:३२-३३

29 मिनु गे एको कली यो लाइक्तीनी हना, लांम बेक्बा कां, बेक्त हना, गे आं बोइशो चां श्येतम प्रिंशा, तुरसुम वोइक्चा माल्नीनी’ दे

लोव्र पाप्तु। उत्पत्ती ४२:३८

30 मिनु गो इन गेय पाइब आंइ आफ आ बाक्तीक जाक्दीकानु, एको वोंइश आल, आ आफ आ थुं नेल्लेमी दाक्ब। मोपतीके गोपुकी नु मबाक्त हना,

31 मेको तशा, आ आफ बेक्ब। मिनु गोपुकीमी आंइ आफ, चां बोइशो इन गेय पाइब कली सुर्ता पपाइशशा, श्येत जपाइशशा तुरसुम वोइक्चा माल्नीकी।

32 गो मेको आ जमानी बाक्शो बाक्नुड। गो आफ कली 'मेको आल मचाक्ता हना, आं मरिम्शो पशो गेना हना यो आं तारी लील' देंती। उत्पत्ती ४३:९

33 मोपतीके एको वोंइश आल ममाइ, आं प्रभु, आं कली इन वाइल वोतीन। एको वोंइश आल आ लोकबपुकी नु लचा गेने।

34 गो आं आफ आ डोंइती एको वोंइश आल मलाइक्थु, दोपा लने चाप्नुडा? आं आफ आ श्येत तशा, गो यो फाल्ने मचाप्नुड" दे यहूदामी योसेफ कली देंमाक्त।

## 45

### योसेफमी तुइक्पांइसीशो

1 मिनु नोले योसेफमी आ मुर नेल्ल आन डोंइती फाल्ने मचबा बाक्त। मिनु "आं गेय पाइब नेल्ल एकेर रे लने" दे सोइक्पदा बाक्त। मिनु योसेफमी आंम कली आ लोकब आन कली तुइक्पदानु, कोठामी सुइ मबाक्शो बाक्मा बाक्त।

2 मिनु ठेयब सेंदामी डाक्मेनु, फाराओ आ खिंम बाक्ब इजीप्त डा मुर नेल्लेम नेन्मे बाक्त।

3 मिनु योसेफमी आ लोकब आन कली "गो योसेफ नड। आं आफ मुल सम्म ब्रोंइमे?" देंमाक्त। आ लोकबपुकीमी लोव्र लेन्ने मचाप्मे बाक्त। मारदे हना शुश हिंमा बाक्त।

4 मिनु योसेफमी आ लोकब आन कली “आं नेक्था पिने” देंमाक्त। मिनु मेकोपुकी आ नेक्था जाक्मा बाक्त। मिनु योसेफमी “गो इन इजीप्त रागीम लेयशो लोकब योसेफ नड।

5 गे आं कली लेयशो आ पर्बम सुर्ता मपने। आंम कली दोस मगेने। मारदे हना परमप्रभुमी आं कली नेल्ल ब्रॉइमल, दे इन डोंइती सोइशो बाक्त। उत्पत्ती ५०:२०

6 एको अन्काल मुल बर्स निक्शी दुम्त। मिनु मुल ५ बर्स सम्म तेइ वाक्शो नु रिक्शो मतांइसीब।

7 परमप्रभुमी आं कली गेपुकी ब्रॉइनील। रागीम जात का लीनील। इन पर्बम शुश ब्रॉइमल, दे इन क्येडा डोंइती एक सोइक्ताकयी। एको ठेयब श्येत रे प्रॉइतीके बाक्ब।

8 मोपतीके गेपुकीमी आं कली एक सोइशो ममाइ, परमप्रभुमी सोइशो बाक्त। मेकोमी आं कली फाराओ आ आफ खोदेशो सेल्शा, आ खिं डा होव्रप नु इजीप्त रागी नेल्ल डा हुकुम पाइब सेलती।

9 गेपुकी मुल रीब पा इं आफ आ बाक्तीके लने। मिनु मेको कली ‘परमप्रभुमी इन तौ योसेफ कली इजीप्त रागी नेल्ल डा ठेयब मुर सेला बाक्त। एक यिचा मरिम्दीन।

10 आं नेक्था बाक्चा कली गे, इन आल, इन चच, इन क्यारश भेडा, बी ब्यफ नु मारेइ मारेइ नेल्ल चाक्शा, गोशेन माइक्तीकेमी जाक्चा माल्नीनी।

11 आं नेक्था बाक्कीन। गो इन कली थुल्लुड। मारदे हना अन्काल मुल ५ बर्स सम्म दुम्ब। गे मयीतीनी हना, गे, इन खिं डा मुर नु गेपुकी नु बाक्ब नेल्ल शुश प्रुडग दुम्नीनी’ देंत, दे इं आफ कली माइक्चा माल्नीनी।

12 मिनु गेपुकी नु आं लोकब बेन्यामीनम तशो ‘गो योसेफ नड। गो इन कली लोव्र पाता’ दे तुइक्नीनी।

13 गो इजीप्त रागीमी गिश रिम्शो बाक्डा, इन तशो नेल्ल, गेपुकीमी इं आफ कली देंचा माल्नीनी। रीब पा इं आफ कली एक



चाक्कीन” दे आ लोकब आन कली माइक्मी बाक्त।

14 मिनु आ लोकब बेन्यामीन कली मुप्शा डाक्माक्त। मिनु बेन्यामीन यो डाक्माक्त।

15 मिनु नोले आ लोकब नेल्ल आन कली मुप्शा, पुक्पु पाइशशा डाक्माक्त। मिनु नोले आ लोकबपुकीमी लोव्र पचा गोव्रमे बाक्त।

16 मिनु “योसेफ आ लोकबपुकी जाक्तेक्म” देंशो लोव्र फाराओ आ खिंम यो जाक्दीम्माक्त। मिनु फाराओ नु आ गेय पाइब नेल्ल ग्येरसमा बाक्त।

17 मिनु फाराओमी योसेफ कली “गेमी इन लोकब आन कली ‘इन गधापुकीमी अन्न कुरपाइशशा, कनान रागी लने।

18 मिनु इन आफ नु इन खिं डा मुर नेल्ल आं नेक्था जाक्कीन। गो इजीप्त रागी डा नेल्ल क्येडा रिम्शो रू इन कली गेनुड। मिनु गे रागी डा नेल्ल क्येडा ब्रोव्रशो जचा ताइनीनी’ दे माइक्चा मालनीनी।

19 इन कली अरेशो एकोन बाक्ब। इन आइक्च आल नु इन मीश आन कली डोइक्चा कली इजीप्त रागी रे बग्गीपुकी लतीन। इन आफ चाक्कीन।

20 ‘इन मारेइ मारेइ ममिम्तीन। मारदे हना इजीप्त डा रिम्शो नेल्ल इन के बाक्ब’ दे माइक्मी” दे योसेफ कली मदा बाक्त।

21 मिनु इस्राएल आ तौपुकीमी योसेफ आ देंशो पामे बाक्त। मिनु फाराओम मार देंमे मेको पा, योसेफमी मेको आन कली बग्गी नु लां कली लाम्जी गेवा बाक्त।

22 मेको आन कली जोड का का फेक्तीक नक वा गेवा बाक्त। बेन्यामीन कली चहिं सहे सां चांदी के शेकेल नु ५ जोड फेक्तीक वा गेवा बाक्त।

23 मिनु आ आफ कली १० ओटा गधैनीमी इजीप्त रागी डा नेल्ल क्येडा ब्रोव्रशो जचा थोव्रक नु लांम जचा कली १० ओटा गधाम अन्न, शोब्ले नु श्ये कुर पा सोइक्ता बाक्त।

24 मिनु लचा डोंइती मेको आन कली “लांमी मजिने” दे अरेवा बाक्त। उत्पत्ती ४२:२२

25 मिनु मेकोपुकी इजीप्त रागी रे पा कनान रागी आन आफ याकूब आ बाक्तीके जाक्दीम्मा बाक्त।

26 मिनु आन आफ कली “योसेफ मुल यो ब्रोंडशो बाक्त। इजीप्त रागीम हुकुम पाइब मेको बाक्माक्त” दे लोव्र पामे बाक्त। याकूबम चहिं आन देंशो थमा मसुदा बाक्त।

27 मिनु मेकोपुकीमी योसेफ आ लोव्र नेल्ल शोव्रडमे बाक्त। मिनु याकूबम आ कली डोइक्चा, दे योसेफमी सोइशो बग्गी तशा, आ थुं लेत्ता बाक्त।

28 मिनु इस्राएलमी “आं तौ योसेफ ब्रोंडशो थमा बाक्ब। आं बेक्चा क्येडा डोंइती मेको आ कुल कोव्रनुड” देंमाक्त। उत्पत्ती ४६:३०

## 46

याकूब इजीप्त लशो

1 मिनु इस्राएल नु आ खिं डा मुर नेल्ल इजीप्त गे लमा बाक्त। मिनु बेयर-शेबा जाक्दीशशा, आ आफ इसहाक आ परमप्रभु कली चढ़ेवा बाक्त। उत्पत्ती २६:२३-२५

2 मिनु मेको नाक्दो परमप्रभुमी इस्राएल कली “याकूब, याकूब” देंमाक्त। मिनु इस्राएलमी “गो नेंता” दे लोव्र लेत्ता बाक्त।

3 मिनु परमप्रभुमी “गो परमप्रभु, इ आफ आ परमप्रभु नड। इजीप्त लचा महिनो। मारदे हना गे उइ बाक्डेनु, इ रे पा ठेयब जात सेल्लुड। उत्पत्ती ४७:२७; प्रस्थान १:७

4 गो गे नु इजीप्त रागी लाइनुड। मिनु इ कली थमा पा लेप्पाइक्नुड। बेक्शा नोले योसेफमी इ मिक्च ख्रेप्ब” दे परमप्रभुमी देंमाक्त।

5 मिनु याकूब बेयर-शेबा रे लमाक्त। मिनु इस्राएल आ तौपुकीमी आन आफ, आन आइक्च आल नु आन मीश फाराओमी सोइशो बग्गीम डोइक्पदमे बाक्त।

6 मिनु आन बस्तु भाव, कनान रागीम आन चाक्शो मारेइ मारेइ नु याकूब नु आ मुर नेल्ल इजीप्त रागी जाक्दीम्मा बाक्त।

7 याकूबमी आ तौपुकी नु मेको आन तौपुकी, आ तमीपुकी नु आ तौ आन तमीपुकी नु चच युइ नेल्ल इजीप्त रागी चाक्दीम्मी बाक्त।

### याकूब आ तौ नु चच युइ

8 मिनु इजीप्त रागीम जाक्दीशशो इस्राएल आ आल आन नें एको बाक्नीमी। आ डोंइती जरमेशो तौ रूबेन बाक्माक्त। प्रस्थान ६:१४-१६

9 रूबेन आ तौपुकी हनोक, फल्लु, हेस्रोन नु कारमी बाक्मा बाक्त।

10 सिमियोन आ तौपुकी येमुएल, यामीन, ओहद, याकीन नु सोहार, कनान डा मीश रे जरमेशो शावल, नेल्ल सिमियोन आ तौ बाक्मा बाक्त।

11 लेवी आ तौपुकी गेरशोन, कोहाथ नु मेरारी बाक्मा बाक्त।

12 यहूदा आ तौपुकी एर, ओनान, शेलाह, पेरेस नु जेराह बाक्मा बाक्त। एर नु ओनान चहिं कनान रागीम बेक्सा बाक्त। पेरेस आ तौ हेस्रोन नु हामुल बाक्सा बाक्त। उत्पत्ती ३८:३,४,२९,३०

13 इस्साकार आ तौपुकी तोला, पुवा याशुब नु शिम्रोन बाक्मा बाक्त।

14 जबूलून आ तौपुकी सेरेद, एलोन नु याहलेल बाक्मा बाक्त।

15 मेको नेल्ल लेआमी याकूब के पदान-अराममी थिशो तौ बाक्मा बाक्त। आ तमी दीना यो बाक्माक्त। याकूब नु आ तमी तौ नेल्ल पा ३३ जना बाक्मा बाक्त।

16 मिनु गाद आ तौपुकी सिफ्योन, हाग्गी, शुनी, एस्बोन, एरी, अरोदी नु अरेली बाक्मा बाक्त।

17 आशेर आ तौपुकी इम्नाह, इश्वाह, इश्वी, बेरीआ नु आ तमी सेराह बाक्मा बाक्त। मिनु बेरीआ आ तौ निक्शी हेबेर नु माल्कीएल बाक्सा बाक्त।

18 मिनु लाबान आ तमी लेआ कली गेशो गेय पाइब जिल्पाम याकूब के थिशो तौपुकी बाक्मा बाक्त। मेको १६ जना बाक्मा बाक्त। उत्पत्ती २९:२४

19 मिनु याकूब आ मीश राहेल आ तौ योसेफ नु बेन्यामीन बाक्सा बाक्त।

20 योसेफमी इजीप्त रागीमी मनस्से नु एफ्राइम थिमाक्त। आ मीश ओन सहर डा नाक्सो पोतीफेरा आ तमी आसेनाथ बाक्माक्त।

21 बेन्यामीन आ तौपुकी बेला, बेकेर, अशबेल, गेरा, नामान, एही, रोश, मुप्पीम, हुप्पीम नु आरद बाक्मा बाक्त।

22 मेको नेल्ल राहेल आ थिशो तौ बाक्मा बाक्त। मेको नेल्ल पा १४ जना बाक्मा बाक्त।

23 दान आ तौ हुशीम बाक्माक्त।

24 नाप्ताली आ तौपुकी याहसेल, गुनी, येसेर नु शिल्लेम बाक्मा बाक्त।

25 मेको लाबानमी आ तमी राहेल कली गेशो गेय पाइब बिल्हाहम याकूब के थिशो तौ बाक्मा बाक्त। मेको नेल्ल ७ जना बाक्मा बाक्त। उत्पत्ती २९:२९

26 मिनु याकूब आ चाइमीपुकी महिकथु, याकूब नु इजीप्त रागी जाक्शो मुर नेल्ल पा ६६ जना बाक्मा बाक्त।

27 इजीप्त रागीमी योसेफमी तौ निक्शी थिमाक्त। मोपा इजीप्त रागीमी जाक्शो याकूब आ खिं डा मुर ७० जना बाक्मा बाक्त। याकूब नु योसेफ नु आ तौ निक्शी यो हिकशो बाक्मा बाक्त।

### याकूब नु योसेफ गुम्शो

28 मिनु याकूबमी यहूदा कली गोशेन लां शेंसीचा नु योसेफ गुम्चा, दे आन डोंइती गुम्थ सोइक्ता बाक्त। मिनु मेकोपुकी गोशेन माइक्तीके जाक्दीम्मानु, उत्पत्ती ४५:१०

29 योसेफ आंम बग्गी ठीक पा आ आफ इस्राएल कली गोशेनम गुम्थ जाक्माक्त। मिनु मेको कली गुम्शा, मुप्शा शुश डाक्सा बाक्त।

30 मिनु इस्राएलमी योसेफ कली “मुल गो बेक्ने चाप्नुड। मारदे हना गे ब्रोंइशो बाक्ते, गो इ कुल कोव्रचा ताता” दे आ तौ कली देंमाक्त। उत्पत्ती ४५:२८

31 मिनु योसेफम आ लोकब नु आ आफ आ खिं डा मुर आन कली “गो फाराओ आ बाक्तीके लाइनुड। मिनु मेको कली ‘कनान रागीम बाक्शो आं आफ, आं लोकबपुकी नु आं आफ आ खिं डा मुर नेल्ल जाक्तेकम।

32 मेकोपुकी भेडा गोठला नु बस्तु भाव थुल्ब बाक्नीम। मेको आन क्यारश भेडा, बी ब्यफ नु आन मारेइ मारेइ चाक्शो बाक्तेकमे’ देंनुड।

33 मिनु फाराओम इन कली ब्रेत्ताक्व हना, मिनु इन कली इन गेय आ पर्बम हिल्लो पाप्नु हना,

34 गेपुकीमी ‘इन गेय पाइब आन आल रेन मुल सम्म बस्तु भाव थुल्ब बाक्नीम। आंइ किकी पिपी यो मोदेशो गेय पशो बाक्मा बाक्त’ देंचा माल्नीनी। नोले मेकोमी इन कली गोशेनमी बाक्तीके गोब। मारदे हना इजीप्त डा मुर गोठला आन कली तशा ग्रांग्रा दीनीम” दे योसेफमी आ लोकब आन कली देंमाक्त। उत्पत्ती ४३:३२

## 47

### याकूब फाराओ आ डोंइती

1 मिनु नोले योसेफमी फाराओ कली “आं आफ, आं लोकबपुकी, आन क्यारश भेडा, बी ब्यफ, आन मारेइ मारेइ नेल्ल कनान रागी रे चाक्शा, गोशेनमी जाक्शो बाक्नीमी” दे शेंदा बाक्त।

2 मिनु आ लोकब आन दाते रे ५ जना योव्रशा, फाराओ आ डोंइती राप्पदा बाक्त।

3 मिनु फाराओमी मेको आन कली “इन गेय मार बाक्बा?” दे हिल्लो पवा बाक्त। मिनु मेकोपुकीमी “गो, इन गेय पाइबपुकी,

भेडा गोठला बाक्नीकी। गो आंइ किकी पिपी रे गोठला बाक्तक”  
दे फाराओ कली देंमा बाक्त। उत्पत्ती ४६:३३-३४

4 मिनु लेंशा “कनान रागीमी ठेयब अन्काल दुम्तीके, गो अर्को  
रागी डा मुर दुम्शा, एक बाक्थ जाक्तक। मारदे हना आंइ  
क्यारश भेडा आन कली जोतीके मबा। मोपतीके आंइ कली गोशेन  
माइक्तीकेमी बाक्चा गेने, दे पुंइनीकी” दे पुंइदमे बाक्त।

5 मिनु फाराओम योसेफ कली “इ आफ नु इ लोक्बपुकी इ  
बाक्तीक रागी जाक्तेक्मे।

6 इजीप्त रागी इ रागी खोदेशो मिम्तो। नेल्ल क्येडा रिम्शो  
जोतीके गोशेनमी मेको आन कली बाक्पतो। मिनु मेको इ मुर आन  
दातेमी रिम्शो गेय पाइब बाक्तेक्म हना, आं बस्तु भाव आन कली  
यो कोव्रपतो” दे मदा बाक्त।

7 मिनु नोले योसेफमी आ आफ कली फाराओ आ डोंइती राप्पदा  
बाक्त। मिनु याकूबमी फाराओ कली आसीक गेवा बाक्त।

8 मिनु फाराओमी “गिश बर्स दुम्नी?” दे हिल्लो पवा बाक्त।

9 मिनु याकूबमी “गो मुल सम्म रागीम बाक्शो, सहे का ३० बर्स  
दुम्ती। आं किकी पिपी खोदेशो पा शुश बर्स मदुम्ड। गो मरिम्शो  
नाक्त यो ताता” देंमाक्त। हिब्रू ११:१३

10 मिनु आसीक गेशा, फाराओ रे लमाक्त।

11 मिनु योसेफमी फाराओ आ देशो खोदेशो पा आ आफ नु आ  
लोक्ब आन कली इजीप्त रागीमी रू गेवा बाक्त। रागी डा नेल्ल  
क्येडा रिम्शो बाक्तीके रामेसेस आ रागी गोशेनमी बाक्पाइक्मी  
बाक्त।

12 मिनु योसेफम आ आफ, आ लोक्ब नु आ आफ आ खिं डा  
मुर नेल्ल आन कली आन खिं खिं कली गाप्चा डा पा जचा थोव्रक  
गेशा थुल्मी बाक्त। उत्पत्ती ४५:११

इजीप्त डा मुरपुकी प्रुडग दुम्शो

13 रागी नेल्लेमी जचा थोव्रक मथिदमे बाक्त। मारदे हना मेको अन्काल बारना बारन लमाक्त। मिनु इजीप्त नु कनान रागी डा मुर शुश श्येत जामे बाक्त।

14 मिनु योसेफमी इजीप्त नु कनान रागी डा अन्न ग्याप्थ जाकब आन गुड रे क्येट ताक्शा, फाराओ आ खिंमी वोदा बाक्त।

15 मिनु इजीप्त नु कनान डा मुर आन क्येट नुप्शा, योसेफ आ बाक्तीकेमी जाक्शा, मेकोपुकीमी “जचा थोव्रक गेकी। आंइ के क्येट नुप्त। गे जचा थोव्रक मगेतीनी हना, गो इन डोंइती बेक्चा माल्नीकी” दे मदमे बाक्त।

16 मिनु योसेफमी “इन के क्येट मबाक्त हना, इन बस्तु भाव चाक्कीन। मेको रे पा जचा थोव्रक ताइनीनी” देंमाक्त।

17 मिनु आन बस्तु भाव योसेफ आ बाक्तीके चाक्मे बाक्त। मिनु योसेफमी शारापुकी, क्यारश भेडा, बी ब्यफ, गधा ताक्शा, जचा थोव्रक गेमी बाक्त। मेको बर्समी मेको आन कली आन बस्तु भाव आन पा डा अन्न गेवा बाक्त।

18 मिनु मेको बर्स नुप्शा डा मिन, अर्को बर्स लेंशा जाक्शा योसेफ कली मेकोपुकीमी “गो आंइ प्रभु आ डोंइती आंइ क्येट नुप्त, आंइ क्यारश भेडा, बी ब्यफ नेल्ल आंइ प्रभु केन दुम्तेक्म। मुल आंइ के रूपुकी नु आंम रां ला लीब।

19 मारदे गो इन डोंइती बेक्नीकी? आंइ कली नु आंइ रू कली यो अन्न गेशा ग्यापीन। गोपुकी फाराओ आ वाइलीम वाइल दुम्नीकी। गोपुकी ब्रोंइचा नु आंइ रागीम मुरपुकी लीचा कली वांचेर गेने” देंमा बाक्त।

20 मिनु योसेफमी इजीप्त रागी नेल्ल फाराओ कली ग्यबा बाक्त। मारदे हना ठेयब अन्काल आ पर्बम इजीप्त डा मुरपुकीमी आन रू नेल्ल लेयडमे बाक्त। मिनु रू नेल्ल फाराओ के दुम्माक्त।

21 मुर नेल्ल आन कली वाइलीम वाइल सेल्शा, आन बाक्तीक रे याक्शा वोदा बाक्त।

22 नाक्सो आ रू चहिं मग्यबा बाक्त। मारदे हना आन जचा

फाराओ आ गुइ रे तामे बाक्त। मोपतीके आन रू यो लेयचा ममाल्मा बाक्त। गन्ती १८:२०; यहोसु १३:१४; इजीकीएल ४४:२८; इजीकीएल ४५:१-५

23 मिनु योसेफम मुर आन कली “नेनीन, मुलाक्ती रे गेपुकी नु इन रू नेल्ल फाराओ के दुम्त। गो ग्याप्ता। एको वांचेर लाइशशा, शोक्कीन।

24 मिनु रिक्ची ना ५ भाग डा भाग १ फाराओ कली गेचा माल्नीनी। अर्को ४ भाग वांचेर कली नु इन कली, इन खिं डा मुर नु आइक्च आल नेल्ल आन कली थुल्चा कली लीब” दे माइक्मी बाक्त। एफाह का २२ लिटर खोदेशो बाक्ब।

25 मिनु मेकोपुकीमी “गे आंइ कली बेक्चा रे प्रोंइतीनी। गे आंइ कली थम रिम्शो पाइतीनी। गो फाराओ आ वाइल बाक्नीकी” देंमा बाक्त।

26 मिनु योसेफमी इजीप्त रागी डा ऐन कानुनमी “फाराओ कली ५ भाग डा भाग का गेचा माल्नीम। नाक्सोपुकीमी चहिं गेचा ममाल्नीम। मारदे हना आन रू फाराओ के मदुम” दे ब्रेक्पदा बाक्त। मेको मुल सम्म मोदेशो बाक्ब।

27 मिनु इस्राएल इजीप्त रागी डा गोशेनमी बाक्मेनु, आन मारेइ मारेइ नु मुरपुकी सोशा बोशा, शुश दुम्मा बाक्त। उत्पत्ती ४६:३; प्रस्थान १:७, १२

28 याकूब इजीप्त रागीमी १७ बर्स ब्रोंइमाक्त। मेको आ ब्रोंइतीक नेल्ल पा सहे का ४७ बर्स बाक्माक्त।

29 मिनु आ बेक्ची जाक्माक्त। मिनु आ तौ योसेफ कली ब्रेशशा “गे आं कली शिशी पाप्तीवी हना, इ गुइ आं फिला तार वोइशशा, जोल मपथु, आं कली रिम्शो पावो। आं कली इजीप्त रागीम मथिम्यी, दे पुंइनुड। उत्पत्ती ५०:५

30 गो बेक्शा, आं कली इजीप्त रगी रे कुरशा, आं कली आं किकी पिपी आन तुरसुम थिम्यी” दे पुंइदा बाक्त। मिनु योसेफमी “इन देशो पाइनुड” देंमाक्त। उत्पत्ती २३:२०



31 मिनु मेकोमी “कसम जावो” दे मदा बाक्त। मिनु योसेफमी कसम जवा बाक्त। मिनु इस्राएल ब्राख्येम बाक्शा, खुम्की पांइसे बाक्त। हिल्लो ११:२१

## 48

याकूब, एफ्राइम नु मनस्से

1 मिनु नोले मुर कामी योसेफ कली “इन आफ रोइ पाप्तु” दे शेंदा बाक्त। मिनु योसेफमी मनस्से नु एफ्राइम आ तौ निक्शी लाइशशा, गुमथ लमाक्त।

2 मिनु मुर कामी याकूब कली “नेनीन, इन तौ योसेफ इन कली गुमथ जाक्त” दे नेंपदा बाक्त। मिनु इस्राएल बोल पा बोक्शा, आ ब्राख्येम निस्से बाक्त।

3 मिनु याकूबमी योसेफ कली “नेल्ल सक्ति पाइशशो परमप्रभुमी कनान रागी डा लूज सहरम गूशा, आं कली आसीक गेती। उत्पत्ती २८:१७-१९

4 मेकोमी आं कली ‘नेनीन, गो इन कली सोशा बोशा, शुश सेल्लुड। गो इ रे शुश थर डा मुर सेल्लुड। इ कली नु इ चच युइ आन कली मेको रागी गेना हना यो इन केन बाक्ब, दे गेनुड’ देंत। उत्पत्ती ३५:११-१२

5 आं जाक्चा डोंइती, इजीप्त रागीम जरमेशो एफ्राइम नु मनस्से, इ तौ निक्शी आं मुर दुम्चा माल्नीस। रूबेन नु सिमियोन खोदेशो पा आं केन दुम्चा माल्नीस। उत्पत्ती ४१:५०-५२

6 इ नोले थिशो आल चहिं इ के दुम्मल। मिनु आन लोकब आन जात डा नें वोइशशो, इजीप्त रागीम अडस ताइब दुम्मल।

7 गो पदान रे गाकडानु, कनान रागी डा एफ्राथ आ डोंइती राहेल बेक्त। मिनु गो मेको कली एफ्राथ माइशशो बेथलेहेम सहर लतीक लांमी थिम्ता” देंमाक्त। उत्पत्ती ३५:१९

8 मिनु इस्राएलमी योसेफ आ तौ निक्शी आस कली तशा “मेको निक्शी सु नसी?” दे हिल्लो पवा बाक्त।

9 मिनु योसेफमी आ आफ कली “परमप्रभुमी आं कली गेशो तौ बाकनीसी” देंमाक्त। मिनु याकूबमी “मेको आस कली एक चाक्सी। मिनु गो मेको आस कली आसीक गेनुड” दे मदा बाक्त।

10 इस्राएल खाल्पा दुम्शा, आ मिक्च रिम्शो मताइब दुम्शो बाक्माक्त। मोपतीके मेको आस कली मतुइक्ता बाक्त। मिनु योसेफमी मेको आस नेक्था चाक्दीस्सी बाक्त। मिनु इस्राएलमी मेको आस कली पुक्पु पाइशशा, मुबा बाक्त।

11 मिनु योसेफ कली “गो इ कुल ताइनुड दे ममिम्शो नड। तन्न परमप्रभुमी आं कली इ आल आन कली यो कोंइताकयी” देंमाक्त। उत्पत्ती ३७:३३-३५; उत्पत्ती ४५:२६; भजन संग्रह १२८:६

12 मिनु योसेफम मेको आस कली आ आफ आ थुकु रे याक्शा, खुम्की पा सेउ पवा बाक्त।

13 मिनु योसेफमी आ तौ निम्फा आस कली लाइशशा, एफ्राइम आ ग्युरा गुइ नु मनस्से आ पेरा गुइ ग्याइशशा लाइशशा आ आफ आ डोंइती वोदा बाक्त। मोपा मनस्से याकूब आ ग्युरा गुइ नु एफ्राइम याकूब आ पेरा गुइ आ नेक्था वोदा बाक्त। उत्पत्ती ४१:५१-५२

14 तन्न इस्राएलमी आ गुइ खाक्शा आ ग्युरा गुइ एफ्राइम आ पिया तारी नु आ पेरा गुइ मनस्से आ पिया तारी वोदा बाक्त। मनस्से चहिं योसेफ आ डोंइती जरमेशो तौ बाक्माक्त।

15 मिनु याकूबमी योसेफ कली आसीक गेशा “आं किकी पिपी अब्राहाम नु इसहाक परमप्रभु आ डोंइती गाक्शो बाक्ताक्से। मेको परमप्रभुमी आं कली आं ब्रोंइतीक नाक्त नेल्ल मुल सम्म कोव्रती। उत्पत्ती ३२:१०; भजन संग्रह २३:१

16 आं कली श्येत रे प्रोंइब परमप्रभु यावे आ स्वर्ग डा गेय पाइबम एको वोंइश आल आस कली आसीक गोवल। मिनु एको आस पतीके आं नें नु आं किकी पिपी अब्राहाम नु इसहाक आस नें मप्रेंसेक्ल। एको निक्शी रे पा रागीमी शुश दुम्मल” दे आसीक गोम्सी बाक्त। उत्पत्ती ३२:२५-३०; यसैया ४१:१४

17 मिनु योसेफमी आ आफ आ ग्युरा गुइ एफ्राइम आ पिया तारी वोइश्शो तशा, आ थुं मनुमाक्त। मिनु आ आफ आ गुइ एफ्राइम आ पिया रे शोलशा, मनस्से आ पियाम वोइक्नुड, दे मिम्ता बाक्त।

18 मिनु योसेफम आ आफ कली “ममाइ आं आफ, मेको आं डोंइती जरमेशो बाक्ब। इन ग्युरा गुइ एको आ पिया तारी वोतीन” देंमाक्त।

19 तन्न आ आफ मबित्थु “गो तुइक्नुड, आं तौ, गो तुइक्नुड। एको यो थर का दुम्ब, एको यो ठेयब दुम्ब। तन्न एको क्येडा आ लोकब एफ्राइम ठेयब दुम्ब। मिनु आ चच युइ शुश ठेयब जात दुम्नीम” दे आसीक गेम्सी बाक्त। गन्ती १:३३,३५; ब्यवस्था ३३:१७

20 मिनु मेको नाक्ती मेको आस कली आसीक गेशा “इस नें थिशा इस्राएलीमी आसीक गेनीम। मेकोपुकीमी ‘परमप्रभुमी इ कली एफ्राइम नु मनस्से खोदेंशो सेलल’ दे आसीक गेनीम” देंमाक्त। मोपा याकूबमी मनस्से क्येडा एफ्राइम डोंइती वोदा बाक्त। हिब्रू ११:२१

21 मिनु इस्राएलमी योसेफ कली “नेनो, गो बेक्नुड। मिनु परमप्रभु गे नु बाक्शा, इ कली लेंशा इ किकी पिपी आ रागी लाइक्ब।

22 गो इ कली इ लोकब आन क्येडा निक्शी अडस गेतन। आं तरवार नु लिब्रामी एमोरी आन गुइ रे रोइश्शो रू इ कली गेतन” दे याकूबमी योसेफ कली मदा बाक्त। यूहन्ना ४:५

## 49

याकूब आ तौ आन आसीक

ब्यवस्था ३३:-

1 मिनु याकूबमी आ तौ आन कली ब्रेशशा मेको आन कली “नोले इन कली मार मार दुम्बा, नेंचा कली एकेर बुक्कीन।

2 याकूब आ तौपुकी बुक्शा, इन आफ इस्राएल, आं लोव्र नेनीन।

रूबेन

3 रूबेन, गे आं डोंइती जरमेशो तौ नवे। डोंइती डा आं बोल नु सक्ति बाक्नेवे। नेल्ल क्येडा शिरशो नु सक्ति पाइशशो डोंइती डा बाक्ते। उत्पत्ती २९:३२; ब्यवस्था २१:१७

4 समुन्द्र डा छाल खोदेशो पा गे हिम्सीशो थुं पाइशशो मुर दुम्नेवे। मारदे हना गे इ आफ आ खाट डोइशशा, बिथोलो पाप्तीवी। आं इप्तीकेम बाक्ते। गे मान मताइब दुम्नेवे। उत्पत्ती ३५:२२

### सिमियोन नु लेवी

5 सिमियोन नु लेवी वोबु बाक्नीसी। गे हुश खाक्श पोक्ब बाक्नीसी। उत्पत्ती ३४:२५

6 आं थुं इस खुइशशा अरेशोम गेनायो मबिस्सेक्ल, आं नें इस गुम्तीकेमी गेनायो मदेमल। थुं का मदुमीसे। मारदे हना इस चुरतीकेमी मुर साइक्तीसी। महिब दुम्शा, ब्यफ कली गाक्ने मचाप्ब सेल्तीसी।

7 इस गाइशशोम सराप राइब। मारदे हना मेको ठेयब बाक्ब। इस चुरचाम सराप राइब। मारदे हना मेको शिशी मपाइशशो मरिम्शो बाक्ब। थुं का मदुमीस। इस्राएल रागीमी ब्राशा बाक्कीस। यहोसु १९:१-९; २१:१-४२

### यहूदा

8 यहूदा, इ लोकबपुकीमी इ कली ठेयब सेल्मेक्ल। इ गुइमी इ जोरी सत्रु आन क्रोक्को निप्नेवे। इ आफ आ आल इ डोंइती खुम्की पा बाप्नीम। गन्ती १०:१४; न्यायाधीस १:१-२

9 यहूदा गुप्स आ चाइक्ब खोदेशो बाक्ब। सिखार ब्वशा ठेयब दुम्ते। ठेयब गुप्स खोदेशो पा खुम बाप्ब। गुप्सनी खोदेशो पा इप्ब। सुम मेको कली बोक्पाइक्ने चाप्बा? गन्ती २३:२४; इजीकीएल १९:२; प्रकाश ५:५

10 ठेयब श्येत रे प्रोंइब मजाक्म सम्म आ राज दन्ड आ सासन पतीके आ गुइमी लीब। जात जात डा मुर मेको आ नोले खोइक्नीम। गन्ती २४:१७; १इतिहास ५:२; हिब्रू ७:१४; इजीकीएल २१:३२

11 मेकोमी आ गधा अडगुर आ बोटम पाइक्ब, आ गधा आ चाइक्ब नेल्ल क्येडा रिम्शो अडगुर बोटम पाइक्ब। आ फेक्तीक वा अडगुर शांबुम मुरब। आ वा अडगुर आ रसम खुम्ब। योएल ४:१८

12 आ मिक्च अडगुर क्येडा रिम्शो रड डा बाक्ब। आ खुइ दूध क्येडा बुश बाक्नीम।

### जबूलून

13 जबूलून समुन्द्र नु डोंगा वोइक्तीकेमी बाक्ल। सीदोन सहर सम्म आ बाक्तीके दुम्ल। यहोसु १९:१०-१६

### इस्साकार

14 इस्साकार बोल्यो गधा दुम्शा, भारी आस दातेमी इप्ब।

15 मेकोमी नाइक्तीके रिम्शो नु रागी दारशो बाक्ब, दे ताप्तु। मेकेर कुरब दुम्शा, अर्को आन गेय पाइब दुम्त।

### दान

16 दान इस्राएल आ जात डा ठेयब मुर दुम्शा, अरु आन कली निसाफ पाइब दुम्ल। न्यायाधीस १३:२, २४, २५

17 दान लांमी बाक्शो बुस्स खोदेशो दुम्शा, मेको बीस पाइशो बुस्स खोदेशो दुम्शा, आइक्च लांम बाक्ब। शारा डोइक्ब मुर तोक्चा कली शारा आ गंग्रेम कोक्ब। मिनु शारा डोइक्ब मुर नोले गे दोक्ब।

18 परमप्रभु यावे, गे आं मरिम्शो पशो रे प्रोंइनीनी, दे रिम्शा बाक्ती। भजन संग्रह ११९:१६६; हबकुक् २:३

### गाद

19 रोइक्ब मुरपुकी गाद कली रोइक्चा कली जाक्नीम। गादमी मेको आन कली खेदा पा मेको आन के रोइक्ब।

### आशेर

20 आशेर आ जचा थोत्रक शुश ब्रोत्रशो बाक्ब। पिपम खोदेशो पा ब्रोत्रशो जचा गेब। यहोसु १९:२४-३१

### नाप्ताली

21 नाप्ताली प्रोइशो रोकेश बाक्ब। मेकोमी दारदारशो चाइक्ब पाइब। न्यायाधीस ४:६-१०

### योसेफ

22 योसेफ फल सिप्ब रवा का बाक्ब। आ राशी गारो तारी बाक्शा, ब्वाक्कु बुक्तीकेमी खुम्शो रवा का बाक्ब।

23 ब्रा आप्बपुकीमी मेको कली ब्रा आप्तेक्म। मेको कली आप्शा, खेदा पशा, काइ मदाक्तेम।

24 तन्न आ लिब्रा बोल्यो बाक्ब, आ गुइ बोल्यो बाक्नीम। सक्ति पाइशशो याकूब आ परमप्रभु, इस्राएल आ गोठला नु सेरथे फुल्लुम, मेको कली वारच पाप्तु। ब्यवस्था ३२:१८

25 इ आफ आ परमप्रभुमी इ कली वारच पाइब। नेल्ल क्येडा सक्ति पाइशशो परमप्रभुमी इ कली सरीड रे नु खप रे आसीक गेब। शुश आल थिचा डा आसीक यो गेवल। ब्यवस्था २८:३-६; ब्यवस्था ३३:१३

26 गेना हना यो बाक्ब डांडा डा आसीक क्येडा इ आफ आ गेशो आसीक ठेयब बाक्ब। योसेफ आ लोकब खोदेशो मदुम्थु, एको आसीक आ पिया तारी दुम्ल।

### बेन्यामीन

27 बेन्यामीन ब्रुप्शा ग्याइक्ब फर खोदेशो बाक्ब। मिनु सुनी आ सिखार ब्वाइब, नाक्दो आ रोइशशो योक्ब” दे याकूबम आ तौ नेल्ल आन कली आसीक गेमी बाक्त। न्यायाधीस २०:२५; १सामुएल ९:१-२

### इस्राएल बेक्शो

28 एको इस्राएल आ १२ थर बाक्नीम। आन आफोम मेको आन कली आसीक गेशा पशो लोत्र एकोन बाक्ब। मेकोमी मेको आन कली का का पा आसीक गेवा बाक्त।

29 मिनु मेको आन कली “गो आं किकी पिपी आन बाक्तीके लाइनुड। हित्ती डा एफ्रोन आ रूमी बाक्शो पुक्खी, आं किकी पिपी आन कली थिम्तीकेमी आं कली वोतीन। उत्पत्ती २३:१३-२०

30 मेको पुक्खी कनान रागीमी माम्ने आ पूर्व डा माक-पेलामी बाक्ब। अब्राहाममी मेको थिम्तीक हित्ती डा एफ्रोन रे ग्यबा बाक्त।

31 अब्राहाम नु आ मीश सारा मेक थिम्शो बाक्नीस। इसहाक नु आ मीश रेबेका यो मेक थिम्शो बाक्नीस। मेकेर लेआ यो थिम्ता। उत्पत्ती २५:९; उत्पत्ती ३५:२९

32 मिनु मेको रू नु पुक्खी हित्ती मुर रे ग्याप्शो बाक्त” देंमाक्त।

33 याकूबमी आ तौ आन कली मोदें लोव्र पशा नोले, खाटमी आ खोइल दिंशा, बेक्माक्त। मिनु आ किकी पिपी आन बाक्तीक लमाक्त।

## 50

### याकूब कली थिम्शो

1 मिनु योसेफ आ आफ आ कुल तार गुर ब्वेशा, पुक्पु पाइशशा, डाक्माक्त।

2 मिनु आ गेय पाइब नु डाक्टर आन कली “आं आफ आ रां कली खेक्तीन” दे माइक्मी बाक्त। मिनु मेकोपुकीमी बेक्शो मुर आ रां खेक्तमे बाक्त।

3 मिनु ४० नाक्त खेक्तमे बाक्त। मारदे हना खेक्चा कली ४० नाक्ती माल्बाक्माक्त। इजीप्त डा मुरपुकी यो ७० नाक्ती रोंका पामे बाक्त।

4 मिनु रोंका पतीक नाक्ती नुम्मेनु, योसेफमी फाराओ आ खिं डा मुर आन कली “गो इन डोंइती शिशी ताइनुड हना, गे फाराओ कली आं पर्बम लोव्र पने।

5 आं आफोम आं कली ‘गो बेक्डानु, कनान रागीम आं कली थिम्तीके ठीक पाता, मेकेर थिम्चा माल्नेवे’ दे कसम जपाइक्ती। मोपतीके आं आफ थिम्चा कली मेकेर लचा गेयीनी। मिनु गो थिम्शा

लेत्नुड। एको लोव्र फाराओ कली देनीन” दे मेको आन कली मदा बाक्त। उत्पत्ती ४७:२९-३०

6 मिनु फाराओमी “इ कसम जशो खोदेशो पा इ आफ कली थिमो” दे योसेफ कली देंमाक्त।

7 मिनु योसेफ, फाराओ आ गेय पाइबपुकी, मेको आन ठेयब मुरपुकी, इजीप्त रागी डा ठेयब मुरपुकी,

8 योसेफ आ खिं डा मुर नेल्ल, आ लोकबपुकी नु आ आफ आ खिं डा मुर नेल्ल आ आफ थिम्थ लमा बाक्त। आन आइक्च आलपुकी नु आन क्यारश भेडा, बी ब्यफ ला गोशेनमी बाक्मा बाक्त।

9 मिनु योसेफ नु बग्गी नु शारा डोइक्बपुकी लमा बाक्त। मिनु शुश मुर दुम्मा बाक्त।

10 मिनु मेकोपुकी आताद आ चेरब तुप्तीके यर्दन खोला आइक्ची हांबु जाक्दीशशा, ठेयब रोंका पामे बाक्त। मिनु योसेफमी आ आफ कली ७ नाक्त सम्म रोंका पवा बाक्त।

11 मिनु मेकेर बाक्ब कनान रागी डा मुरपुकीम आताद आ चेरब तुप्तीक खलाम मेको रोंका पाइब आन कली तशा “एको इजीप्त डा मुर आन ठेयब रोंका का बाक्ब” देंमा बाक्त। मोपतीके मेको यर्दन आइक्ची हांब डा बाक्तीके कली आबेल-मिस्रैम नें वोदमे बाक्त। आबेल-मिस्रैम आ अर्थ “ठेयब रोंका पतीके” बाक्ब।

12 मोपा याकूब आ तौपुकीमी आन आफ आ अरेशो खोदेशो पामे बाक्त। उत्पत्ती ४९:२९

13 मिनु आ तौपुकीम आन आफ आ रां कनान रागी चाक्दीशशा, अब्राहाममी मुर थिम्चा कली हिती डा एफ्रोन रे ग्याप्शो माप्त्रे आ नेक्था माक-पेला डा रूमी थिम्मे बाक्त। उत्पत्ती २३:१३-२०

14 मिनु आ आफ थिम्शा नोले, योसेफ नु आ नु गाक्ब नेल्ल इजीप्त रागी लेम्मा बाक्त।

15 मिनु आन आफ बेक्म नोले योसेफ आ लोकबपुकीम “मुल योसेफमी इं कली क्येक्क लेप्बा कों। मारदे हना गोपुकीमी मेको कली मरिम्शो पाइतय” दे लोव्र पमुमा बाक्त। उत्पत्ती २७:४१



16 मिनु आ लोकबपुकीमी लोव्र पचा कली मुर का योसेफ आ बाक्तीके सोइक्तमे बाक्त। मेकोमी “इन आफ आ बेक्चा क्येडा डोंइती मार अरेवा बाक्त देशा हना,

17 गे योसेफ कली ‘इन लोकब आन मरिम्शो पशो आ पर्बम माफ गेने। मारदे हना इन कली मरिम्शो पाम्तेक्मे। मिनु इन आफ आ परमप्रभु आ गेय पाइब आन कली आन पाप माफ गेने’ दे माइक्चा” दे सोइश्शो मुरुमी योसेफ कली देंमाक्त। मिनु योसेफमी मेको आ लोव्र नेंशा डाक्माक्त।

18 मिनु आ लोकबपुकी यो जाक्मा बाक्त। मिनु आ डोंइती खुम्की पा बाप्शा “इन वाइल नकी” दे सेउ पामे बाक्त।

19 मिनु योसेफमी “महिनीन, गो परमप्रभु मनड।

20 गेपुकीमी आं कली मरिम्शो पाइतीनी। परमप्रभुमी चहिं रिम्शो सेलती। मो दुम्शा परमप्रभुमी शुश मुर आन कली ब्रोंइचा गेप्टु। उत्पत्ती ४५:५,७

21 मोपतीके महिनीन, गो इन कली नु इन आल आन कली कोव्रनुड” दे आ लोकब आन कली लेम्शा, रिम्शो लोव्र पवा बाक्त।

22 योसेफ नु आ खिं डा मुर नेल्ल इजीप्त रागीमी बाक्मा बाक्त। मिनु योसेफ सहे का १० बर्स ब्रोंइमाक्त।

23 मिनु आ तौ एफ्राइम आ चच युइ यो तवा बाक्त। आ डोंइती जरमेशो, मनस्से आ तौ माकीर आ तौ आ थुकुम वोदा बाक्त।

24 मिनु योसेफमी आ लोकब आन कली “गो बेक्नुड। परमप्रभुमी इन कली कोव्रब। परमप्रभुमी अब्राहाम, इसहाक नु याकूब कली ‘इन कली कनान रागी लेप्पाइक्नुड’ दे कसम जशा, लोव्र पशो बाक्ब” देंमाक्त।

25 मिनु योसेफमी आ लोकब आन कली “परमप्रभुमी इन कली थमा पा एकेर रे लेप्पाइक्ब। मेना आं रुश यो लतीने” दे कसम जपाइक्मी बाक्त। प्रस्थान १३:१९; यहोसु २४:३२

26 मिनु योसेफ सहे का १० बर्स दुम्शा बेक्माक्त। मिनु आ रां

कली मराकचा डा पा ओख्ती खेक्शा, इजीप्त रागीमी बाकसम कुर  
पा वोदमे बाक्त।

## परमप्रभु यावे आ लोत्र

### **Bible in Sunwar (NP:suz:Sunwar)**

copyright © 2011 Wycliffe Bible Translators, Inc.

Language: Sunwar

Translation by: Wycliffe Bible Translators, Inc.

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789937101646

### **The Bible without Deuterocanon**

in Sunwar

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

clvi

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

27cd6a1c-0244-5add-a4e8-b4f0e5104473